

# O Le Liahona



**O Elders Gong ma Soares:  
“O Ni Molimau i le Suafa o Keriso  
i le Lalolagi Uma,” ii. 12, 18**

O Mea e 8 ia Malamalama ai  
e uiga i Lou Epikopo, i. 24

Iosefa Samita: “Na Musuia e Faasee  
ese le Faamoemoe o Siona,” i. 28

O Le Tala o Aso e Gata Ai o a Tatou  
Feagaiga ma le Atua, i. 34



**"I LE ILOA AI **SA FUAFUA O**  
**TATOU MATUA FAALELAGI MO**  
**LO TATOU FIAFIA FAAI'U MA**  
**LE FAAEAGA** UA AUMAIA  
AI IA TE I TATOU SE VAAIGA,  
UA AUMAIA AI IA I TATOU  
SE FAASINOMAGA O NI FANAU  
FAAPELEPELE A NI MATUA FAALELAGI,  
MA FAATELEINA AI LO TATOU  
TALITONU MAUTINOA I LE ALII."**

ELDER QUENTIN L. COOK

*Mai le "E Maeu Le Alofa Mutimutivale o le Alii," itulau 34.*

# O Le Liahona, Oketopa 2018



34

## TALA FAAALIA

- 6 Mataupu Faavae mo le Auaunaga: Mauaina o le Fesoasoani e Fesoasoani ai i Isi**  
*E faapefesa ona tatou iloa po o afea ae pe faapefesa foi ona faaaofia ai isi i la tatou auaunaga?*



**I LE FAAVAA**  
*Such as I Have I Give Thee*, saunia e Walter Rane

- 12 Elder Gerrit W. Gong: Alofa i le Alii ma Faalagolago ia te la**  
Saunia e Elder D. Todd Christofferson

- 18 Elder Ulisses Soares: O Se Tagata e aunoa ma le Faaoleole**  
Saunia e Elder Neil L. Andersen

- 24 O Mea e Mananao Epikopo Uma ia Iloa e Tagata o Lana Uarota**

Saunia e Michael Meyers  
*O nisi taimi e galo ia i tatou o epikopo o tagata foi e pei o i tatou, o loo latou faia le mea sili e auauna lelei ai i o latou valaauga.*

- 28 Au Paia: O Le Tala o le Ekalesia—Mataupu 8: O Le Tulai Mai o le Ekalesia a Keriso**  
*A o lolomiina le Tusi a Mamona, e toatele tagata ua taitai ai i le Ekalesia moni. Na sosoo le lolomiga, ma le faatulagaga o le Ekalesia e Iosefa.*

- 34 E Maeu Le Alofa Mutimutivale o le Alii**

Saunia e Elder Quentin L. Cook  
*O le a musuia tagata o le Ekalesia pe a latou faitau e uiga i le Au Paia faamaoni o Aso e Gata Ai i le talafaasolopito ma mau voluma fou o le Ekalesia.*

## FAITAUGA VAVE

- 4 O Ata o le Faatuatua: Mekaeli Isaako—Bydgoszcs, Polani**

- 10 O Le Mea Tatou Te Talitonu I Ai: O Le Mea e Alu i ai Tupe o Sefuluai**

- 40 O Leo o Le Au Paia o Aso e Gata Ai**

- 80 Seia Tatou Toe Feiloai: O La Tatou Lagolago Faifai Pea**  
Saunia e Peresitene James E. Faust



48

**44 O Lo Tatou Faaosofia e Ola i le Talalei**

Saunia e Mindy Selu

*O la tatou mafuaaga o le ola  
amiontu e fitoitonu lava i le  
mea e tasi.*

**48 O Le Uluai Laasaga i le Salamo**

Saunia e Aurilas Peterson

*O le alu i lo'u epikopo sa momia  
ai se lototele naua, ae sa faia ai le  
eseesega uma.*



- 50 Aoao Mai i le Ala a le Alii**  
Saunia e Elder David A. Bednar  
*A tatou faatagaina le Agaga e avea  
ma faiaga, o le a tupu lo tatou  
malosiaga e aoao.*

- 54 O Auala e 5 e Aoao Ai Mai le Konafesi Aoao**  
*Siaki manatu nei mo le mauaina  
o nisi mea mai savali o le konafesi.*

- 56 Aoao Mai e Le Agaga Paia**  
*Ua faasoa mai e nei talavou  
mea na latou aoaoina mai le  
konafesi aoao.*

- 58 Pepa Lautele o I Ai se Savali:  
Afafai E Te Faalogo**

- 59 Mea Moni e uiga i le Konafesi Aoao**

- 60 Fesili ma Tali**  
*E mafai faapefea ona ou valaaulia  
le Agaga i totonu o lo'u aiga pe a  
tauaimisa ma fefinauai tagata?*

- 62 O Ala e Saunia ai Oe mo Lou Lumanai**

*O nei aafiaga mai talavou matutua e mafai ona faaali atu ai ia te  
oe le ala e maua ai le manuia i le  
lumanai.*

**66 Pasi Atu le Alofa o le Atua**

Saunia e Allie B.

*Ina ua matou siitia ese, sa ou  
matauina sa lei toatele ni tagata i  
la matou paranesi. O lea sa tonu  
ai ia te au e fai se mea e uiga i ati.*

**67 Tatalo i le Ana**

Saunia e Carsen K.

*Sa ou fefe ne'i le mafai ona toe  
maua lo matou auala i le taavale.*

**68 Faasusulu Atu Lou Malamalama:  
Susulu Malamalama i Czech Republic****70 E molimau Apostolo ia Keriso**  
Saunia e Elder Jeffrey R. Holland**71 O La Tatou Itulau****72 Faatuatua, Faamoemoe,  
ma le Alofa Tunoa—Vaega 3:  
Jeffrey R. Holland**  
Saunia e Megan Armknecht**74 O Le Kalapu Faitau o le Tusi a Mamona****75 Toa o le Feagaiga Tuai:  
Sa Lototele Eseta****76 Tala o Tusitusiga Paia:  
O Eseta Le Masiofo**  
Saunia e Kim Webb Reid**79 Itulau e Valivali: E Mafai Ona  
Ou Fesoasoani i Isi ia Lagonaina e Alofagia i Latou**

O Le Lomiga Faamaonia Faa-Samoa a le Ekalesia  
a Iesu Keriso o le Au Paia o Aso e Gata Ai

**Susuga a le Au Peresitene Sili:** Russell M. Nelson,  
Dallin H. Oaks, Henry B. Eyring

**O Le Korama a Apostolo e Toasefululua:**

M. Russell Ballard, Jeffrey R. Holland, Dieter F. Uchtdorf,  
David A. Bednar, Quentin L. Cook, D. Todd Christofferson,  
Neil L. Andersen, Ronald A. Rasband, Gary E. Stevenson,  
Dale G. Renlund, Gerrit W. Gong, Ulisses Soares

**Faatonu:** Hugo E. Martinez

**Faatonu Lagolago:** Randall K. Bennett, Becky Craven

**Fautua:** Brian K. Ashton, LeGrand R. Curtis Jr., Edward  
Dube, Sharon Eubank, Cristina B. Franco, Donald L.  
Hallstrom, Douglas D. Holmes

**Pule Faatonusili:** Richard I. Heaton

**Faatonusili o Mekasini a le Ekalesia:** Allan R. Loyborg

**Pule o Mea Tau Pisini:** Garff Cannon

**Pule Faatonutonu:** Adam Olson

**Pule Faatonutonu Lagolago:** Ryan Carr

**Lagolago o Lomiga:** Francisca Olson

**Au Tusitusi ma Faatonutonu:** Maryssa Dennis, David  
Dickson, David A. Edwards, Matthew D. Flitton, Lori Fuller,  
Garrett H. Garff, LaRene Porter Gaunt, Jon Ryan Jensen,  
Charlotte Larcabal, Michael R. Morris, Eric B. Murdock,  
Sally Johnson Odekirk, Joshua J. Perkey, Jan Pinborough,  
Richard M. Romney, Mindy Selu, Chakell Wardleigh,  
Marissa Widdison

**Pule Faatonusili Tusiata:** J. Scott Knudsen

**Faatonusili Tusiata:** Tadd R. Peterson

**Au Mamanu:** Jeanette Andrews, Fay P. Andrus,  
Mandie Bentley, C. Kimball Bott, Thomas Child,  
David Green, Colleen Hinckley, Eric P. Johnsen,  
Susan Lotgren, Scott M. Mooy, Emily Cheiko Remington,  
Mark W. Robison, Brad Teare, K. Nicole Walkenhorst

**Faatonu o le Puletaofia ma Fatufatuga:**

Collette Nebeker Aune

**Pule i le Gaosiga:** Jane Ann Peters

**Au Gaosi:** Ira Glen Adair, Julie Burdett, Thomas G. Cronin,  
Bryan W. Gygi, Ginny J. Nilson, Derek Richardson

**Tailolomi:** Joshua Dennis, Ammon Harris

**Faatonusili Lolomiga:** Steven T. Lewis

**Faatonusili o le Tufatufaga:** Troy R. Barker

Mo le okaina o mekasini, alu i le store.Ids.org po o le  
Faletusi Tutotonu i Pesega. Telefoni 64127. Totogi o le  
Mekasini: \$0.55 (Samoa) ī le kopī. Totogi mo le Tausaga  
Atos \$6.60 (Samoa).

**Auina atu tusitusiga ma faafesili i luga o le  
initoneti** i le *Liahona.Ids.org*; po meli mai i le *Liahona*,  
Rm. 2420, 50 E. North Temple, Salt Lake City, UT 84150-  
0024, USA; po o le i-meli *liahona@ldschurch.org*.

*O Le Liahona* (o lona uiga i le Tusi a Mamona o le "tapasa"  
po o se "faatonutonu") e lomia i le faa-Alepania, Aminia  
(Sasae), Pisilama, Palekeria, Kemupotia, Sepuano, Saina,  
Kalaotia, Siekislovakia, Tenimaka, Take, Igilisi, Esitona,  
Fit, Finelani, Farani, Sihami, Eleni, Hanikeri, Initu, Iselani,  
Initonesea, Italia, Japani, Kiripati, Korea, Latvia, Litunia,  
Malakasa, Masela, Monokolia, Nouei, Polani, Potukale,  
Romania, Rusia, Samoa, Saina (ua faafaofoieina), Silovenia,  
Sipaniloa, Suetenua, Swahili, Tagaloa, Tahiti, Tai, Toga,  
Iukureini, Uruto, ma Viatenane. (E eseese lava gagana.)

© 2018 Puletaofia e le Intellectual Reserve, Inc. Ua taofia  
aiā tatau uma. Lomia i le lunaite Setete o Amerika.

**Faamatatalaga o le Puletaofia:** Vagana ua faailoa atu,  
e mafai e tagata taitoatas i ona kopiina anomea mai le  
*Liahona* mo lo latou faaaogainga patino, ma le saili tupe  
(e aofia ai mo valaaua o le Ekalesia). O lenei aia tatau  
e mafai ona faaleaoagainga i sooo tsaimi. O anomea o  
mea fainio e le mafai ona kopina pe afai o o loo faailoa  
mai se faasa i le laina o loo i ai ma le faatufugaga.  
O fesili mo le Puletaofia e tatau ona faatuatu mai  
i le Intellectual Property Office, 50 E., North Temple  
St., FL 13, Salt Lake City, UT 84150, USA; email:  
[cor-intellectualproperty@ldschurch.org](mailto:cor-intellectualproperty@ldschurch.org).

**For Readers in the United States and Canada:**

October 2018 Vol. 42 No. 10. O Le Liahona (USPS 311)  
Samoan (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address label  
from a recent issue; old and new address *must* be included.  
Send USA and Canadian subscriptions to Salt Lake  
Distribution Center at address below. Subscription help  
line: 1-800-537-5971. Credit card orders (Visa, MasterCard,  
American Express) may be taken by phone. (Canada Post  
Information: Publication Agreement #40017431)

POSTMASTER: Send all UAA to CFS (see DMM 507.1.5.2).  
NONPOSTAL AND MILITARY FACILITIES: Send address  
changes to Distribution Services, Church Magazines,  
P.O. Box 26368, Salt Lake City, UT 84126-0368, USA.

# Faaopoopoga i le Initoneti



Faitau tusiga ma auina atu la oe lava  
tusiga i le [liahona.Ids.org](http://liahona.Ids.org)



Sue savali musuia e mafai ona  
faasoaa atu (i le gagana Peretania,  
Potukale, ma le Sipaniolo) i le  
[facebook.com/liahona](https://facebook.com/liahona).



Auina mai finagalo faaalia i le  
[liahona@ldschurch.org](mailto:liahona@ldschurch.org)

AKONA MALE GETTY IMAGES

## Lesitala i le [store.Ids.org](http://store.Ids.org)

Po o le asiasi i se faletusi autu, fesili  
atu i taitai o le uarota, pe valaau i le  
1-800-537-5971 (I.S. ma Kanata).



## AUTU I LE LOMIGA LENEI

*E tau mai e numera le itulau muamua o le tusiga.*

**Agaga Paia,** 50, 56, 60

**Alofa,** 66, 79

**Aoaoina,** 50

**Auaunaga,** 6, 24

**Faaaliga,** 41, 50

**Faamagaloga,** 48, 72

**Faataitaiga,** 68

**Faatuatua,** 4, 40, 42, 44

**Faigata,** 4

**Feagaiga Tuai,** 75, 76

**Galuega,** 62

**Galuega faafaifeautalai,** 43, 66

**Iesu Keriso,** 44, 70

**Iosefa Samita,** 28, 34

**Konafesi aoao,** 54, 56,

58, 59

**Lotogatasi,** 24, 43, 60

**Lototele,** 75, 76

**Malumalu,** 42, 71

**Molimaui,** 56, 68, 71

**O Epikopo,** 24, 48

**Ola tutoatasi,** 40, 62

**Perofeta,** 42, 71, 80

**Salamo,** 48

**Sefuluai,** 10

**Taitai o le Ekalesia,** 12, 18

**Talafaasolopito o le  
Ekalesia,** 28, 34

**Tama Faalelagi,** 34, 43

**Tatalo,** 4, 40, 41, 67, 68

**Tusi a Mamona,** 28, 74





*"E tele mea lelei e mafai ona faia e le ma'i," o le tala lea a Mekaeli, o loo mafatia i le le toe aoga o ona fatuga'o. Ona o lenei ma'i ua faateleina ai lona lotofaafetai mo le talalelei, na ia fai mai ai, "o se tofotofoga lelei."*

LESLIE NILSSON, TAGATA PUEATA

## Mekaeli Isaako

*Bydgoszcs, Polani*

I le taimi muamua, sa ou ita.

"Aisea ua tupu ai ia te au?" Sa ou tatalo. "Sa ou auauna atu ia te oe, le Alii e." Ina ua mavae sina taimi, sa ou malamalama. Fai mai le mau, "O lē faatuatua ia te au ina ia faamaloloina, ma e le'i filifilia ia oti, o le a faamaloloina" (MF&F 42:48).

Sa tatalo pea tagata o le Eklesia mo au, ae sa atili ai ona leaga lo'u ola maloloina. Sa latou manatu e le o faafogaina a latou tatalo, ae sa faafogaina i latou ona sa avea i latou o ni tagata ua sili atu ma ona ua lagonaina le alofa o loo latou faaali mai ia te au.

Tusa lava pe ou te malosi, o le a le tele o le taimi o totoe o lo'u matua na te tuuina mai? Ae, o loo tele pea avanoa mo au.

Ua ia te au le Eklesia. Ua i ai sa'u auala e faafesootai ai le Atua e ala i le tatalo, e ala i le anapogi, e ala i mea uma tatou te fai. O a isi mea ou te manaomia?

O nisi taimi ou te faapea ifo ai ia te au lava, "Atonu o le mea lea ua ou ma'i ai—ina ia mafai ai ona ou malamalama ai i le maeu o le mea ua ou i ai, ma le maeu o lenei faamoemoe."

### S A I L I   N I S I   M E A

Aoao atili e uiga i le faafetaia'a lo uitau o le olaga ma le mana o le faamoemoe mai ia Peresitene Russell M. Nelson i le [lds.org/go/10185](https://www.lds.org/go/10185).

E mafai ona e maua isi Atatosi o le Faatuatua i le [lds.org/go/18](https://www.lds.org/go/18).

# Mataupu Faavae mo le Auaunaga

## MAUAINA O LE FESOASOANI E FESOASOANI AI I ISI

*E faapefea ona tatou faaaofiaina isi pe a tatou manaomia le fesoasoani ia tatou taumafaiga e auauna atu? Auai ai i faatalanoaga mo auaunaga ma fonotaga a le aufono i Aso Sa muamua.*

**I**na ua le mafai e Kathy ona savali ma ua manaomia ai le nofoafaataavale ona ua afaina i se mai neura, sa ia iloa ai ua na manaomia se fesoasoani i po uma e sii ese mai ai o ia mai le nofoafaataavale i lona moega. E tele tele le galuega mo se tagata toatasi. O lea sa talanoa ai le korama a toeaina e uiga i lona tulaga ma tonu ai e fai se faasologa o taimi e fesoasoani ai ia te ia i afiafi taitasi.<sup>1</sup>

A oo ina tatou iloaina manaoga ma malosiaga o i latou tatou te tautuaina, e mafai ona tatou iloa tatou te manaomia le fesoasoani e fesoasoani ai e faafetau o latou manaoga. O faatalanoaga mo auaunga ma fonotaga a aufono i Aso Sa muamua o ni avanoa ia se lua e talanoaina ai pe faapefea ona faaaofia lelei ai isi.

### Faatalanoaga o Auaunaga

O nei faatalanoaga faalekuata i le va o tuafafine o auaunaga ma le au peresitene o le Aualofa po o uso o auaunaga ma le au peresitene o le korama a toeaina e na o le pau lea o le lipoti *aloiaia* tatou te faia e

tusa ai ma i latou tatou te auauna i ai. O se faatalanoaga o se avanoa lea e le itiiti ifo i lo se tulaga faalekuata e (1) fefautuauai ai e uiga i malosiaga, manaoga, ma luitau o aiga ma tagata taitoatas i ua tofia i ai, (2) e fuafua ai po o a manaoga e mafai ona fesoasoani i ai le korama, Aualofa, po o le aufono a le uarota, ma le (3) ia aoao mai taitai ma ia faamalosiauina i taumafaiga faaleauaunaga.

E talanoaina sa'o e le peresitene o le korama a toeaina ma le peresitene o le Aualofa ia manaoga i le epikopo ona maua mai ai lea o le fautuaga ma le taitaiga mai ia te ia.

E mafai ona e maua isi faamatalaga e uiga i faatalanoaga o auaunaga i le ministering.lds.org.

### O Le Faia o Faatalanoaga o Auaunaga ia Anoa

I le lagolagoina o le saunoaga a Peresitene Russell M. Nelson faapea o le polokalama o auaunaga o le a avea o se vaega tonu e fua i ai aafiaga o le Ekalesia i le lumana, na aoao mai ai Elder Gary E.



O tala "O Mataupu Faavae o le auaunaga" ua faamoemoe e fesoasoani ia i tatou e aoao e fetausia'i ai le tasí ma le isi—ae aua ne'i faasoaina atu o se savali i le taimi o asiasiga. A o tatou iloaina i latou tatou te auauna atu i ai, o le a uunaia i tatou e le Agaga Paia ia iloa po o le a le savali latou te ono manaomaiaina e faaopoopo atu i la tatou tausiga ma le agaalofa.

## SA FAAAOFIA E IESU ISI

Nafafagaina faavavega e lesu le 5,000 o tagata i falaoa e lima ma nai i'a iti e lua. Faitau le loane 6:5–14 e faailoa mai pe faafia ona faaaofia e le Faaola isi i lana galuega o le auauna atu.



Stevenson o le Korama a Aposetolo e Toasfululua, “O le faataunuina o lana vaaiga . . . e mafai ona faavae i luga o le lelei o le aoaoina o uso ma tuafafine i le auaunaga ma punouai i ai i le faatalanoaga o auaunaga.”<sup>2</sup>

O ni fautuaga se fa mo uso ma tuafafine mo auaunaga:

- Alu i le faatalanoaga e saili ni fautuaga. Ia saunia e aoao.
- Ia saunia e talanoaina manaoga e te ono manaomia se fesoasoani e faafetaiaia.
- Taulai atu i malosiaga ma gafatia o le tagata, ae le na o mea e manaomia.
- Faafesootai le au peresitene e talanoa i ai i le va o faatalanoaga faalekuata pe a manaomia ai.

O fautuaga e lima mo taitai:

- E le tau manaomia ona uumi faatalanoaga, ae faatulaga se taimi ia lava e talanoa ai i se nofoaga e mafai ona maua ai se talatalanoaga anoa.
- Faaaoga le avanoa e auauna atu ai i uso ma tuafafine o auaunaga.
- Aua le faia ni fesili e avatu ai se lagona o la e na ona e faitauina asiasiga pe na ona maka ai i le lisi ua uma ona faafesootai (“Ua fai lau auaunaga?”) Fai fesili e faamalolosia ai amioga o loo moomia (“O a ni uunaiga na e lagona ao e tatalo mo le aiga? O le a se mea na tupu ina ua e faatinoina na uunaiga?”)
- Faalogologo ma le lotofaamaoni ma tusitusi na manatu.

- Fefautuai faatasi. O soa mo auaunaga ua i ai le aia tatau e maua ai faaliga mo i latou ua tofia i ai i latou e auauna i ai.<sup>3</sup>

### Fesili ma Tali e uiga i Faatalanoaga o Auaunaga

*O le a le faatalanoaga o auaunaga?*

O se talatalanoaga i le va o uso o auauna ma se tagata o le au peresitene o le korama po o le va o tuafafine o auauna ma se tagata o le au peresitene o le Aualofa i se nofoaga e mafai ai e i latou ona sailia ma maua musumusuga mai le Agaga Paia. O le taunuuga, e mafai ona musuia uso ma tuafafine o auaunaga e vaavaai, alolofa, aoao atu, ma faamafanafana i le ala a le Faaola.

*Pe manaomia ona faia faafesagai nei faatalanoaga faalekuata?*

E masani lava ona faia faafesagai ma le tagata ae e mafai ona faia i luga o le telefoni po o luga o le initoneti pe afai e le talafeagai le feiloai faafesagai. E masani, ia auai uma le soa i le faatalanoaga pe a talafeagai ai.

*O le a le faamoemoega o se faatalanoaga o auaunaga?*

O faatalanoaga o auaunaga o se avanoa lea mo uso ma tuafafine o auaunaga e toeiloilo ai tulaga o i ai i le taimi nei, fai faufuaga mo le lumanai, ma maua mai le fesoasoani moomia i tagata po o aiga latou te auauna atu i ai. O se avanoa e talanoa ai e uiga i punaoa e mafai ona tuuina atu e le korama ma le Aualofa.

*E faapefea ona ou taulimaina mataupu e le faalauaiteleina pe maaleale?*

E na o le peresitene o le korama a toeaina po o le peresitene o le Aualofa e faasoa atu i ai faamatalaga e le faalauaiteleina—pe faasoa sa’o atu i le epikopo. O faamatalaga e le

**O le fefautuai e uiga i manaoga o le fatu lea o faatalanoaga o auaunaga. Tagai foi i le tusiga Mataupu Faavae o le Auaunaga “Fefautuai e uiga i o Latou Manaoga,” i le lomiga o Setema 2018.**



faalauaiteleina pe maaleale e le tatau ona faasoa atu i fonotaga a le aufono i aso Sa muamua.

*E mafai ona e matamata i vitio faaleaoaoga o loo faaali mai ai faatalanoaga o auauanga i le [ministering.lds.org](#).*

### Fonotaga/Sauniga a le Aufono mo le Aso Sa Muamua

E le gata i faatalanoaga o auauanga, o fonotaga a le aufono i Aso Sa muamua o se isi lea auala e faaaofia ai isi i le auauanga. I fonotaga a le Aualofa ma le korama a toeaina, e mafai ona oo mai musumusuga ia i latouu e auai ai e ala i le Agaga ma mai isi o le vaega.

O le faamoemoega o se fonotaga a le aufono o le:

- “Fefautuaai faatasi e uiga i tiutetauave i le lotoifale, avanoa, ma luitau;
- “Aoao mai malamalamaga o le tasi ma le isi faapea aafiaga; ma
- “Fuafua ni auala e faatino ai uunaiga e maua mai le Agaga.”<sup>4</sup>

O fonotaga a aufono e le na o ni talanoaga: o fonotaga e taitai atu ai i tatou e galulue o ni tagata taitoatasi pe o se vaega a o musuia ai e le Agaga. E mafai e sui auai ona lagonaina se naunauga e faataunuu le galuega a le Alii o se taunuuga o nei fonotaga.

### Valaaulia e Faatino

“O la matou tatalo i le asō,” na saunoa ai Elder Jeffrey R. Holland o le Korama a Aposetolo e Toasefululu, “o le a atili tautino loloto atu e alii ma tamaitai uma—ma o tatou ali'i ma tamaitai talavou matutua—le tuuto i le tausiga faamaoni mo le tasi ma le isi, ua na o le alofa le pona lava o Keriso o loo uunaia i latou e faia ai.”<sup>5</sup> ■

### FAAMATALAGA

1. Tagai *Mormon Messages* video “Lift,” [lds.org/media-library](https://www.lds.org/media-library).
2. Gary E. Stevenson, in “Ministering Interviews” (video), [ministering.lds.org](https://www.ministering.lds.org).
3. Tagai Russell M. Nelson, “Auauanga” *Liahona*, Me 2018, 100.
4. *Sau, Mulimuli Mai ia te Au—Mo Perisitua Mekisateko ma le Aualofa*, i le *Liahona*, Nov. 2017, 140; o loo maua foi i le [comefollowme.lds.org](https://www.comefollowme.lds.org).
5. Jeffrey R. Holland, *Liahona*, Me 2018, 103.

## O LE MEA E ALU I AI TUPE O SEFULUAI

*O le a le mea e tupu i tupe e te totogia mo le sefuluai?*



*E te maua tuge.*



*E te foai atu le 10 pasene o au tuge maua mo le sefuluai (tagai MF&F 119).*



*E te tuuina atu lau sefuluai i se tasi o lau au epikopo po o le au peresitene o le paranesi pe auina atu foi i le upega tafailagi i le donations.lds.org.*



*I le laumua o le Ekalesia, o le Au Peresitene Sili, Korama a Aposetolo e Toasefululua, ma le Au Epikopo Pulefaamalumalu o le Aufono e Pulefaasoasoaina Sefuluai (tagai MF&F 120). E pei ona taitaia ai e le Alii, latou te faia faaiuga musuia pe faapefea ona faaaoga ia tuge paia o sefuluai.*

## E MAFAI ONA FAAAOGA MO:



*Le fauina ma le tausiga o malumalu, falelotu, ma isi fale e pulea e le Eklesia.*



*E faagaoioia ai polokalama faaleaoaoga a le Eklesia.*



*E lolomi ai tusitusiga paia ma isi anomea.*



*Faia ai saililiiga o talafaasolopito o aiga.*



*E faia ai taumafaiga faaleuelefea ma galuega fesoasoani mo tagata.*



*Faia o le galuega faafaifeautalai.*



*Saunia ai gaoioiga a le Eklesia mo le faaaumeaina o tagata i uarota ma paranesi.*

### AOAO ATILI

- David A. Bednar, "O Pupuni o le Lagi," Konafesi aoao ia Oketopa 2013.
- Malaki 3:7–18
- "Sefuluai," Faamano i le Faatuatua (2004), 155–57



Saunia e  
Elder D. Todd  
Christofferson

O Le Korama  
a Aposetolo e  
Toasefululua

# ELDER GERRIT W. GONG: Alofa i le Alii ma Faalagolago ia te Ia

**O** se tagata faatoa faaipoipo na faauu mai le Iunive-site o Oxford i Egelani, na aoaoina e Gerrit W. Gong e ala i aafiaga faaletagata lava ia faapea pe a tatou alolofa i le Alii ma faalagolago ia te Ia, o le a Ia fesoasoani mai ia i tatou, tialala i tatou, ma faamalosia i tatou.

O Gerrit sa avea o se tagata Sikola a Rhodes na galue e faamaea ni tikeri faauu se lua, o se tasi o na [faailoga] o se faailoga faafomai. I lea lava taimi, sa ia auauna i le au epikopo a le Uarota a Oxford. Na manatua e ia ma lona faletua, o Susan, le fautuaga lea na tuuina atu e Elder David B. Haight (1906-2004) o le Korama a Aposetolo e Toasefululua ina ua ia faataunuina le la faaipoipoga i le Malumalu o Sate Leki. “Na ia tau mai ia i ma’ua ia i ai lava se galuega i taimi uma,” na saunoa mai ai Elder Gong. “Na ma iloa afai ma te faalagolago i le Atua ma faia le mea sili ma te mafaia, o le a Ia fesoasoani mai ia i maua.”

Na maua e Gerrit ma Susan le “fesoasoani paia ma le alofa mutimutivale,” na ia saunoa ai. Ao i ai pea i le au epikopo, na faamaea e Gerrit mea manaomia uma mo se faailoga faafomai, vagana ai lana pepa faai. Sa ia talosaga i le epikopo a le Uarota a Oxford, o Alan Webster, mo se faamanuiaga faapeteriaka. I le faamanuiaga, na maua ai e Gerrit le folafolaga lenei: “Ia faaauau pea ona faia mea uma e te mafaia, ma o le a faamanua oe e le Alii.”

Na volenitia ni tagata e toalua a le uarota o e na i ai se potomasani faafailautusi faapitoa e fesoasoani e talolomi ana pepa, ma sa mafai ona faamaea e Gerrit lana pepa faai i ni nai masina. O le mea moni, sa ia faamaeaina se

faailoga o le matuaofaiva ma se faailoga faafomai i le na o le silia ma le tolu tausaga. I le faauuga sa ia taliaina ai se galuega faafaaoga suesue i le iunivesite. O lona poto masani mai Oxford na faamalosia ai lona faalagolago atu i le Alii, o le faalagolago lea na tumau e oo mai i lenei aso ma o le a faaauau pea ona faamanua ai Gerrit W. Gong ao ia auauna atu i le Korama a Aposetolo e Toasefululua.

## Areto ma l'a

“E agalelei ma alofa le Alii ma e saili e faamanua i tatou,” o le saunoaga lea a Elder Gong. “Afai tatou te faia le mea sili tatou te mafaia, o le a Ia faatagaina i tatou e fai le mea e sili atu nai lo le mea tatou te mafaia. E pei o le faateleina o areto ma i'a. E ave e le Alii mea o loo avanoa ma faalauait-leina i le mea e mafai ona tatou faia e i tatou lava.”





O le mataupu faavae o areto ma i'a e sa'o foi i le aoaoina, na ia saunoa ai. "E tusa lava pe le o maua le aoaoga aloaia, o le agaga o le aotauina o le mea lea e taulia, ona o le aoaoina e faavavau. E mafai ona tatou saili uma mo le malamalama ma le upumoni, e tusa lava po o a o tatou tulaga. Pe a tatou faia, o le a fesoasoani mai le Alii ina ia tatou mauaina."

### Avea ma se Vaega o le Feagaiga

Ao i ai i Oxford, sa aoao e Elder Gong se isi mataupu faavae o le talalelei, o se tasi na te ta'ua "avea ma se vaega o le feagaiga."

"Ao tatou faalatalata atili atu i le Alii, ua tatou faalatalata atili atu i le tasi ma le isi,"

O le tele o le fiafia o Elder Gong e mafua ona o ona matua, o Jean ma Walter, ma lona faletua, o Susan. Na "faatumulia [le fale a ona matua] i le faaaloalo tele mo le alofa o le Atua mo lana fanau taitoatasi," na ia fai mai ai. Ina ua feiloai Elder Gong i lona fale-tua mo le uluai taimi, na ia lagona le pei o Susan o se tagata ua leva ona ia masani i ai.

na ia saunoa mai ai. "I Oxford, sa ma faatauaina ma Susan o maua aafiaga faaleuarota e pei lava foi o o maua aafiaga faale-atamai. O le toatele o a maua uo mamae e oo mai i lenei aso o tagata e mai le Uarota a Oxford."

Na aofia i na uo ia Tim ma Katherine Witts, ia na manatua le o faatasi i le malumalu ma le au Gong. "Ou te manatua lelei le aveeseina e Brother Gong o lana uati ina ia le faalavelaveina pe taofia mai o ia e le taimi pe a mafau-fau i mataupu o le faava-vau," o le tala lea a Sister Witts. "Na fesoasoani lena faatinoga laitiiti ia te a'u ina ia sili atu ona maelega i la'u lava tapuaiga i le malumalu."

E masani ona feiloai le au Gong ma uo la te iloa ona o le talalelei. "E fai mai tagata, 'Na matou galulue

faatasi ma oe ao e i ai i le au fautua mauluga,' o tala faapena," fai mai Elder Gong, "ma e faapena foi i ma'ua. Ou te faafetai mo le peresitene o le siteki ma le aufono a le uarota lea na fesoasoani ia te a'u o se epikopo talavou. Tatou te nonofo aitalafu uma lava i matua, aiga faaletulafono, tuaoi, peresitene o misiona, tuafafine, ma taitai perisitua o e agalelei ia i tatou, taiala i tatou, ma uunaia i tatou ina ia o mai ia Keriso."

### Tupuaga Faaleaiga

O le talafaasolopito faaleaiga a Elder Gong e oo atu i augatupulaga e 34 i le Uluai Dragon Gong, lea na fanau i le 837 TA. O matua matutua o Elder Gong na malaga mai Saina i

le Iunaite Setete. O lona tina, o Jean, na auai i le Ekalesia a o talavou i Hawaii, ISA, ma mulimuli ane auai i le Iunivesite o Polika Iaga i Provo, Iuta, ISA lea sa ia nofo ai i le aiga o Gerrit de Jong, o le uluai pule lea o le Kolisi o Faatufugaga. “Na fesoasoani le au de Jongs ia te a’u ia malamalama i le uiga o se aiga o le talalelei,” o lana tala lea.

Ina ua uma le BYU, sa auai Jean i le Iunivesite o Stanford i Palo Alto, Kaledonia, ISA, lea sa ia feiloi ai ia Walter A. Gong. “Ua leva ona avea o ia ma se Kerisiano ma sa vave ona malamalama i le mea o ofaina atu e le talalelei toefuataina,” o le tala lea a Jean. Na auai o ia i le Ekalesia, ma i le tausaga mulimuli ane sa la faaipoipo ai i le Malumalu o Sate Leki. Na avea uma i laua ma faiaoga faapolofesa ma faaaluina faatasi le silia ma le 70 tausaga i le aoao atu.

“Na avea foi Tama ma se peteriaka,” o le saunoaga lea a Elder Gong, “ma talu ai o faamanuiaga faapeteriaka sa faia i lo matou fale, na faatumulia lo matou fale i se faaaloalo loloto mo le alofa o le Atua mo Ana fanau taitoasati.”

I le aso 23 o Tesema, 1953, i le Aai o Redwood, Kaledonia, na fanau ai le tama muamua o le fanau e toatolu a Jean ma Walter. “O lona igoa, o Gerrit, o se igoa Take, e faamamalu ai Gerrit de Jong,” o le faamatalaga lea a Jean. “O lona igoa ogatotonu o Walter, e faamamalu ai lona tama. Ma o lo matou faai e Saina, lea e faamamalu ai lona tupuaga.”

Na fai mai Jean sa alofa tele Gerrit i ona tei laiti, o Brian ma Marguerite. “Na fiafia o ia e fesoasoani ia i laua,” o lana tala lea, “e oo lava i mea laiti e pei o le aoao atu o i laua e nonoa o la seevae.” Na te manatua le sau i le fale mai le lotu i se tasi aso ma faalogo atu ia Gerrit ma Brian o fai mai e ese le faamoe tagata o lauga o le sauniga faamanatuga. “O lea sa ou luiina ai i la’ua: ‘Fai mai la se lauga e sili atu ona lelei.’ Sa la faaaogaina le lui ma amata ona gauai atili atu i lauga uma,” na ia fai mai ai.

Ao talavou, sa fiafia Gerrit e alu e feaei ma savavalii sopo ma isi alii talavou i lana uarota.

Mai le agavale: O Marjorie ma Gordon B. Hinckley o loo faafeiloi atu ia Gerrit ma Susan i le taumafataga o le faaipoipoga a le au Gong. I le avea ai ma se faifeatalai i Taiuani, na aoao atu ai e Elder Gong se aiga ma i tausaga mulimuli ane, i le avea ai ma se Pulega Aoao, na feiloi atu ai i le atalii o le fanau a se tasi o afafine o le aiga. I Viatename, na valiina ai e Elder ma Sister Gong se ata o se auala e aumaia le olioli i fanau o loo feagai ma luitau. O loo faapopototo faatasi tagata o le aiga o Gong ma i latou o e na fesoasoani i le valiina o le ata i Viatename.

E manatua faapitoa lava e Wally Salbacka, o se ue i le olaga atoa, se tasi o tolauapiga. “Sa matou i ai iina ma Gerrit ma lona uso, o Brian, ma se ue e le o se tagata o lo tatou Ekalesia. Mo se mafuaaga, sa amata ona matou lagiina ni viiga. Sa usu e Gerrit le fati, tena Brian, ae malū a’u. Ou te manatu na matou usuina ni pese se 10 pe 20, ona o le fiafia lava e pepese. Sa avea o se aafiaaga lelei. Sa faagaetia le matou ue lo lotu.”

Na manatuina foi e Brother Salbacka ao i ai i le aoga maualuga, sa talosaga e Gerrit ia



le au failape e taitai ni lapse filemu mo le ‘au mu. “Na ia faatalitonuina i latou o le tuuina atu o le lagolagosua e lelei mo tagata uma,” na ia saunoa ai, “ma na o mai moni lava i le taaloga!”

Ina ua maea le aoga maualuga, sa auai atu Elder Gong i le Iunivesite o Polika Iaga. Mai le 1973 i le 1975, sa ia auauna atu i le Misiona a Taiuani Taipei, ona toe foi atu lea i le BYU, lea na ia maua ai i le 1977 lana faailoga o le tagata malaga i suesuega faaAsia ma suesuega faalauaitele.

### **Mafutaga Faaleuo ma le Faaipoipoga**

Ina ua maea lana misiona, sa volenititia Elder Gong e saunia ni faeasaite i afiafi o Aso Sa i le Nofoaga Autu mo le Aoaoina o Faifeatalai i Provo. Na fesoasoani ia faeasaite ina ia

faamasani faifeautalai e malaga atu i Taiuani i tagata, agai-fanua, ma le aganuu iina. O se tasi o faifeautalai o Sister Susan Lindsay mai Taylorsville, Iuta, o le afafine o Richard P. ma Marian B. Lindsay. Sa avea Brother Lindsay ma se uso o le Korama Lona Lua o Fitugafulu. “Sa ou lagona le pei o Susan o se tagata ua leva ona ou iloa,” o le saunoaga lea a Elder Gong.

I le lua tausaga mulimuli ane, i nai masina ina ua toe foi Susan i le BYU i le mavae ai o lana misiona, sa i ai Gerrit i Provo ma lona aiga. Sa faiaoga lona tama i le iunivesite, ma sa fuafuaina e Gerrit se asiasiga e lua vaiaso. Sa toe tuu i tua le asiasiga i le fa vaiaso, ona ua la tafafao faamasani ma Susan. Ona malaga ai lea o Gerrit mo se galuega faataitai i Hawaii ao lei toe foi atu i Oxford.

“Sa ma faamasani mai itulagi eseese e lua,” o le toe faamanatuaina mai lea a Elder Gong. “Sa ou taumafai e suesue i Egelani ao aoaoina mea uma ou te mafai a uiga ia te ia mai le isi itu o le Vasa Atelanitika.”



“Sa fai le ma faamauga i luga o le telefoni,” o le tala lea a Sister Gong. “Sa ia [Elder Gong] toe foi mai i le fale i le Aso Faafetai, ma sa ma faaipoipo i le aso muamua na tatala ai le malumalu i le tausaga fou.” Lua vaiaso mulimuli ane, sa la felelei ai i Egelani e amataina se olaga fou faatasi.

“A faaipoipo tagata, la te talanoa e uiga i ni aiga selua e avea ma aiga e tasi,” o le saunoaga lea a Elder Gong. “Ma o le mea moni lava lena na tupu ia te a'u. Ou te lagona le avea ma se vaega o le aiga o Lindsay, e pei lava ona ou avea ma se vaega o le aiga o Gong.”

### O Se Matata Maoae

Ina ua mavae lona faaaluina o se taimi puupuu i le vaega o faiaoga i Oxford, na suia le matata a Gerrit i le tautua atu faalemalio i Uosigitone, D.C., ISA. I le 1984, sa ia auauna atu ai i le aufaigaluega o faalauiologa mo le toe palotaina o Reagan-Bush, lea na ia faasoaina ai se avanoa o le ofisa ma Mike Leavitt, lea na mulimuli ane avea ma kovana o Iuta. “Sa mataala ma magafagafa lelei Gerrit,” na saunoa ai Brother Leavitt, “peitai sa iloga o ia i lona agalelei le maluelue.”

I le 1985 na auauna atu Gerrit o se fesoasoani faapitoa i le Failautusi Faapitoa o le Matagaluega a le Setete. I le 1987 na avea o ia ma se fesoasoani faapitoa i le amepasa o le I.S. i Beijing, Saina. Ma mai le 1989 i le 2001, sa ia faatumuina le tele o tofiga i le Nofoaga Autu mo Suesuega Faataatia ma Faavaomalo i Uosigitone, D.C. Ona ia toe foi lea i le lalolagi faakatemia ina ua ia taliaina se tofiga o se fesoasoani i le peresitene mo fuafuaga faataatia i le BYU. Sa ia faaaluina le iva tausaga i lena matafaioi.

O Carri Jenkins, fesoasoani i le peresitene mo fesootaiga a le iunivesite i le BYU, sa i ai i le ofisa na sosoo ai. Na te manatua le tomai o Gerrit Gong e uunaia i latou na siomiaina o ia. “Afai e leai sou talitonuga e mafai ona e faia se galuega faigata, sa ia te ia lena talitonuga mo oe,” na ia fai mai ai. “Na ia faia mea uma i lona malosi e fautua ai oe, tuu





atu ia te oe le faamoemoe, ma tuu atu e te agai i luma ma faamaonia oe lava.”

O le faamasino a le malo o Thomas B. Griffith, lea na silafiaina lelei Elder Gong e le gata i Uosigitone ae faapea foi i BYU, na faamatalaina ni fegalegaleaiga ma ia i le auala lenei: “I le faaiuga o se talanoaga, o le a e iloaina sa taulai atu lava [le talanoaga] ia te oe. O ia o se tagata e lelei le faalogo. Ma e na te faia ni fesili e te mafaufau ai.”

O Cecil O. Samuelson, sa avea ma se Fitugafulu o le Pulega Aaoa ua malolo faamamaluina ma se peresitene tuai o le BYU lea na saunoa mai o Elder Gong “o se tagata filemu, ae o lona mafaufau e le malolo.”

### Olaga i le Aiga

Na avea Gerrit ma Susan Gong o ni matua o se fanau tama e toafa—o Abraham, Samuel, Christopher, ma Matthew—o e eseese tulaga na ola ae ai.

“Ao matou i ai i Beijing, sa maua e le ma fanau le faamanuiaga o le avea ma uo mamae a le tasi ma le isi,” na saunoa ai Elder Gong.

“I le tasi itu, sa latou maua le avanoa e vaai ai i se vaaiga lautele o le lalolagi,” na faaopoopo mai ai Sister Gong. “I le isi itu, na fesoasoani ia i matou ina ia fusia faatasi i matou o se aiga. O loo fai mai pea o ma atalii o le mea sili sa ma faia o ni matua o le avatou ia i latou o ni uso.”

O le taimi lava matou te faaaoga ai a matou maila femilagaai,” na saunoa ai Elder Gong. “Matou te tuuina atu le filifiliga o se nofoaga i tagata taitoatasai e fai. Matou te amata i Uosigitone, D.C., lea na matou nonofa ai, ona matou malaga lea i Egelani, le Ripapelika o Siekislovakia, Eleni, Take, Initia, Saina, ma Iapani.

“E tasi lava le matou tulafono mautu i lena malaga,” na ta’ua e Susan. “Soo se mea lava matou te o i ai, matou te aai i mea o loo aai ai tagata o le lotoifale.” Mulimuli ane, i Iapani i le faaiuga o le faigamalaga, sa ta’u atu e Elder Gong

i ona atalii o loo ia aveina i latou i se faleaiga e lauiloa i le lalolagi mo fasipovi. Na tausamiina e ni atalii se toafa fiaai ma matua e toalua ni hamupeka e 17 i le McDonald!

“E tuuina atu e le Tina ma le Tama se faataua mauluga i le aoaoina e ala i aafiaga,” o le tala lea a Abraham. “E mafaufau loloto lava Tama i le ala e mamanu ai e aafiaga tagata, e aofia ai aganuu uma.” Na matauina foi e Abraham faapea o lona tama “e talanoa ma le faaeteete ona e tatau ona i ai se uiga ma ia talitonu atoatoa i mea o loo ia fai mai ai.”

E manatua e Sam “po o le a lava lona pisi i le Matagaluga a le Setete, e faavanoa lava e Tama le taimi i po uma e aoao ai a’u mo le tauvaga matematika a le vasega tolu lea na ou manao e tauva ai e ta’ua o le ‘Challenge 24’. Fai mai o ia afai ou te malo, e fai le matou pati i aisa kulimi sundae ma kulimi e 24 e tuu i luga o aisa kulimi.” Na oo Sam i le tauvaga faavaomalo ae e lei malo. Na ‘ai lava sundae a le aiga o Gong. Peitai e lei faigofie le mauaina o ni kulimi se 24 e tuu i luga o aisa kulimi—o se tasi o le beef jerky.

Na faaalia mai ni manatu o Christopher ma Matthew i le la “talisapaia [tele] o le faatuatuaaina, alofa ma le tuuto lea na tausoaina e lo latou tama ma lo latou tina.” O se alofa na faasoaina atu e Elder ma Sister Gong i le tasi ma le isi faapea foi i atalii taitoatasai ma le aiga lautele.



“E le gata i le avea ai ma se tamā tuuto, ae o Gerrit o se atalii ma se uso tuuto foi,” o le tala lea a Susan. “E taua na matafaioi ia te ia. Na te fesoasoani ia i matou ia malamalama o fegale-galeaiga faaleaiga e sili atu le taua nai lo mea uma lava.”

### Aafiaga o le Ekalesia

E ui e pisi i le galuega ma le aiga, ae e faa-  
auau pea ona naunau Elder Gong e auauna atu  
i le Ekalesia, faataunu valaauga o se fautua  
maualuga, taitai vaega o fiaaulaga sili, peresi-  
tene o le Aoga Sa o le siteki, faiaoga seminare,  
epikopo, peresitene o le misiona a le siteki,  
peresitene o le siteki, ma le Fitugafulu Eria.



Po o le a lava le mea e tofia o ia e fai, faa-  
pea foi i lona olaga faaleaiga, na te faataitaia  
pea e le aunoa ni uiga faapitoa. “Na te vaai  
atu i tagata uma o se atalii po o se afafine o  
le Tama Faalelagi,” o le tala lea a Sister Gong.  
“Ae e faasilisili i mea uma, o lona alofa i le  
Alii. E manao moni lava o ia ma lona loto atoa  
e fausia le malo ma faamanuia i fanau a le  
Tama Faalelagi.”

Ma e faamemelo atu i lona faletua. “Po o  
le a lava le mea e talosagaina a'u e fai,” na  
ia saunoa ai, “e i ai lava Susan i ou autafa. E  
fiafia lava o ia i soo se tagata ma taulai atu i isi



Mai le agavale: I  
Taialani, na feiloai ai  
Elder Gong ma le Afio-  
aga ia Francis Xavier  
Katinale Kriengsak  
Kovithanvannij, le  
Akiepikopo Katoliko  
o Bangkok. E fiafia  
Elder Gong i malaga  
taitoatasi ma ona  
atalii, e pei o le malaga  
lenei i kanata ma  
lona atalii o Sam. Na  
faasoa atu e Elder  
Gong ona manatu e  
uiga i le Areto o le Ola i  
faiaoga seminare ma le  
inisitituti i le 2017. Na  
faa ni feiloaiga a Sister  
Gong i le fale o se  
tagata lotu Kemupotia.

tagata. E naunau lava o ia e alu i nofoaga fou  
ma faataitai ni mea fou, lea ou te faafetai ai.”

### Auauna Atu ma Fitugafulu


I le aso 3 Aperila, 2010, na lagolago ai Elder  
Gerrit W. Gong o se Fitugafulu o le Pulega  
Aoao. Sa tofia o ia i le Au Peresitene o le Eria  
i Asia, o lona laumua e i Hong Kong. Na muli-  
muli ane avea ma Peresitene o le Eria o Asia. I  
le aso 6 o Oketopa, 2016, na lagolago ai Elder  
Gong i le Au Peresitene o Fitugafulu, lea na  
faaauau ai lona poto masani faavaomalo, e  
aofia ai iloiloga i eria i vaega eseese o le lalo-  
lagi e pei o Aferika ma Amerika Tutotonu.

“E te feiloai ma alofa i Au Paia i nei nofoaga  
uma,” na ia saunoa ai. “E te lagona le faamanu-  
aina i le i ai o tagata e ta'u atu ia te oe e uiga  
i la latou faatuatuaga, ona o lo latou aafiaga o  
le galue ai o le Atua i o latou olaga e avea ma  
se vaega o le iloaina po o ai le Atua ma le ala  
e alofa ai o Ia ia i latou taitoatasi.”

“Pe a matou auina atu Elder Gong i soo se  
tulaga, e lagona e i latou o loo aofia lo latou  
maualuga o se uo,” na saunoa ai Peresitene  
Russell M. Nelson. “E maualuga lona tulaga o le  
malamalama, ae e lotomaualalo o ia. E fesoottai  
ma tagata i soo se tulaga ma e saunia lelei ma  
le faatauanau i taimi uma.”

### Valaauga o se Apostolo

Ina ua tuuina atu e Peresitene Nelson le  
valaauga mo Elder Gong e auauna atu o se  
uso o le Korama a Apostolo e Toasefululua,  
“na tauaaoina [e le perofeta] o'u lima i ona  
ao, faatasi ai ma la'u pele o Susan i o'u autafa,  
ma tuuina mai le valaauga paia mai le Alii lea  
na ou le manava ai” (“Ua Toe Tu Mai le Alii,”  
*Liahona*, Me 2018, 97). Ma le lotomaualalo, ae  
na mautinoa lona alofa mo ma faalagolago i le  
Alii, na taliaina ai e Elder Gong le valaauga. Na  
lagolagoina o ia i le aso 31 o Mati, 2018. Ma le  
sauniaina lelei e le Alii, o le a ia auauna atu ai  
nei o se “[molimau] faapitoa i le suafa o Keriso  
i le lalolagi atoa” (MF&F 107:23). ■



Saunia e Elder  
Neil L. Andersen

O Le Korama  
a Apostolo e  
Toasefululuia

# ELDER ULISSES SOARES: O Se Tagata e aunoa ma le Faaoleole

**T**le amataga o Lana auaunaga, e pei ona filifiliina e Iesu Ana Apostolo, Na silasila atu o Ia ia Natanielu o loo agai mai ia te Ia. Na vave lava ona Ia silafaina le tulaga lelei o Natanielu, ma tautino atu, “Faauta o le Israelu moni, e leai sona pepelo!”<sup>1</sup>

Na silafia e Iesu o Natanielu o se tamalii e mama le loto, faamaoni i ona faamemoega, ma e aunoa ma le pepelo po o le faaoleole. E fafia le Alii i lenei uiga o le amiosao faamaoni, ma sa Ia valaauna Natanielu e avea ma se Apostolo.<sup>2</sup>

O Ulisses Soares e pei lava o Natanielu anamua, ma ua valaauna foi o ia e le Faaola.

## “O Le Malamalama a O’u Matua”

O Ulisses, o le uii o uso tama e toafa, sa soifua mai i São Paulo, Pasila, i le aso 2 Oketopa, 1958. E sau o ia mai se olaga faatauvaa, ae o ona matua, o Apparecido ma Mercedes Carecho Soares, o ni tagata faamaoni ma galalue malosi ia na faalogo moni lava i faifeatalai. Sa la auai i le Ekalesia i le 1965 ina ua ono tausaga le matua o Ulisses.

“Ou te lei vaai lava ua misi e Brother Apparecido se sauniga,” o le tala lea a Osiris Cabral, lea na auauna atu o se peresitene o le siteki ao avea Ulisses ma se alii talavou. “Sa matuai faamaoni lava foi Mercedes. E soo le tuuto o Ulisses i ona matua.”

Na fua mai le lelei o le loto o Ulisses ao ia aoaoina auala a le Alii. “Sa ou ola ae i le Ekalesia i le mulimuli ai i le malamalama a o’u matua,” na saunoa ai Elder Soares. Ao ia

mulimuli ai i lena malamalama, na tuputupu ae malosi lana molimau e ui i faigata.

“Sa na o a’u le tagata o le Ekalesia i la’u aoga, ma sa tau-mafai e le aunoa isi alii e toso atu a’u i lalo ma uunaia a’u e faia ni mea sese,” na ia saunoa ai. “Sa ou aoao e puipui lo’u lava tagata i nei luitau, ae ou te faalagolago pea e le aunoa i le Alii ma lo’u loto atoa e fesoasoani mai ia te a’u ina ia faamanuiaina. Sa ou aoaoina o se alii talavou afai e te faia lau vaega, o le a faia e le Alii Lana vaega. Ae e tatau ona e uumauina Lona aao ma Lana talalelei.”

Ina ua 15 Ulisses, na fai i ai lana epikopo e faiaoga i le vasega a le autalavou o le Aoga Sa. O se tasi o lesona sa ia aoao atu na taulai atu i le mauaina o se molimau e uiga i le





talalelei. Na suesue e Ulisses le Tusi a Mamona, ma na lagonaina e le aunoa e moni le Ekalesia, ma sa talitonu i le Faaola o Iesu Keriso.

Ao ia saunia lana lesona, sa ia manao e molimau malosi atu i lana vasega e uiga i le moni o le talalelei. “Sa ou suesue ma tatalo faatauanau,” na toe taua ai e Elder Soares. “Ina ua uma ona ou tootuli i lalo, na oo mai i lo’u loto se lagona fiafia tele, o se leo itiiti lea na faamaonia mai ia te a’u o loo ou i ai i le ala sa’o. Sa matuai malosi tele ma sa le mafai ona ou faapea atu sa ou le i iloaina.”

Ina ua matua Ulisses, sa ia aoaoina faapea afai o le a ia faia nisi mea e sili atu nai lo mea o loo faamoemoe mai po o talosagaina mai, o

O Ulisses Soares “na ola ae i le Ekalesia i le mulimuli ai i le malamalamama” a ona matua, o Apparecido ma Mercedes Soares (agavale). Ao faalagolago atu Ulisses i le Alii e ui i faigata, sa ia aoaoina o se tamaitiiti ina ia pipiimau atu i le Faaola ma Lana talalelei.

le a faamanuiaina tele o ia. O se tasi o ia lesona na oo mai ao ia saunia mo se misiona. I le taimi o faatalanoaga ma Ulisses, sa faamamafa atu e lana epikopo le taua o le usisitai i poloaiga ma le ola agavaa. Sa ia faamamafa atu foi ia sauniunga o mea tau tupe.

I lenei vaitaimi ua saofaga atu uma faifeatalai mai Pasila i le tau o a latou misiona, ma o le toatele o aiga o loo foai atu i le tau atoa [o misiona]. Ao agai atu Ulisses i tausaga faamisiona, sa ia naunau lava ina ia ona faigaluega e maua uma ai le tupe e manaomia mo lana misiona. O le faaaogaina o le tulaga o le galue malosi lea na ia aoaoina i le faigaluega ai i le tamai pisinisi a lona tama ma le faaauupega-  
ina i le tomai o le vave

ona talolomi, na maua ai e Ulisses se galuega e faigaluega i le ao e fesoasoani ai i le saunia-  
na o totogi a le kamupani.

Ina ua uma ona pasi se suega ulufale faigata, sa amata ona ia suesue i le tausitusi i se aoga maualuga faatekinolosi i le afiafi. O masina taitasi, pe a uma ona totogi le sefuluai, na te sefeina le tupe mo lana misiona. Ina ua mavae le tausaga, sa siitia atu o ia i le vaega tautusi a lana kamupani.

“O le auala lena na ou sefeina ai le tupe e totogi ai la’u misiona,” na saunoa ai Elder Soares. “Ma o masina taitasi i le gasologa o le tolu tausaga ae ou te lei aluese, ou te faatau-  
ina se mea ou te manaomiaina—o se ofutino,

ofuvae, pea totini, fusiua, se atopa'u." Sa ia manaomiaina foi, ma mauaina, le alofa ma le lagolago malosi mai ona matua ma taitai faalelotoifale.

Sa valaauna Ulisses i le Misiona a Pasila Rio de Janeiro. Sa auauna atu i le vaega maua-mua o lana misiona i lalo o Peresitene Helio da Rocha Camargo, lea na mulimuli ane avea ma uluai Pulega Aoao ua valaauna mai Pasila. Na amata e Ulisses lana misiona i le amataga o le 1978. O le uluai malumalu i Latina Amerika na faapaiaina mulimuli ane i lena tausaga i São Paulo e Peresitene Spencer W. Kimball (1895–1985).

Ia Ianuari 1980, na pue ai e Ulisses ma lana soa, lea e lei mauaina foi ana faaeeega paia, se pasi i Rio de Janeiro mo se tietiega e valu itula i le Malumalu o São Paulo Pasila. Sa feiloai matua ma tei o Ulisses ia te ia iina, ma faamuina ai le aiga o Soares mo le taimi nei ma le faavavau atoa. E lei gallo lava ia Ulisses le faatasi ai i le Malumalu o São Paulo i na itula e lima. Mulimuli ane i lena lava aso, sa la toe foi ai ma lana soa i le misiona.

## Faamuamuaina o le Atua

Na fiafia Ulisses i se misiona na faamanuia-inia, lea na faamalosia atili ai lana molimau. Ina ua ia toe foi i le fale, sa ia mauaina se galuega ma amata ona aoga faatausitusi ma faafuainumera i se iunivesite i le lotoifale.

Pe a ma le fitu masina talu ona i ai i le fale ae feiloai ai ma "Sister Morgado" i se siva mo siteki e tele. Sa auauna atu Ulisses e avea ma ona taitai sone mo se taimi, ma sa faaaluna e le toalua le afiafi e toe talanoa ai i le misiona. O le tolu vaiaso mulimuli ane, ua amata ona la tafafao faamasani.


E valu tausaga o Rosana Fernandes Morgado ae amata ona ave o ia e lona uso matua, o Margareth, i le lotu. Na iu lava, ina mauaina e tagata sailili faamaoni talavou e toalua le faatagana mai le la tama ina ia papatiso, ae na tatau ona faatali i la'ua uma sei atoa le 17

Na faafetaia e Elder Soares lona faletua, o Rosana, i "mea lelei uma i lo'u olaga." Sa faaipoipo le ulugalii i le 1982 (taumatau mamao), i le lua tau-saga i le mavae ai o se feiloaiga faafusei ina ua uma le la auaunaga i le Misiona a Pasila Rio de Janeiro.

tausaga. Na auai Rosana i le lotu mo le iva tau-saga ae lei mauaina le faatagana e papatiso ai.

Sa nofo Ulisses i São Paulo i matu, ae nofo Rosana ma ona matua i le vaega i saute o le aai. O le femalagaai ai i le va o aai e alu ai le lua i le tolu itula i le pasi ma le nofoaafi. O le mea e lelei ai, na nonofo Margareth ma lona toalua, o Claudio e latalata i le fale a ona matua.

"A alu la Ulisses i faaiguia o vaiaso e tafafao ma Rosana, sa faigata mo ia e toe foi i le fale i le leva o le po," na manatuaina e Elder Claudio R. M. Costa, o le Fitugafulu o le Pulega



O Elder Soares faatasi ai ma Rosana i le 2000 (luga); faatasi ai ma lona aiga (taumatau i lalo); ma o se faifeautalai faamisiona i le 1979 (taumatau i luga); ma se uso fou o Eliezer Wagner de Souza Santos ma lana uo ua maea le la faamau (ae ua avea nei ma ona faletua), o Regina. O Brother Santos o loo auauna atu o se peresitene o le Siteki a Vila Velha Pasila, i le setete o Espirito Santo. O Kim Pickett, o loo faaali mai i tua atu.

Aoao, e uiga i lona uso faaletulafono o le lumanaui. O lea, na la valaaulia ai ma Margareth Ulisses e moe i le la fale i le po pe a uma ana evaga. "Sa ma vaetamaina o ia mo sina taimi," na faaopoopo mai ai Elder Costa.

"E moe o ia i le nofoaumi i la matou poto malolo," o le tala lea a Sister Costa. "E lei leva ona ma faaipoipo, o le mea lena, na leai ai nisi a ma palanikeke. Ae sa ia ufiufiina o ia i se ie faamalamama tuai sa ia i ma'ua. Sa fiafia o ia aua sa mafai ona ia toe vaai ia Rosana i le aso na sosoo ai. Sa lelei o ia i lo'u uso, ma sa fiafia tele o'u matua ia te ia."

Sa faaipoipo Ulisses ma Rosana i le Malumalu o São Paulo Pasila i le aso 30 o Oketopa, 1982.

Afai e te faaaluina ni nai minute ma Elder ma Sister Soares, e vave lava ona e iloaina

le la alolofa, faamemelo ma le faaaloalo o le tasi i le isi. Mo Elder Soares, "sa avea lava [Rosana] o se faataitaiga o le agalelei, alofa, ma le tuuto atoatoa i le Alii mo a'u ma lo'u aiga."<sup>3</sup> Mo Sister Soares, o Ulisses "o se meaalofa mai le lagi."

Na toe faaopoopo mai Sister Soares: "E matuai magafagafa lelei o ia ma amiontonu, ma e tausia lelei e le aunoa lo matou aiga, ma e matuai lelei lava le taulimaina o a'u. I ana valaauga uma o le Ekalesia, na te faia le mea sili na te mafaia. Na te alu ma faia. Na te faamuamuaina i taimi uma o lona olaga mea a le Atua. Ou te faamemelo pea lava pea ia te ia ona ou te iloa afai na te faamuamuaina mea a le Atua, o le a ia faamuamuaina foi a'u."



E uiga i lona faletua, na saunoa ai Elder Soares: "O ia o le toa manumanu moni ma le faamalosiau i lo matou aiga. E alofa, agalelei, ma onosai i tagata uma. Na te faalotogatasia lo matou aiga, ma e na te vaai i le lelei i tagata uma. E tele lana sao i le mea ua tupu i lo'u olaga. E uiga i lo'u valaauga i le Korama a Aposetolo e Toasefululua, sa ou fai atu ma le malie ia te ia, "Ou te tuuaia oe mo lenei mea ona ua e matuai faalaauaiteleina le mana o le talalelei i lo'u olaga."

### O Se Loto Tele

O Gustavo, o le ulumatua a le au Soareses, e manatuaina le po ao, tamaitiiti, sa ia le usitai ai i ona matua ma alu atu ai e siaki se faafiafiaga e faia faaleausaga i le latou nuu o São Paulo e ta'ua o le Festa Junina.

"Sa ou i le ogatotonu o se vaega toatele ma fafia ae ou faalogoina loa le valaaquina atu o ia i luma e se tagata faasalalau," sa ia fai mai ai. "O le taimi lena na ou vaai atu ai i lo'u tama."

Na matuai popole lava ona matua, ae nai lo le otegia o Gustavo, na fusimau o ia e Ulisses.

"Sa faia se matou talanoaga e uiga i lo'u leiloa, ae na taulimaina a'u e o'u matua ma le faaaloalo," o le toe manatuaina lea a Gustavo. "Sa ou lagona le malupuipuia, ma sa ou iloa la te alolofa moni lava ia te a'u."

E tuuto atu Ulisses i lona aiga. E ui i le pisi o lana galuga ma taimi e faimalaga ai i le aluga o tausaga, sa ia faia lava se taimi e fausia ai fegalegaleaiga ma lana fanau.

Ina ua lagolagoina Elder Soares i le Korama a Aposetolo e Toasefululua i le aso 31 o Mati, 2018, masalo e leai se tasi na sili ona te'i nai lo Gustavo ma ona tuafafine e toalua, o Lethicia Caravello ma Nathalia Soares Avila. Ae afai o le alofa, galue malosi, agaalofa, ma le lotumaualalo e agavaa ai se tagata mo le avea ma aposetolo, latou te fai mai, ua latou malamalamā i le mafuaaga ua valaaquina ai e le Alii lo latou tama.

"Ina ua valaaquina e Iesu Ana Aposetolo, Na te lei pikina ia tagata Faresaio sili ona atamamai, sa ia pikina ia tagata faifaiva," o le tala lea a Lethicia. "E faapena uma lava lo'u tama ma lo'u tina. La te faalagolago atoa atu i le Alii, ma e Na te faaaogaina i la'ua e faataunu ai Ana galuega ona Na te silafaina o i la'ua o ni tagata e le manatu faapito, nau-nau e galulue malosi, ma lava le lotomaualalo e talia ai ni faasa'oga."



O le a fesoasoani le “tele o le loto” o le latou tama ao ia agai atu i luma e avea o se tasi o molimau faapitoa a le Faaola, na faaopoopo mai ai Nathalia. “Ua ia te ia le loto mo lena galuega,” o lana tala lea. “Na te lagonaina le faatosinaga faalelagi, ma e alofa o ia i tagata uma ma e manao e fai le mea sa’o.”

### **“O Le a Lelei Mea Uma”**

Ao auauna atu Elder Soares o se peresitene o le Misiona a Potukale Porto mai le 2000 i le 2003, sa iloa o ia mo le faaaogaina o le faaupuga “Tudo vai dar certo”—o le a lelei mea uma.

“Sa ia aoaoina mai ia i matou,” na toe taua ai e Ty Bennet, o se tasi o ana faifeautalai. “E ola ai lona olaga i le faatuatua ma le manatu lelei faapea afai tatou te faia le mea o finagalo mai le Alii tatou te faia, o le a lelei mea uma.”

Na ia aoaoina foi ana faifeautalai ia aua nei faaaogaina upu o le *faigata* po o le *le mafai*, o le tala lea a Richard Shelds, o se isi o ana faifeautalai. “Matou te faasino i mea o ni ‘luitau.’ Na fesoasoani lena fautuaga e mamanuina lo’u olaga ao ou tilotilo atu i mea o ni ‘luitau’ e foiaina nai lo o le avea o ni mea ‘faigata’ pe ‘le mafai.’”

O lea faatuatua ma le manatu lelei e lei sau mai se olaga faigofie. Na silafia lelei e Elder ma Sister Soares le le faanoanoa o le alu e aunoa ma, le ai vaivai mai le uumi o aso o galulue ma suesue ai, luitau o le le soifua maloloina, ma le lototiga ona o le pa’u o se pepe, fanau oti, ma le maliliu o tei ma matua.

Ae e ala atu i malaga o le olaga, sa la tuuina atu ai lo la faatuatua i upu o le mau e sili ona fiafia i ai Elder Soares: “Ia e lotomaualalo; ma o le a taitai ai oe e le Alii lou Atua i le lima, ma tuu mai ia te oe tali i au tatalo.”<sup>4</sup>

“O luitau o se vaega o lo tatou alualu i luma,” na sau-noa ai Elder Soares. “Ae pe a tatou onosai i mafatiaga, pe a tatou aoao e ola ai i luitau o le olaga, pe a tatou tumau

faamaoni, o le tausia i tatou e le Alii i se tulaga maualuga ma faamanuia i tatou i faamanuiaga ua Ia folafola mai.”

Ma pe a tatou taofimau i le ai uamea, na ia toe faaopoopo mai, o le a le tulafoaia i tatou e le Alii.

“O le taofimau pea lava pea i poloaiga, i le talalelei, i tusitusiga paia, ma i le Alii o Iesu Keriso o le a fesoasoani ia i tatou e foia luitau o le olaga,” o le molimau mai lea a Elder Soares. “Pe a tatou tootutuli i lalo e tatalo, o le a Ia faatasi mai ia i tatou ma o le a Ia taitaia i tatou. O le a Ia uunaia i tatou i le mea e o i ai ma le mea e fai. Pe a tatou usiusitai ma faamaualalo i tatou lava, o le a taliina mai e le Alii a tatou tatalo.”

### **Soo Tuuto**

O Ulisses Soares o se tamalii o le gafatia ma sauniuniga. O lana aoga, e aofia ai se failoga o le matuaofaiva o pisinisi faalepulega, na sauniaina o ia e galue o se tausitusi ma se suetusi mo ni kamupani o malo e tele i Pasila. Na saunia e lena aafiaga o ia e faigaluega i le matagaluega o tupe a le Ekalesia, lea na sauniaina o ia i le 31 tausaga e avea ma se tasi o faatonusili sili ona laitiiti i le matagaluega o mea totino [a le ekalesia]. Na saunia lelei o ia e lena sauniuniga e avea o se peresitene misiona ma i lana valaauga o se Fitugafulu o le Pulega Aoao i le aso 2 o Aperila, 2005.

Ao lei valaaufina o ia i le Au Peresitene o Fitugafulu i le aso 6 o Ianuari, 2013, sa auauna atu Elder Soares o se fesoasoani i lena taimi ma sa avea o se Peresitene o le Au Peresitene o le Eria a Pasila ma se fesoasoani i le Eria o Aferika i Sautesasae. O iina, na auauna atu o ia o se



fesoasoani ia Elder Dale G. Renlund, ao avea i lena taimi o se Fitugafulu o le Pulega Aoao. O Elder Renlund, i le taimi nei ua avea ai o se uso o le Korama a Apostolo e Toasefululua, e manatuaina pea ma le alofa le la taimi faatasi.

“O Elder Soares o se soo fiafia, talitonu, tuuto a Iesu Keriso,” na saunoa ai Elder Renlund. “Ou te le iloa se tasi e lagonaina le naunau o loo ia i ai i le feau a le Alii. Afai e talosagaina o ia e fai se mea, na te faia ma lona malosi atoa.”

Fai mai a ia na vave lava ona “faamemelo atu” Elder Soares ma le Au Paia i Aferika. O se

Po o i ai faatasi ma le Au Paia i Peru (agavale), Kana (lalo), po o isi atunu lea na ia auauna atu ai, e ‘faigofie ia ona alofa [Elder Soares] i tagata,’ na saunoa ai Elder Claudio R. M. Costa.



tasi o ana tofiga i le eria o le pulefaamalumalu i konafesi o siteki i Kananga, Ripapelika o le Temokarasi o Congo. “Ina ua ia toe foi ma, sa le muta lona talanoa e uiga i le agalelei ma tuutoo o tagata sa ia feiloai i ai,” na saunoa ai Elder Renlund.

O Elder L. Whitney Clayton, lea na galulue faatasi ma Elder Soares mo le lima ma le afa tausaga i le Au Peresitene o Fitugafulu, na ta’ua Elder Soares o se tagata e fausia le lotogatasi. “Na te faalogo ma fuaina ona manatu. E faaeteete o ia i le auala na te faafoeina ai o ia lava i sauniga ina ia mafai ona tuufaatasia o tatou leo i se tali, nai lo le tautauva taitoatasi.”

E ui i le pisi o lana galuega ma taimi o faatulagaina o femalagaaiga i le aluga o tausaga, e faamuamua lava e Elder Soares lona toalua, fanau, ma fanau a fanau (agavale pito i lalo) i lona olaga. Na te faaavanoa foi le taimi, e faatasi ai ma lona toalua, e avea ma se kuka faamanuiaina (agavale mamao).

O Elder Soares e tauagafau e uiga i lona tomai e fesootai atu ai i le faaPotukale, Igilisi, Sipaniolo, ma le faaFarani. Peitai o lena mea-alofa, lea e manaomia ai le gauai atu pea i ai, o se faamanuiaga i le Ekalesia, o le saunoaga lea a Elder Clayton. E mafai e Elder Soares ona talanoa i le vaega toatele o le Ekalesia i lo latou lava gagana.

“Sa avea Ulisses o se taitai talu mai ao laitiiti,” na matauina e Elder Claudio Costa e uiga i lona uso faaletulafono. “E atamai tele o ia ma e magafagafa lelei, ma e na te lagona le tiutetau-ave o le tuuina atu o le mea sili na te mafai. E faigofie lava ona ia alofa atu ia i latou o siomiaina o ia. Ua ia te ia le loto o se soo moni o le Faaola, ma ua ia te ia le molimau mautinoa o Iesu o le Keriso. Ou te alofa ia te ia ma ou te maua le agaga faafetai e lagolago ai o ia o se Apostolo a le Alii.”


Ma sa faaopoopo mai Elder David A. Bednar, o le saunoa ai mo le Korama a Apostolo e Toasefululua faapea, “O Elder Soares o se soo mama, le faaoleole, ma le sala a le Faaola. E ala atu i le malamalamo o ona foliga, o lana ataata mafana, ma ona uiga agalelei, o le a uunaia ai le le mafaitaulia o tagata ma aiga i se manaoga sili atu e mulimuli i le Faaola ma ola i mataupu o Lana talalelei.”

I la tatou tisipenisione, na fetalai atu ai le Alii e uiga ia Eteuati Paterika, o “Lona loto i o’u luma, ona ua faapei o ia o Natanielu o anamua, o le ua leai se pepelo o i ai.”<sup>5</sup> E uiga ia Ailama Samita, na fetalai mai ai le Alii, “o A’u, o le Alii, ua alofa ia te ia ona o le faamaoni o lona loto, ma ona e fiafia o ia i mea ua sa’o i o’u luma.”<sup>6</sup>

E uiga ia Ulisses Soares, o le a fetalai mai ai le Alii i lea lava faaupuga e tasi. ■

#### FAAMATALAGA

1. Ioane 1:47.
2. Tagai James E. Talmage, *Jesus the Christ* (1916), 217–18, 222.
3. “E Saunoa Perofeta i le Mana o le Agaga Paia,” *Liahona*, Me 2018, 98.
4. Mataupu Faavae ma Feagaiga 112:10
5. Mataupu Faavae ma Feagaiga 41:11
6. Mataupu Faavae ma Feagaiga 124:15



# O Mea e Mananao **Epikopo Uma** ia Iloa e Tagata o Lana Uarota

*O mea moni nei e valu ua ou aoaoina  
i le taimi sa ou galue ai o se epikopo.*

Saunia e Michael Meyers

**S**a ou maua se avanoa matagofie e avea ai o se epikopo. I na tau-saga, sa ou aoaoina ai nisi mau lesona e le mafai ona faamalaulau uma. Ae sa ou aoaoina ni upumoni se valu ou te talitonu e laugatasia ai epikopo uma. E ui o lenei lisi e le o aofia uma ai, ae o la'u taumafaiga i le faasoaina atu o mea e faamoemoe epikopo ia iloa e tagata o lana uarota.

## **1. E alofa le epikopo i tagata uma o lana uarota i se auala matuai moni lava.**

O le alofa o se epikopo mo lana uarota e fesootai ma le alofa o le Tama Faalelagi ma Iesu Keriso mo i tatou taitoatasi. A tilotilo atu se epikopo i tagata i se sauniga faamanatuga, e i ona luga le agaalofa ma le mutimuti alofa i se ala e le pei o soo se mea ua ia oo i ai. A tu i luga se epikopo ma faasoa atu le tele o lona alofa i tagata o lana uarota, e oo ifo i lona loto ona lagona ma e moni lava. Ia e iloa e alofa lou epikopo ia te oe, e popole mo oe, ma e manatu atu ia te oe e sili atu i lo le mea e te iloa.



## **2. O le epikopo e lagolagoina faale-tino, faalelagona, ma faaleagaga e le faatuatua ma tatalo a tagata o le uarota.**

E faaalu e se epikopo itula e le mafaitaulia e auauna atu ai. O le a tele taimi na te faaaluina i le falelotu i Aso Sa ma isi po o le vaiaso pe a manava mai galuega ma alu e asiasi, faatalanoaga, ma le vaaia o tagata o lana uarota.

E mafai e le epikopo ona faia i lenei vaiaso ma lea vaiaso ona o le faatuatua ma tatalo a tagata o le uarota. I le avea ai o se epikopo faatoa tofia, o taimi uma lava ou te faalogo ai i se tagata o le au paia o tatalo e "faamanuia le epikopo" e maligi ai lava ma le le mataofiofia o'u loimata. O a outou tatalo o le faatuatua e tali moni mai lava, ma e maua ma lagonaina e le epikopo le tosinaga lagolago a na tatalo. E tali mai e le Alii na tatalo e tumu i le faatuatua i luga o ulu o epikopo o le Eklesia.

## **3. E tele taimi e lagona ai e le epikopo lona le agavaa mo le valaauga (tusa lava pe ua tolu pe fa tausaga).**

Ua ou iloaina ni nai epikopo sa lagonaina ua latou "saunia" moni lava mo le valaauga. Peitai, ou te iloa "o le ua valaauina e le Alii, e faaagavaaina e le Alii."<sup>1</sup> E ui e iloa e se epikopo ua oo ina agavaa o ia, ae e tauivi lava foi ma lagona faapei o le a le mafai lava e ia ona faia lelei le valaauga. O le a ia faia le mea sili e avatu ai fautuaga poto pe a manaomia, ia le faatiga ai i tagata, ma ia maua le Agaga, ae o le a taumanatunatu foi i nisi taimi pe o ia faataunuina lelei lona valaauga.

#### **4. E mafai e le Agaga o le Atua ona galue e ala i le epikopo pe a ia fefautuaai ma tagata o le uarota.**

Ina ua fesiligia au pe o le a le mea e sili ona ou misia i le avea ai o se epikopo, ou te fai atu i tagata ou te misia le tosinaga malosi o le Agaga lea e aumai faatasi ma le tiutetauave o se epikopo. Pe o faamafanaina i latou o e ua maliliu nisi e pele, talanoa ma i latou o tauivi ma ni toalua e le faamaoni, pe taloina tagata ia salamo, o le Agaga e maua e se epikopo faamaoni o le Agaga o le Atua ma o le agaga o faaliga.

Talu ai nei sa fesili mai ai se tagata sa i ai i le uarota mo se fesoasoani i le taulimaina o ni nai faafitauli patino. Ua masii atu o ia i se tasi uarota ma sa lei mautinoa pe fia alu i lona epikopo fou mo se taitaiga. Sa ou faamatala atu ia te ia le mea sa ou faasoa atu mo le tele o taimi talu ona faamalolo a'u, e faapea e ui ina sa ou fiafia e fesoasoani atu, ae ua ou le o toe umia ki e umia e se epikopo ma o na ki e mafai ona taua mo le tuuina atu o le lagolago sa ia manaomia. Sa ou fautuaina lona alu e talanoa ma lona epikopo. Sa ma talanoa ma ia i le lua vaiaso mulimuli ane, ma sa ia fai mai e lei feiloi lava ma lona epikopo ma e foliga mai ua uma ona ia iloa lona faafitauli ma le ala sili e mafai ona fesoasoani ai ia te ia. E ui ina mafai ona vaivai le epikopo, ae e musuia o ia e le Alii, taiala o ia, ma faamanuiaina olaga e ala i ana fautuaga musuia.



#### **5. O le epikopo o le tagata soifua; o nisi taimi e i ai ona sasi ao nisi foi taimi na te faia ai mea sese.**

O epikopo, e ui i o latou valaauga, o tagata soifua. E i ai o latou le atoatoa, o vaivaiga, o faaitauau, ma a latou lava faafitauli faaletagata lava ia. E faaagavaaina e le Agaga le alii e umia le tofi o le epikopo, ae o le epikopo o se tagata lava e mafai ona i ai faatfiauli lava e tasi ma vaivaiga e feagai ma i tatou uma.

O lea malamalama e le tatau ona faaititia ai le faaaloalo tatou te faaalia i lona valaauga po o le uai atu i ana fautuaga. E silafia lelei lava e se epikopo ona vaivaiga ma e taumafai e faatoilalo pe faapafala ese mai lana auau-naga o se epikopo. Po o le a lona taumafai malosi, o le a le atoatoa lava o ia.

#### **6. E lagonaina e le epikopo e le taitai lava lona vaai i tagata o le uarota fo lava foi ni mea lelei na te faia i ai.**

O aso uma lava e taumanatunatu ai le epikopo po o ai se isi e mafai ma sa tatau ona ia fesoasoani i ai i lena aso. Semanu ou te fiafia lava e asiasi soo i tagata uma, ae ou te faigaluega tumau, o lo'u aiga, o le polokalama a le autalavou, ma e i ai ni tagata patino o le uarota e tele o latou manaoga. Sa matuai le lava lava le taimi e vaai ai i tagata uma i se tulaga faifai pea.

Ae ui o lea, i le avea ai o se epikopo, o nisi taimi sa uunaia ai au e le Agaga e asiasi i se tagata patino o loo feagai ma tauiviga. E tele taimi, e amata ai na asiasiga i lo latou fai mai, "Na ou iloa lava o le a e sau." O le Agaga sa matou lagonaina e lofituina a o taufai iloaina o lea asiasiga o se faamaoniga e tali mai le Atua i tatalo.

Sa ou fiafia lava foi i taimi uma i le taliaina o au i faitotoa o tagata malolosi, o le uarota "e malolosi molimau." O nei tagata lelei e o i le lotu i vaiaso taitasi, tautua ma le faamaoni i valaauga, e leai ni luitau tele e vaaia, ma e masani lava e le asia soo e taitai perisitua. Sa latou faafetai i le maua o ni nai taimi e faafesagai taitoatasai ai ma lo latou epikopo. Ia te outou uma tau ina ia ou faapea atu: "Faafetai! Ia tumau pea! Ia iloa e alofa lou epikopo ia te oe ma semanu e asiasi soo atu pe ana mafai e ia."

## **7. E manaomia moni lava oe, ma le faamaoni, tou te auauna atu o le tasi ma le isi.**

I le avea ai o se epikopo, soo se taimi lava e ta'u mai ai e i ai se tagata o le au paia o loo feagai ma ni faigata, ou te fesili pea lava, "O ai faiaoga o aiga ma faiaoga asiasi?" O se tasi lea o auala o le iloiloga o le a faafetaiaia ai manaoga mo se taimi puupuu ma se taimi umi o tagata o le au paia. O le epikopo, e galue e aunoa ma se fesoasoani mai isi tagata o le uarota ma le siteki, e utiuti ana punaoa. E matuai mafai lava e ia—ma o le a—alu e asiisi i tagata i se tulaga faaletonu. Ae faatasi ai ma punaoa faaleperisitua ma le Aualofa o loo avanoa mo ia, e mafai ai ona faalau-tele atu lona aapa atu.

O le mea lea e igoa o le auaunaga. E i ai taimi e galo ai i nisi o i tatou le mafuaaga tatou te auauna atu ai i le tasi ma le isi: Ua poloaiina i tatou e le Alii ia "tatou fealofani" (Ioane 13:34). Ia iloa e faaaoga e lou epikopo le auaunaga o se ala musuia e "i ai atili" i olaga o tagata o le uarota.



## **8. E moomoo le epikopo maimau e pe ana mafai e ia ona faia uma mo lana lafu.**


Soo se taimi, i le ao ma le po, pe o se faamanuiaga faaleperisitua, fautuaina o se tamaitiiti ua se ese, po o le faanatinati atu i se faalavelave faafuasei, e fia manao lava e faia soo se mea e manaomia e tagata o le uarota. E le mafai ona ia faia uma i taimi uma, ma atonu foi e le o ia le tagata tonu i tulaga uma, ae aua e te fefe e fesili atu i ai mo se fesoasoani pe a e manaomiaina. Ia e iloa o loo i ai iina le epikopo e auauna atu i na taimi ma e taufai faamanuiaina tele oulua i le galulue faatasi.

Ua matuai faalotomaualaloina lava au i le avanoa paia sa ou maua e auauna ai i lenei valaauga paia. I la'u auaunaga, sa ou alu atu mai se talitonuga i se malamalamā. Ua ou le toe talitonu nei faapea e moni le talalelei; ua ou iloa e moni. Ua ou le toe talitonu faapea e silafia au e le Atua; ua ou iloa e silafia lelei e le Atua i tatou taitoatasi, o o tatou olaga i aso taitasi ma a tatou tauiviga faaletagata lava ia. E le gata i lea, ua ou iloa e galue o ia e ala i Ana auauna, aemaise o i latou o e umia ki o le perisitua. Ua ou iloa semanu e le mafai ona avea au o se epikopo e aunoa ma le silafia lelei e le Atua o lenei galuega. O le moni o le talalelei ma le alofa o le Atua mo Ana fanau ua mafai ai e epikopo uma ona galulue. ■

*E alala le tusitala i Iuta, ISA.*

### **FAAMATALAGA**

1. Thomas S. Monson, "Tiute o Valaauga" *Liahona*, Iulai 1996, 51.







## MATAUPU 8

# O Le Tula'i A'e o le Ekalesia a Keriso

*O le mataupu 8 lenei o se faamatalaga fou e fa-voluma o le talafaasolopito o le Ekalesia ua faaaatuina Au Paia: O Le Tala o le Ekalesia a Iesu Keriso i Aso e Gata Ai. O le a maua lenei tusi ua lolomiina i gagana e 14, i le vaega o le Talafaasolopito o le Ekalesia o le polokalama o le Gospel Library, ma i le initonet i le saints\_lds.org O mataupu na muamua atu sa lolomiina i lomiga muamua atu ma o loo maua i gagana e 47 i le polokalama o le Gospel Library app ma i le aupaea\_lds.org.*

**T**le amataga o Iulai 1828, faatasi ai ma tusitusiga i lona lima, sa iloa ai e Iosefa na finagalo le Alii e lolomi le Tusi a Mamona ma faasalalau atu lana savali i le mamao e gata ai. Ae peitai, sa lei masani o ia ma lona aiga i le pisinisi o le lomitusi. Sa ao ona ia tausia le saogalemu o tusitusiga, saili se falelomitusi, ma sue se auala e oo atu ai le tusi i lima o ni tagata ua naunau e manatu i ai o se tusitusiga paia fou.

O le lolomiina o se tusi e pei o le Tusi a Mamona o le a le taugofie foi. Sa lei faaleleia mea tautupe a Iosefa talu ona ia amataina le faaliliuga, ma o tupe uma sa ia maua sa tausi a'i lona aiga. Sa moni foi lena mea e tasi mo ona matua, sa avea pea ma ni faifaatoaga matitiva sa galueaiina le fanua sa latou le umiaina. Sa na o le pau le uo a Iosefa sa mafai ona faatupeina le galuega, o Matini Harisi.

Sa vave ona galue Iosefa. Ae na te lei faamaeaina le faaliliuga, sa ia failaina le puletaofia o le tusi e puipuia ai tusiga mai soo se tasi e ono gaoia pe kopiina.<sup>1</sup> Faatasi ai ma le lagolagosua a Matini, sa amata foi ona saili e Iosefa se tagata lomitusi e malie e lolomiina le tusi.

Sa la o atu muamua ia Egbert Grandin, o se lomitusi i Palamaira sa tupulaga lelei ma Iosefa. Sa vave lava ona teena e Grandin le talosaga, ona sa talitonu o le tusi o se taufaasese. I le le faavaivai, sa saili atu ai pea Iosefa ma Matini ma maua ai se lomitusi naunau i se aai lata ane. Ae a o lei taliaina lana ofo, sa la toe foi atu i Palamaira ma toe fesili tasi atu lava ia Grandin pe na te fia manao e lolomi le tusi.<sup>2</sup>

O le taimi la lea, sa foliga mai ai na naunau atili Grandin e fai le galuega, ae sa ia manao ina ia totogi atu le \$3,000 e lolomi ai ma tuufaatosi kopi e lima afe ae na te lei amataina le galuega. Ua uma ona folafola atu e Matini e fesoasoani e totogi le lolomiga, ae o le mauaina o lena ituaiga o tupe, sa ia iloa ai na te ono moomia ona

mokesi lana faatoaga. Sa avea ma se avega mamafatu mo Matini, ae sa ia iloaina sa leai ma se tasi o isi uo a Iosefa na mafai ona fesoasoani ia te ia i le tupe.

I le popole ai, sa amata ona fesiligia e Matini le atamai o le faatupeina o le Tusi a Mamona. Sa ia te ia se tasi o faatoaga sili ona lelei i lea nofoaga. Afai na te mokesiina lona fanua, e ono goto atu ai. O le tamaoaiga na faaalu ai lona olaga i le faaputuina e mafai ona mou atu i sina taimi puupuu pe afai e le taulia tele le Tusi a Mamona.

Sa ta'u atu e Matini ia Iosefa ona popolega, ma sa talosaga ina ia saili atu mo se faaaliga mo ia. O le tali mai, sa fetalai atu ai le Faaola e uiga i lana osigataulaga e fai le finagalo o Lona Tama, tusa lava po o le a le tau. Na Ia faamatalaina Lona puapuagatia tele a o totogiina le tau mo agasala ina ia mafai ona salamo tagata uma ma ia faamagaloina. Ona Ia poloaiina lea o Matini ina ia taulagaina ana lava faasiliga ina ia faataunu ai le fuafuaga a le Atua.

"Aua ne'i e manumanu i au lava meatotino," sa fetalai atu ai le Alii, "a ia foai fua atu mo le lomiga o le Tusi a Mamona." O loo i ai i le tusi le afioga moni a le Atua, sa faamautinoa atu ai e le Alii ia Matini, ma o le a fesoasoani i isi ia talitonu i le talalelei.<sup>3</sup>

E ui atonu o le a le malamalama ona tuaoi i lana faaiuga, ae sa usitai pea Matini i le Alii ma mokesi lana faatoaga e faamau ai le totogi.<sup>4</sup>

Sa sainia e Grandin se konekarate ma amata loa ona faatulaga le galuega telē na'uā.<sup>5</sup> Sa faaliliuina e Iosefa le anotusi o le Tusi a Mamona i totonu o le tolu masina, sa fesoasoani i ai le tusiupu e toatasi i le taimi e tasi. O le a faaalu ai e Grandin ma ni alii se toasefululua le fitu masina e lolomi ai ma tuufaatasi uluai kopi o le galuega e 590-itulau.<sup>6</sup>

Faatasai ai ma se tagata lomitusi sa faafaigaluegaina, sa toe foi atu ai Iosefa i Haramoni ia Oketopa 1829 e galue i lana faatoaga ma faatasai ma Ema. O le taimi lea sa vaaia ai e Oliva, Matini, ma Ailama le lolomiga ma auina atu ia Iosefa talafou e le aunoa i le faagasologa o le galuega a Grandin.<sup>7</sup>

I le manatuaina ai o le faanoanoa na ia lagonaina i le

taimi na leiloloa ai uluai itulau na ia faaliliuina, sa talosaga atu ai Iosefa ia Oliva e fai ni kopi o tusitusiga o le Tusi a Mamona mai lea itulau i lea itulau, ma fai se kopi tutusa lelei e ave i le falelomitusi ina ia mafai ona faaopoopo i ai faailoga upu ma le faatulagaga o le tusiga.<sup>8</sup>

Sa fiafia Oliva e kopi le tusi, ma o mataitusi sa ia tusia i lea taimi sa faatumulua i faaupuga mai le faaliliuga. I le faataitai ai ia Nifae, Iakopo, ma Amoleka mai le Tusi a Mamona, sa tusi atu ai Oliva ia Iosefa e uiga i lona lotofaafetai mo le Togiola e le i'u a Keriso.

"Ina ua amata ona ou tusitusi e uiga i le alofa mutimutivale o le Atua," sa ia ta'u atu ai ia Iosefa, "sa ou le iloa po o fea e taofi ai, ae sa le lava le taimi ma pepa."<sup>9</sup>

O lena lava agaga e tasi na tosina atu ai isi i le Tusi a Mamona a o lolomiina. O Thomas Marsh, o se tagata sa aoaoina faalomitusi muamua, sa taumafai e saili se tonu mo ia i isi lotu, ae leai ma se tasi na foliga mai na tala'iina le talalelei na ia mauaina i le Tusi Paia. Sa ia talitonu o se lotu fou o le a le pine ae tula'i a'e na te aoaoina le upumoni toefuataiina.

O lena taumafanafana, sa lagona ai e Thomas le taitaiina e le Agaga e faimalaga i le faitau selau o maila mai lona aiga i Boston e alu atu i Niu Ioka i sisifo. Sa ia nofo i lena eria mo le tolu masina ae lei toe taliu atu i le aiga, sa le mautonu pe aisea na ia malaga mamao ai. Peitai, i se malologa i lona toe foi atu, sa fesili atu ai le na talimalo ia te ia pe na faalogo e uiga i le "tusi auro" a Iosefa Samita. Sa ta'u atu e Thomas i le fafine e leai, ma lagona le uunaia o ia e fia iloa atili.

Sa ia ta'u atu ia [Thomas] e tatau ona ia talanoa atu ia Matini Harisi ma faasino atu o ia i Palamaira. Sa faanatinati atu loa Thomas iina ma maua atu ai Matini i le falelomitusi o Grandin. Sa tuu atu e le lomitusi ia te ia itulau e sefuluno o le Tusi a Mamona, ma alu ai loa Thomas ma ave i Boston, sa naunau e fia faasoa atu le tofo fou o lenei faatuatua fou i lona toalua, o Elizabeth.

Sa faitauina e Elizabeth ia itulau, ma talitonu ai foi o ia o le galuega lava lea a le Atua.<sup>10</sup>

O lena tautoulu, a o tulaga lelei pea le agai i luma o le lomiga o le Tusi a Mamona, o se tagata na avea muamua

ma faamasino e igoa ia Abner Cole na amata faia ni lomiga i se nusipepa e uiga i le falelomitusi o Grandin i Palamaira. I le galue ai i le falelomitusi i le po, pe a ò uma i le fale le aufaigaluega a Grandin, sa mafai ona maua e Abner ia itulau ua uma ona lolomi mai le Tusi a Mamona, ia e lei tuufaatasia pe ua saunia foi e faatau atu.

Sa vave ona amata tala faaamuamu i le "Tusi Paia Auro" i lana nusipepa, ma i le taimi o le taumalulu sa ia lolomiina ai ni tala mai le tusi faatasi ma ni faamatatalaga faaamuamu.<sup>11</sup>

Ina ua iloa e Ailama ma Oliva le mea sa faia e Abner, sa la talanoa i ai. "O le a lau aia ua e lolomi ai le Tusi a Mamona i lenei auala?" Sa fesili atu ai Ailama. "E te le iloa ua matou mauaina le puletaofia?"

"E leai sau feau," sa fai atu ai Abner. "Ua ou faafaiga-luegaina lomitusi ma ou te lolomiina soo se mea ou te manao ai."

"Ua ou faasaina oe ona toe lolomi soo se mea o lena tusi i lau pepa," sa fai atu ai Ailama.

"Ou te le kea," sa fai atu ai Abner.

I le le mautonu ai po o le a le mea e fai, sa auina atu ai e Ailama ma Oliva se feau ia Iosefa i Haramoni, lea na toe foi vave atu ai o ia i Palamaira. Sa ia mauaina Abner i le ofisa lomitusi, o faitau faasamasamanoa lana lava nusipepa.

"Foliga mai o loo e galue malosi," sa fai atu ai Iosefa.

"O a mai lau susuga Samita," sa tali fiamalo atu ai Abner.

"Lau susuga Cole," sa fai atu ai Iosefa, "o le Tusi a Mamona ma le aia e lolomi ai e ā a'u lea, ma ua ou faasaina oe ona e faalavelave i ai."

Sa togi ese a Abner lona pulupulu ma afe i luga lima o lona ofutino. "E te fia fusu alii?" sa ia oso atu ai ma uu ana moto. "A e fia fusu ona e sau lea."

Sa ataata Iosefa. "E sili ai pe a fai pea lou pulupulu," sa ia fai atu ai. "O lea e malulu ma ou te le fia fusu ia oe." Sa ia fai atu lemu pea, "Ae e tatau ona tuu lou lolomiina o la'u tusi."

"Afa i te manatu e te sili," sa fai atu ai Abner, "ia se'i tatala la lou pulupulu ae faataitai."

"O loo i ai le tulafono," sa tali atu ai Iosefa, "ma o le a e iloa lava pe afa i te lei iloaina muamua. Ae ou te le fia fusu ia oe, aua e leai ma se aoga o lena mea."

Sa iloa e Abner e sese le itu o le tulafono lea e i ai. Sa ia toofilemu ane ma lē toe lolomiina ni faamatatalaga mai le Tusi a Mamona i lana nusipepa.<sup>12</sup>

O Solomona Chamberlin, o se failauga sa malaga atu i Kanata, sa muai faalogo e uiga i le "Tusi Paia Auro" mai se aiga sa ia nofo ai e latalata i Palamaira. E pei foi o Thomas Marsh, sa ia sau mai lea lotu i lea lotu i lona olaga atoa ae sa ia lagonaina le le faamalieina i mea sa ia vaaiia. O nisi ekalesia na latou tala'iina mataupu faavae o le talalelei ma talitonu i meaalofa faaleagaga, ae sa le'i ia i latou ni perofeta a le Atua po o Lana perisitua. Sa lagona e Solomona ua oo mai le taimi o le a aumai ai e le Alii Lana ekalesia.

A o faalogologo atu Solomona i le aiga o talanoa e uiga ia Iosefa Samita ma papatusi auro, sa ia lagonaina le maniti atoa o lona tino mai le ulu i tamaivae, ma sa tonu ai loa ia te ia e saili le au Samita ma aoao atili e uiga i le tusi.

Sa ia alu atu i le fale o Samita ma feiloai ai ma Ailama i le faitotoa. "Ia manuia lenei fale," sa fai atu ai Solomona.

"Ou te faamoemoe o le filemu," sa fai atu ai Ailama.

"O i ai se isi i i," sa fesili ai Solomona, "e talitonu i miti ma faaaliga?"

"Ioe," sa fai atu ai Ailama, "o i matou o se aiga tali faaaliga."

Sa faamatala atu e Solomona ia Ailama se faaaliga na ia vaai i ai i ni tausaga na muamua atu. I lena faaaliga, sa fetalai atu ai se agelu e le o i ai se ekalesia a le Atua i le lalolagi ae o le a le pine ae tula'i a'e se tasi o le a i ai le mana e pei o le ekalesia a aposetolo anamua. Sa malamalamama Ailama ma isi sa i ai i le fale i le mea sa fai atu ai Solomona ma fai atu ia te ia latou te talitonu foi i lea mea e tasi.

"Ou te momoo maimau pe ana tou faailoaina nisi o mea ua outou iloaina," sa fai atu ai Solomona. "Ou te manatu e mafai ona ou molimau atu."

Sa valaaulia e Ailama o ia e nofo i le faatoaga a Samita o se malo faaaloalogia ma faaali atu ia te ia tutsusiga a le Tusi a Mamona. Sa suesue ai Solomona mo aso e lua ma o atu ma Ailama i le ofisa lomitusi o Grandin, lea sa tauaao atu i ai e le lomitusi ia te ia ni itulau se ono sefulufa. Faatasi ai ma itulau e lei faapipiina i lona lima, sa faaauau ai le malaga a Solomona i Kanata, ma tala'i atu mea uma na ia iloa e uiga i le faatuatuaga fou i luga o le ala.<sup>13</sup>

E oo ane i le aso 26 Mati, 1830, ua uma ona faapi-piina uluai kopi o le Tusi a Mamona ma maua mo le faatauina atu i le fogafale muamua o le ofisa lomitusi o

Grandin. Sa faapipiina mau i se pa'upovi enaena ma le manogi o se pa'u (leather) ma le kelū, pepa ma le vaitusi. O faaupuga *Tusi a Mamona* na alia'e mai i luga o le tuasivi i mataitusi auro.<sup>14</sup>

Sa faapelepele e Lusi Samita le tusitusiga paia fou ma vaai i ai o se faailoga o le a le pine ae faapotopoto e le Atua Lana fanau ma toefuatai mai Lana feagaiga anamua. O le itulau autu o loo tautino mai ai o le faamoemoega o le tusi o le faaali atu lea o mea tetele na faia e le Atua mo Lona nuu i le tuanai, ma tuuina mai faamanuiaga lava e tasi i Lona nuu i aso nei, ma faatalitonu le lalolagi atoa o Iesu Keriso o le Faaola o le lalolagi.<sup>15</sup>

I le pito i tua o le tusi o loo i ai tautinoga a Molimau e Toatolu ma Molimau e Toavalu, o loo ta'u atu i le lalolagi na latou vaai i papatusi ma iloa e moni ia faaliliuga.<sup>16</sup>

E ui lava i nei molimau, ae sa iloa lava e Lusi e manatu pea nisi tagata o lenei tusi o se talafatu. E toatele ona tuaoi sa talitonu ua lava lava le Tusi Paia mo latou, ma le le iloaina ua faamanuiaina e le Atua isi malo e sili atu nai lo le tasi i Lana afioga. Sa ia iloa foi, sa teena e isi tagata le savali a le tusi ona na latou talitonu sa na o le faatasi lava ona fetalai mai le Atua i le lalolagi ma e le toe fetalai mai.

Mo nei mafuaaga ma isi, sa lei faatauina ai e le toatele o tagata i Palamaira le tusi.<sup>17</sup> Ae sa suesueina e isi ona itulau, ma lagonaina ai le mana o ana aoaoga, ma tootutuli atu ai ma ole i le Alii pe moni. Sa iloa e Lusi lava ia o le Tusi a Mamona o le afioga a le Atua ma manao ai ina ia faasoa atu i isi.<sup>18</sup>

Toetoe lava i le mavae ai o le lolomiina ma le faasalaunuina o le Tusi a Mamona, sa saunia ai Iosefa ma Oliva e faatulaga le ekalesia a Iesu Keriso. I ni masina na muamua atu, sa faaali atu ai apostolo anamua o Peteru, Iakopo, ma Ioane ia i laua ma faaee atu ia i laua le Perisitua Mekisateko, e pei ona folafola atu i ai e Ioane le Papatiso. O le pule faaopoopo na faatagaina ai Iosefa ma Oliva e faaee atu le meaalofa o le Agaga Paia ia i latou na la papatisoina. Sa faauuina foi i laua e Peteru, Iakopo, ma Ioane e avea o ni apostolo a Iesu Keriso.<sup>19</sup>

Pe tusa o lena lava taimi, a o nonofo ai i le fale o Uitimera, sa tatalo ai Iosefa ma Oliva mo se malamalama atili e uiga i lenei pule. I se tali, sa poloaiina ai e le siufogoa o le Alii i laua e faauu e le tasi le isi o se toeaina o le ekalesia, ae faatali se'i vagana ua malilie ē talitonu e mulimuli ia i laua o ni taitai o le ekalesia a le Faaola. Sa ta'u atu foi ia i laua e faauu isi taitai o le ekalesia ma faaee atu le meaalofa o le Agaga Paia ia i latou na papatisoina.<sup>20</sup>

I le aso 6 o Aperila, 1830, na feiloai ai Iosefa ma Oliva i le fale o Uitimera e mulimuli i le poloaga a le Alii ma faatulaga Lana ekalesia. Ina ia mulimultaia ma faamalieina le tulafono, sa latou filifili ai e avea ma uluai tagata o le ekalesia fou. Pe tusa ma le fasefulu tamaitai ma alii sa taufaaofiofi i si tamai

fale e molimauina le faamoemoe.<sup>21</sup>

I le usiusitai ai i uluai faatonuga a le Alii, sa talosaga atu ai Iosefa ma Oliva i le potopotoga ina ia lagolagoina i laua o ni taitai i le malo o le Atua ma faailoa atu pe ua latou talitonu sa sa'o mo i laua le faatulagaina o se ekalesia. Sa malilie uma i ai tagata o le potopotoga, ma faaee atu ai loa e Iosefa ona lima i luga o le ao o Oliva ma faauuina o ia o se toeaina o le ekalesia. Ona la fesuiai lea o tulaga ma faauu ai e Oliva ia Iosefa.

Ina ua mavae lena, sa la faamanuiaina le areto ma le uaina o le faamanatuga e manatua ai le Togiola a Keriso. Ona la faaee lea o o la lima i luga o i latou na papatisoina, ma faamauina i latou o ni tagata o le ekalesia ma tuu atu ia i latou le meaalofa o le Agaga Paia.<sup>22</sup> Sa liligi mai le Agaga o le Alii i luga o i latou sa i le fono, ma sa amata e nisi sa i ai i le potopotoga ona vavaloo. O isi sa vivii ae i le Alii, ma sa olioli faatasi tagata uma.

Sa maua foi e Iosefa le uluai faaaliga na faatatau i le tino atoa o le ekalesia fou. "Faauta, ia i ai se tala faamaumau e tausia i totonu o outou," sa poloai mai ai le Alii, ua faamanatu mai ai i Lona nuu e ao ona latou tusia a latou talafaa-solopito paia, ma faasaoina se tala o a latou galuega ma fai ma molimau i le matafaoio a Iosefa o se perofeta, tagatavaai, ma talifaaaliga.

"O ia ua ou musuia, na te uunai le faamoemoe o Siona i le mana malosi tele mo le lelei," sa tautino mai ai le Alii. "Aua o lana upu o le a outou maua, e pei ua alu atu mai lo'u lava gutu, i le onosai ma le faatuatua atoa.

Ona o le faia o nei mea o le a le manumalo ai faiotaoa o seoli ia te outou.”<sup>23</sup>

Mulimuli ane, sa tu Iosefa i talaane o se vaitafe ma molimaunia le papatisoga o lona tina ma lona tamā i le ekalesia. Ina ua mavae tausaga o ala eseese sa uia i la latou sailiga mo le upumoni, sa i'u ina latou soofaatasi i le faatuitua. A o alu ese mai Iosefa le matua mai le vai, sa aapa atu Iosefa ma uu mai lona lima ma fesoasoani ia te ia i luga o le auvai, ma opo mai o ia.

“Lo’u Atua e,” na ia alaga atu ai, a o sulu atu ona foliga i le fatafata o lona tama, “Ua ou ola e vaai i lou tama ua papatisoina i le ekalesia moni a Iesu Keriso !”<sup>24</sup>

I lena afiafi, sa sola ese atu ai Iosefa i totonu o se togavao lata ane, ma lona loto sa taumasuasua i lagona ootia. Sa ia manao ina ia tuua na o ia, e le iloa mai e uo ma aiga. I le sefulu tausaga talu mai lana Uluai Faaaliga Vaaia, sa ia vaaia ai ua matala mai le lagi, lagonaina le Agaga o le Atua, ma sa aoaoina e agelu. Sa ia agasala foi ma aveesea ai lana meaalofa, ae sa na o le salamo, na toe maua ai le alofa mutimutivale o le Atua, ma faaliliu ai le Tusi a Mamona e ala i Lona mana ma le alofatunoa.

O lea la ua toefuataiina e Iesu Keriso Lana ekalesia ma faatagaina Iosefa i le perisitua lava e tasi lea na umia e aposetolo anamua a o latou avatua le talalelei i le lalolagi.<sup>25</sup> O le fiafiaga na ia lagonaina sa matua lofituina mo ia e mataofiofia, ma ina ua maua atu o ia e Iosefa Knight ma Oliva mulimuli ane i lena po, sa tagi o ia.

Sa tumu lona olioli. Ua amatalia le galuega.<sup>26</sup> ■

O se lisi atoa o galuega ua taua ua maua i le Igilisi i le saints.lds.org. O le upu Autu i faamatalaga ua faaalia ai faamatalaga faoopoopo i le initoneti i le aupaia.lds.org.

#### FAAMATALAGA

1. Copyright for Book of Mormon, June 11, 1829, i le *JSP*, D1:76–81.
2. “Prospect of Peace with Utah,” *Albany Evening Journal*, May 19, 1858, [2]; “From the Troy Times,” *Albany Evening Journal*, May 21, 1858, [2]; John H. Gilbert, Memorandum, Sept. 8, 1892, photocopy, Church History Library.
3. Mataupu Faavae ma Feagaiga 19 (Revelation, circa Summer 1829, i le josephsmithpapers.org); tagai foi Historical Introduction to Revelation, circa Summer 1829 [DC 19], in *JSP*, D1:85–89; ma le Knight, Reminiscences, 6–7.
4. McBride, “Sao o Matini Harris,” 1–9; Joseph Smith History, 1838–56, volume A-1, 34, i le *JSP*, H1:352 (draft 2).
5. John H. Gilbert, Statement, Oct. 23, 1887, Church History Library; Indenture, Martin Harris to Egbert B. Grandin, Wayne County, NY, Aug. 25, 1829, Wayne County, NY, Mortgage Records, volume 3, 325–26, microfilm 479,556, U.S. and Canada Record Collection, Family History Library; Historical Introduction to Revelation, circa Summer 1829 [DC 19], in *JSP*, D1:85–89.
6. Copyright for Book of Mormon, June 11, 1829, in *JSP*, D1:76–81; John H. Gilbert, Memorandum, Sept. 8, 1892, photocopy, Church History Library; Porter, “The Book of Mormon,” 53–54.
7. John H. Gilbert, Memorandum, Sept. 8, 1892, photocopy, Church History Library; Lucy Mack Smith, History, 1844–45, book 9, [8]; Joseph Smith to Oliver Cowdery, Oct. 22, 1829, i le *JSP*, D1:94–97.
8. John H. Gilbert, Memorandum, Sept. 8, 1892, photocopy, Church History Library; Lucy Mack Smith, History, 1844–45, book 9, [2]; “Printer’s Manuscript of the Book of Mormon,” i le *JSP*, R3, Part 1:xxvi. **Autu:** Printing and Publishing the Book of Mormon
9. Oliver Cowdery to Joseph Smith, Nov. 6, 1829, in *JSP*, D1:100–101; Mosiah 3:18–19; 5:5–7; 4 Nephi 1:17; tagai foi Oliver Cowdery to Joseph Smith, Dec. 28, 1829, i le *JSP*, D1:101–4.
10. Thomas B. Marsh, “History of Thomas Baldwin Marsh,” *LDS Millennial Star*, June 4, 1864, 26:359–60; June 11, 1864, 26:375–76.
11. Lucy Mack Smith, History, 1844–45, book 9, [9]. Mo faataitaiga o fuatau mai le Tusi a Mamona na Iolomiina e Abner Cole, tagai “The Book of Mormon,” *Reflector*, Sept. 16, 1829, 10; “Selected Items,” *Reflector*, Sept. 23, 1829, 14; “The First Book of Nephi,” *Reflector*, Jan. 2, 1830, 1; and “The First Book of Nephi,” *Reflector*, Jan. 13, 1830, 1. **Autu:** Critics of the Book of Mormon
12. Lucy Mack Smith, History, 1844–45, book 9, [9]–[12]; Lucy Mack Smith, History, 1845, 166–68.
13. Chamberlin, Autobiography, 4–11.
14. Copyright for Book of Mormon, June 11, 1829, i le *JSP*, D1:76–81; John H. Gilbert, Memorandum, Sept. 8, 1892, photocopy, Church History Library; “Book of Mormon,” *Wayne Sentinel*, Mar. 26, 1830, [3]. O isi tusi na faapipiina i pa’umamoe.
15. Itulau Faauatala o le Tusi a Mamona, circa early June 1829, i le *JSP*, D1:63–65; tagai foi Lucy Mack Smith to Solomon Mack, Jan. 6, 1831, Church History Library.
16. Mau a Molimau e Toatalu, Late June 1829, i le *JSP*, D1:378–82; Testimony of Eight Witnesses, Late June 1829, i le *JSP*, D1:385–87.
17. Tucker, *Origin, Rise, and Progress of Mormonism* 60–61.
18. Tagai Lucy Mack Smith to Solomon Mack, Jan. 6, 1831, Church History Library
19. Joseph Smith History, circa Summer 1832, 1, i le *JSP*, H1:10; Mataupu Faavae ma Feagaiga 27:12–13 (Revelation, circa Aug. 1830, i le Mataupu Faavae ma Feagaiga 50:3, 1835 edition, i le josephsmithpapers.org); Oliver Cowdery to Phineas Young, Mar. 23, 1846, Church History Library; “Joseph Smith Documents Dating through June 1831,” in *JSP*, D1:xxxvii–xxxix; tagai foi Cannon and others, “Priesthood Restoration Documents,” 163–207. **Autu:** Toefuataiga o le Perisitua Mekisateko
20. Talafaaolopito Iosefa Samita, 1838–56, volume A-1, 27, in *JSP*, H1:326–28 (draft 2).
21. Talafaaolopito Iosefa Samita, 1838–56, volume A-1, 37, i le *JSP*, H1:364 (draft 2); Stevenson, Journal, Dec. 22, 1877; Jan. 2, 1887; An Act to Provide for the Incorporation of Religious Societies (Apr. 5, 1813), *Laws of the State of New-York* (1813), 2:212–19. **Autu:** Founding Meeting of the Church of Christ
22. Talafaaolopito Iosefa Samita, 1838–56, volume A-1, 37–38, i le *JSP*, H1:364–71 (draft 2).
23. Talafaaolopito Iosefa Samita, 1838–56, volume A-1, 37, i le *JSP*, H1:366; Doctrine and Covenants 21 (Revelation, Apr. 6, 1830, i le josephsmithpapers.org); “History of Joseph Smith,” *Times and Seasons*, Oct. 1, 1842, 3:928–29.
24. Lucy Mack Smith, History, 1844–45, book 9, [12]; Knight, Reminiscences, 8;tagai foi Bushman, *Rough Stone Rolling*, 110.
25. Talafaaolopito Iosefa Samita, 1838–56, volume A-1, 38, i le *JSP*, H1:372 (draft 2); Joseph Smith, “Latter Day Saints,” in Rupp, *He Pasa Ekklesia*, 404–5, i le *JSP*, H1:506.
26. Knight, Reminiscences, 7.



Saunia e Elder  
Quentin L. Cook

O Le Korama  
a Aposetolo e  
Toasefululua

# E Maeu Le Alofa Mutimutivale o le Alii

*O le voluma tuufaatasi fou o le talafaasolopito o le Ekalesia o le a fesoasoani ia i tatou e tausia a tatou feagaiga e ala i le faalauteleina o lo tatou manatua o mea sa faia e le Faaola mo i tatou.*

**M**o le uluai taimi i le toetoe atoa le selau tausaga, sa lolomiina ai se voluma tuufaatasi fou o le talafaasolopito o le Ekalesia i lalo o le taitaiga a le Au Peresitene Sili ma le Korama a Aposetolo e Toasefululua. Ua faaululalaina *Au Paia: O Le Tala i le Ekalesia a Iesu Keriso i Aso e Gata Ai*, o lenei talafaasolopito faamatala o loo ta'u mai ai le tala moni o tagata le taualoa o e na avea ma Au Paia e ala i le Togiola a Iesu Keriso (tagai Mosaea 3:19). O le voluma muamua, *O Le Tagavai o le Upumoni, 1815–1846*, ua maea nei ma ua faaliliuina i gagana e 14 mo le tufatufaina atu i le tele o vaega o le lalolagi.

*O Le Au Paia* o le tala i le ala na toefuatai mai ai e le Atua Ana feagaiga e faava-vau ona o Lona alofa i Ana fanau. O loo faaalia mai ai le ala na toefuatai mai ai e le Alii Lana talalelei e aumaia ai le faamoemoe ma le filemu i taimi o le vevesi, tofotofoga, ma mafatiaga. O loo faaalia mai ai foi le ala e tau atu ai feagaiga toefuataiina i le faaeaga e ala ia Iesu Keriso.

Atonu tou te faamoemoe e amata le tala ia Iosefa Samita, ae *O Le Au Paia* e amata i le 1815 i le pa o se mauga mu i Initonesia, lea sa afua ai le salalau tele o le otí,



*E ala mai i Lana perofeta, sa toefaaafou ai e le Atua feagaiga e le aveesea ai le leaga, faanoanoaga, mafatiaga, ma le valavala ai i le oti ae o loo folafola mai ai le faamalologa e ala i le Togiola a le Faaola, ma faamautinoa mai ai ia i tatou e mafai ona tumau sootaga i le faavavau.*

faama'i, ma le vesiga. O lea amataga na filifilia ma le mafaufau i mea na faaalia mai e le Alii e uiga i le ala na Ia toefuatai mai ai feagaiga e fusia ai i tatou i le Faaola ma mafai ai e i tatou ona faatoilalo faafitauli uma o le olaga.

"O A'u o le Alii, ona ua Ou iloa le malaia o le a oo mai i luga o e o nonofo i le lalolagi, na Ou vala'au atu ai i luga o la'u auaua o Iosefa Samita, Laititi, ma tautala atu ia te ia mai le lagi, ma tuu atu ia te ia poloaiga; . . .

"Ina ia mafai ona faatuina la'u feagaiga ia tumau-faavavau." (MF&F 1:17, 22).

Mai lona vaaiga amata e oo atu i lona salalau atu i le lalolagi, *O Le Au Paia* o loo faailo mai ai i fanau a le Atua i soo se mea e faapea, o le tala lea o la latou feagaiga ma le Atua, o le silafia o latou luitau. E ala mai i Lana perofeta, sa toefaaafou ai e le Atua feagaiga e le aveesea ai le leaga, faanoanoaga, mafatiaga, ma le valavala ai i le oti ae o loo folafola mai ai le faamalologa e ala i le Togiola a le Faaola, faapaiaina ma faaeeina o tatou olaga i le faauigaga silisili, ma faamautinoa mai ai ia i tatou na sootaga tatou te faapelepelea iinei i le lalolagi e mafai ona tumau i le faavavau, "e o faatasi ma le mamalu e faavavau" (tagai MF&F 130:2).

O mataupu muamua e valu o le *O Le Tagavai o le Upumoni* ua lolomi ma faasalalauina i lomiga o lenei mekasini



i le tausaga atoa. O le lomiga o le masina lenei e faamuta i ai ia mataupu o loo faasolosolo mai le *O Le Au Paia*, ae o loo faaauau le tala i le [saints.lds.org](https://www.saints.lds.org), i le Gospel Library app, ma lomiga e (oka mai i le [store.lds.org](https://www.store.lds.org)). Ou te valaulia outou e faaauau ona faitauina i soo se tasi o alaleo nei.

### **O Se Mamanu ma se Fuafuaga Paia**

*O Le Au Paia* o loo faaauauina pea se mamanu paia lea e faaaoga ai e perofeta, e avea o se vaega o la latou auau-naga, le taimi ua tuanai e fesoasoani ai ia i tatou e aoaoina pe o ai i tatou ma vaai atu i faamoemoega o le Atua i o tatou olaga. I tusitusiga paia, e toatele perofeta ua amata la

latou aoao atu e ala i le faamatalaina o tala e uiga i le alofa mutimutivale o le Alii i o latou augatuaa.<sup>1</sup> Na apoapoi mai Moronae i le aufaitau o le Tusi a Mamona ia “manatua le alofa mutimutivale o le Alii” i le gasologa o le talafaasolopito “ma manatunatu i ai i o outou loto” (Moronae 10:3). O le toe manatunatu i le agalelei o le Alii e saunia ai i tatou e maua le molimau a le Agaga, lea e aoao mai ai i tatou “i mea e pei ona i ai moni lava, ma mea e pei o le a i ai moni lava” (Iakopo 4:13; tagai foi Moronae 10:4–5).

I le iloa ai sa fuafua o tatou Matua Faalelagi mo lo tatou fiafia faai’u ma le faaeaga ua aumaia ai ia te i tatou se vaaviga, ua aumaia ai ia i tatou se faasinomaga o ni fanau faapelepele a ni matua faalelagi, ma faateleina ai lo tatou talitonu mautinoa i le Alii, e oo lava i taimi o mafatiaga. O le manatuaina o le agalelei o le Alii e mafai ai foi ona puipua i tatou mai le faamaualuga ma le faafanoga o le tamaoaiga. Na tusi Mamona e uiga i se taimi na “amata ai ona faatuputeleina le mauoa” o sa Nifae. Ae e le pei o isi vaitau i le Tusi a Mamona ina ua faatagaina e tagata le faamaualuga ma ‘oa e aumaia ai lo latou toilalo, sa latou mulimuli i ala eseese i le taimi lea: “Ae e ui ia latou oa, po o lo latou malosi, po o lo latou manuia, sa le faafefeteina i latou i le faamaualuluga o o latou mata; pe sa gese foi ona latou manatua o le Alii lo latou Atua; ae sa latou faalotomaualalalo tele lava i latou lava i ona luma.” Sa latou tausia a latou feagaiga ma tumau i le amiontonu aua “sa latou manatua mea silisili sa faia e le Alii mo i latou” (tagai Alema 62:48–50).

*O Le Au Paia* o loo aoao mai ai lesona e pei o nei ma le tele o isi. O le a fesoasoani ia te oe e iloa ai le aao o le Alii i lou olaga a o e feagai ma tofotofoga o le faatuatua mai itu eseese, o lototiga ma olioliga, o faaaliga ma faanaunauga a tagata e le atoatoa o e alolofa i le Alii ma e ua lagonaina Lona alofa.

A o e faitauina, o le a e iloa ai se malamalamaaga fou ma se faauigaga e oo lava i tala sa e faalogo i ai muamua. E leai se vaaiga i le talafaasolopito o le Ekalesia e sili ona lauiloa nai lo le Uluai Faaaliga Vaaia a Iosefa Samita, ae *O Le Au Paia* e fesoasoani tatou te malamalama atili ai pe na faapefea ona tauivi Iosefa e tuufaatasia le mea sa ia lagonaina i lona loto ma le mea sa ia manatu ai i lona mafaufau.

O le naunauga ma le loto o Iosefa ia lagonaina le faamagaloga a le Faaola sa le i faataunuina aua sa ia faapea mai e leai se lotu sa i ai na aoaoina “le talalelei a Iesu Keriso e pei ona sa tusia ai i le Feagaiga Fou.”<sup>2</sup> I lona mafaufau sa manatunatu loloto ai Iosefa pe o le fea ekalesia sa sa’o pe sese uma foi. I lona loto sa matuai faamoemoe o ia ma le naunautai ia sa’o se tasi o na ekalesia ina ia mafai ai ona ia maua le filemu o loo ia sailia. O le le mafai ona ia tuuفاتasia o mea i lona mafaufau ma mea sa i lona loto, sa iloa ai e Iosefa sa mafai ona ia ole atu i le Atua. Sa alu o ia i le togavaao e tatalo ai. O iina na ia vaai ai i le Tama ma le Alo, o le sa faamagaloina o ia ma foia lana faafitauli i se ala na te lei mafaufauina lava.<sup>3</sup>



*O loo faaalia i le O Le Au Paia e faapea  
o le iloaina o fesootaiga a le Alii tatou  
te maua ai se vaaiga e faavavau,  
fesoasoani tatou te vaai atu ai i mea e  
pei ona i ai moni ma o le a i ai, ma  
fesoasoani tatou te faaaoga ai le  
faatuatua faapea o le a fesoasoani mai  
le Alii ia i tatou i taimi faigata.*

O Iosefa, o lona aiga, ma le toatele o isi tagata o e sa taliaina le feagaiga ua toefuataina mai a le Alii, sa mananao ia lagonaina le alofa o le Atua mo i latou, aoao pe mafai faapefea ona latou faalatalata atili atu ia te Ia, ma faamalolo ia sootaga ma e pele ia i latou. Ua faamatala mai e le *O Le Au Paia* a latou tala.

#### **Faalagolago i le Alii i taimi o Tofotofoga**

O le Voluma 1 o le *O Le Au Paia* e aofia ai le tala faa-momoiloto ia Amanada Barnes Samita ma lona aiga, o e sa usiusitai i polo-aiga a le Alii ma sa latou faia Lona finagalo.<sup>4</sup> Sa fasiotia mataga ia le toalua o Amanda ma se tasi o lana fanau tama faatasi ai ma isi Au Paia o Aso e Gata Ai e toa 15 sa tolauapi i se pitonuu laitiiti i luga o le Alia o Shoal i Misuri. Sa tausia e le Alii ia Amanda i lenei aafiga matautia, sa tali atu i ana tatalo, avatu ia te ia le lototele, ma sa mafai ai e ia ona faamalolo lana tama tama sa matuia ona manu'a.<sup>5</sup>

O loo faaalia i le *O Le Au Paia* le ala na aoao ai e Amanda le faalagolago i le Alii i puapuaga matuia. O loo faamatala mai ai foi le mea sa aoaoina e Iosefa Samita e uiga i le agalelei o le Atua e oo lava i taimi o puapuaga. O loo faaalia a faapea o fesootaiga a le Alii tatou te maua ai se vaaiga e faavavau, fesoasoani tatou te vaai atu ai i mea e pei ona i ai moni ma o le a i ai, ma fesoasoani tatou te faaaoga ai le faatuatua faapea o le a fesoasoani mai le Alii ia i tatou i taimi faigata.

Ina ua iloa e le Perofeta o Iosefa le mea sa tupu i le aiga o Amanda ma isi o le Alia o Shoal, sa ia lagonaina e sili ai



lona alu i le falepuipui pe fasiotia o ia nai lo le fasiaina o le Au Paia. O le aso na sosoo ai sa ia taumafai ai e soalaupule se vaifofo toofilemu ma le vaegaau faaaaupegaina a Misuri, lea sa foufou e osofaia le pitonuu autu o le Au Paia o Fa Uesi. Nai lo lena, sa ueina Iosefa ma taofia faapagota.

Toetoe ina atoa le lima masina mulimuli ane, sa faapagotaina pea Iosefa, i se sela malulu, fe'oma'i i Liperate, Misuri. Sa ia taumanatunatu pe o fea sa lafi ai le Atua ma pe o le a foi le umi e mafai ona ia tatalia ai le faalogologo atu i le tagi mai a fafine ua otia latou tane ma tamaiti matuaoti. Sa ia tatalo, "Le Alii e, o le a le umi latou te mafatia ai i nei

sese ma sauaga lē tusa ai ma le tulafono, ae lei faamaluina lou finagalo ia te i latou, ma uunaia ai lou loto i le agaalofa ia te i latou?" (MF&F 121:3).

O loo aoao mai e le *O Le Au Paia* i tatou e faapea o mafatiaga e le o se faailoga o se le fiafia o le Alii, po o se aveesega o Ana faamanuiaga. O le faafeagai o se vaega o le afi faamama e sauniaina i tatou mo se taunuuga e faavavau i le selesitila (tagai 2 Nifae 2:11). Sa aoaoina e Iosefa e faapea o puapuaga e le mafuatiaina o le Faaola ua mafai ai e Ia ona fesoasoani ia i tatou pe a tatou puapuagatia ma iu ai ina faaeaina i tatou (tagai Alema 7:11–13). I le tali atu i le tagi faanoanoa a Iosefa, sa lisi mai ai e le Alii ituaiga uma o luitau a o lei faaiuina:

"Afai e tatala faamaga lautele mai e auvae lava o seoli le gutu ia te oe, ia e iloa, lo'u atalii e, o nei mea uma e te maua ai le poto masani, ma o le a avea mo ou lelei.

"Na oo ifo i lalo o mea uma le Atalii o le Tagata. Pe sili ea oe i lo ia?" (MF&F 122:7–8).

O lo tatou oo foi o i tatou lava *i nei mea* e mafai ona faaeeina ai i tatou i le agaalofa faaKeriso mo i latou o e puapuagatia. "O le a atili momomo pea lava lo'u loto pe a mavae lenei mea nai lo le mea sa i ai muamua," sa iloa ai e Iosefa a o i ai i le falepuipui. Sa ia moomoo maimau e pe ana mafai ona mafuta ma le Au Paia e faamafanafanaina ma faana i latou. "Semanu e le mafai lava ona ou lagonaina e pei ona lagonaina i le taimi nei," sa ia faamalamalama mai ai, "pe ana ou le'i mafatia i mea sese sa ou pagatia ai."<sup>6</sup>

O se tasi mafuaaga sa faatonuina ai ma faamaonia e le Au Peresitene Sili ma le Korama a Aposetolo e Toasefululu le *O Le Au Paia* ina ia mafai ai ona fesoasoani ia i tatou taitotasi ia iloa *nei mea* e ala i tala o isi. E mafai ona tatou aoao mai ia Amanda e tusa lava pe na silafia e le Atua e fetau ma Lona poto e le mafuatiaina e aua nei papuipua mai mea leaga po o mafatiaga, e alofa lava o Ia ia i tatou ma o loo silafia lelei i tatou e Ia. E faafofoga mai o Ia ia tatou tatalo ma e alofa mutimutivale, ma agalelei.

## O Faamanuiaga Toefuataiina o le Malumalu

E leai se isi mea e sili atu o loo faaalia ai lena alofa mutimutivale ma le agalelei ia i tatou nai lo totonus o le malumalu. O le mea moni lava, *O Le Au Paia* o le tala e uiga i faamanuiaga toefuataiina o le malumalu. O le voluma muamua o loo faauma a o mauaina e le fiaafe o le Au Paia o Aso e Gata Ai ia sauniga paia i le Malumalu o Navu i le 1846. O le voluma lona lua o le a taualuga i le faapaiaga o le Malumalu o Sate

Leki ma amatalia ona maua e le Au Paia o sauniga iina i le 1893. O le voluma lona tolu o le a faai i le Au Paia Europa ua amata ona faapotopoto atu i le malumalu i Suitiselani i le 1955. O le voluma lona fa o le a aumaia ai le tala e oo mai i le taimi nei, o le taimi ua salalau ai malumalu i le lalolagi ma ua maua e le Au Paia i le salafa o le kelope ia sauniga o le faaeaga, e pei ona sa valoia e perofeta i aso ua leva.

I totonus o le maota o le Alii tatou te osia ai feagaiga ma faaeeina ai i le mana e faatoilalo ai aafiaga o le Pau, e aofia ai mea leaga ma mafatiaga i lenei lalolagi. Tatou te maua le puipuiga ma taualuga i le mana e tulai mai ai i le Toetutu, ua faamauina ia tatou pele e faavavau.

O le a fesoasoani le *O Le Au Paia* ia i tatou e tausia feagaiga e ala i le faalauteleina o o tatou manatua i ala faafamanatuga. O le a fesoasoani ai ia te i tatou e manatua mea sa faia e le Faaola mo i tatou. A aunoa ma faamaumauga o fesootaiga a le Atua i taimi ua tuanai, e le mafai ona tatou "manatua le alofa mutimutivale o le Alii i le fanauga a tagata" (Moronae 10:3). O mafuaaga nei ua tatou nofoatalafu ai i le Alii ma i le Au Paia o e sa tusifaamaumauina o latou aafiaga o Lona alofa mo i latou. Sa poloaiina Iosefa Samita e le Alii e tusifaamaumau ona aafiaga (tagai MF&F 21:1). Na Ia poloaiina se tusitalafaasolopito o le Ekalesia sa galue i lalo o le taitaiga a Iosefa ia "tausia e lē aunoa le talafaamaumau ma le talafaasolopito o le ekalesia" (MF&F 47:3). Na Ia poloaiina faapea o lena talafaasolopito e aofia ai "mea uma mo le lelei o le ekalesia, ma mo tupulaga faia'e" (MF&F 69:8).

Faatasi ai ma nei faaaliga ma le folafolaga o le feagaiga ia manatua pea le Faaola, sa amata fuafua ai e le Au Peresitene Sili ma le Korama a Aposetolo e Toasefululu le *O Le Au Paia* i le 10 tausaga talu ai. O lenei matou te fautuina outou e faitau i ai, talitonu o le a fesoasoani ia te oe e malamalama ai i le fuafuaga a le Atua, ma vaai atu ai i le tele o le alofa mutimutivale o le Alii, tumau ma le faamaoni i taimi lelei ma taimi leaga, ma maua le agaalofa faaKeriso mo isi, ma tausia feagaiga e tau atu ai i le faaeaga. ■

## FAAMATALAGA


1. O faataitaiga e aofia ai Nifae (1 Nifae 17:23–43), Tupu o Peniamina (Mosaea 1), Limae (Mosaea 7), se agelu a le Alii ia Alema (Mosaea 27), Alema (Alema 9:10), Mamona (Mamona 3:17–22), ma Mose (Esoto 13:3).
2. Joseph Smith, in "History, circa Summer 1832," 2, josephsmithpapers.org.
3. Tagai "History, 1838–1856, volume A-1 [23 December 1805–30 August 1834]," 3, josephsmithpapers.org.
4. Tagai "Revelation, 12 January 1838–C," [1], josephsmithpapers.org.
5. Tagai *O Le Au Paia*, volume 1, chapter 30, "Fight Like Angels."
6. "Letter to Presendia Huntington Buell, 15 March 1839," [1], josephsmithpapers.org.

## FUAMOA, FIUSI, MA LE FAATUATUA

**O**se tasi o a matou sini o se aiga o le teu ia lava se tupo e totogi ai se vaega o so matou lava fale. Ana leai lena sini, semanu e faamaimau faaiuga o a'u vaiaso e matamata ai le televisé, ma faatalitali mo ni avanoa tautupe e oo mai ia te au.

I le avea ai o se avetaavale mo se kamupani eli maina i matu o Chile, e fa aso ou te alu ese ai mai le fale e faigaluega ona tolu lea o o'u aso malolo—Aso Toonai e oo i le Aso Gafua. Ina ia fesoasoani i la matou tupo maua ma le teugatupe mo se fale, sa tonu ai ia te i matou e amata ona faatau atu fuamoa. O la matou fuafuaga e ave oka mai uo, tuaoi, ma tagata o le Ekalesia, ona faatau mai lea pe tusa ma le 1,000 fuamoa i vaiaso taitasi mai se fale faatau atoatoa, ona piki lea ma tiliva ia fuamoa i Aso Toonai ma Aso Gafua.

Sa tonu ia i maua ma lou toalua o Luana o le a matou o ma le ma fanau e toalua e tiliva ma fiafia faatasi ai. Peitai a o matou malaga atu e faatau mai le matou uta muamua o fuamoa, sa matou fetaiai ma se faalavelave. O se tasi o le ma fanau sa taalo i se tama'i vilipeni metale, sa ia togiina le vilipeni ma sa pa'u tonu lava i le atigi afi e tutu ai sikaleti. Sa feemo aloiafi, ma sa aluese uma ai le malosi faaeletise o le matou veni, ma faafuasei ai ona tu i le



Ina ua pa'u se tama'i vilipeni metale i le atigi afi e tutu ai sikaleti, sa faafuasei ona tu le matou veni. Ua pa se matou fusi.

totonugalemu o se aualatanu. Ua pa se matou fusi.

A o matou saofafai ai iina ma taofia ai le fegasoloai o taavale ma taumafaufa po o le a le mea e fai, sa oo ina matou le mautonu ma toetoe a fetagisi. Ae i le taimi lena, sa ou manatua ai na folafola mai le Alii e siitia i matou ma fesoasoani mai pe a matou tuu atu lo matou faatuatuaga ia te Ia. Sa oo mai le toafilemu ia te au. Sa ou iloa ai e le tatau ona na ona ou saofai

ai iina ma faitio. Sa i ai le matou faafitauli, ma faatasi ai ma le fesoasoani mai o le Atua, o le a matou foiaina.

Sa ma taufai tilotilo atu ma Laura mai le tasi i le isi ma faapea, "E tatau ona faaalia lo tatou faatuatua." Sa fai se matou tatalo ma soloia o matou loi-mata. Ona, nofo lea o Laura i le foeuli, ae ou oso i fafo e tulei le taavale. E toatele tagata sa tulioso i fafo mai a latou taavale ma fesoasoani mai ia te au.

Sa matou tuleia le taavale pe tusa ma le 200 mita faatoa maua se vaimea saogalemu e o ese ai mai le alatanu e faatu ai. A o se'e atu le taavale e tu, sa ou matauina o loo matou tu tonu lava i luma o se faleoloa e faatau ai laau o taavale.

Sa ou aumaia le fusi na pa, ma ou savali atu i totonus o le faleoloa, ma fesili, "E i ai ni tou mea faapea?"

Sa tali mai le faatauoloa, "Ioe."

Sa ou faatauina se fusi ma faapipi, ma sa ola le taavale, ma matou o loa lava. E oo atu le matou taavale, ae o le a tapuni le fale faatau fuamoa. Sa faatau a matou fuamoa ma matou o loa e tiliva.

A i ai ni o tatou luitau, e ao ina tatou manatua e ole atu i lo tatou Tama Faalelagi mo se fesoasoani. Ou te iloa o le a tali mai o Ia pe a tatou agai i luma ma faaali atu lo tatou faatuatua ia te Ia. ■

Claudio Gonzalez, Antofagasta, Chile

# O SE FAAMANUIAGA I LE TUSILIMA A LO'U TINA

Se tasi afiafi sa ou mafaufau ai lava po o le a se savali e tuuina atu i se konafesi a le uarota ua lata mai. Sa ou suesueina tusitusiga paia i le aluga o le vaiaso, ma e ui ina sa ou mauaina ni aoaoga sili ma ni malamalamaga, ae ou te lei mauaina lava se taitaiga manino o le mea e finagalo le Alii ia te au, o se peresistene o le siteki, e faasoa atu i tagata o le uarota.

I se tatalo ma le loto, sa ou fesili atu ai mo se taitaiga mai le Agaga e taitai o'u mafaufauga. Ona ou tatalaina lea o tusitusiga paia ma amata ona toe faiatua. Sa vave ona liliu atu lou mafaufau i sini a le uarota sa ma talanoaina talu ai ma le epikopo. O se tasi o na sini o le faaaoga le *Tala'i La'u Talalelei* i le faasoaina atu o le talalelei i uo ma tuaoi.

Sa uunaia au e faaaofia ai le *Tala'i La'u Talalelei* i a'u lava suesuega i lena afiafi. Sa ou aumaia se kopi ma soona tatala e aunoa ma se itulau faapitoa. I lena itulau, sa ou maua ai ni mau sa tusia faatusilima—1 Nifae 8:8–11 ma le 1 Nifae 11:21–22. A o ou autilo atili i ai, sa ou iloa ai o na mau sa tusia i le tusilima a lo'u tina. Sa maliu si ou tina pele i nai tausaga ua mavae, i le lua masina talu ona aulia lona 80 tausaga. O ia o se faataitaiga o le lototoa ma le le manatu

faapito, e vaai o ia e le aunoa i le lelei o tagata. Ma sa fiafia o ia i tusitiusiga paia.

Sa ou susueina tusitusiga paia i na fuaiupu ia iloa ai po o le a se mea na uunaia ai o ia e tusia. A o ou faiatua, sa vave ona matale lo'u mafaufau i le savali e tatau ona ou tuuina atu. O se savali faigofie e faapea o tagata o le Ekalesaia o e ua tofo i le suamalile o fua o le talalelei atonu o nisi taimi e galo ai o loo sailia foi e le toatele o isi lena lava fua. E manaomia ona tatou aapa atu ma ta'u atu ia i latou le mea e maua ai.

Sa ou mafaufau i si o'u tina pele a o ou autilo i le vaega na totoe o le *Tala'i La'u Talalelei*. Sa leai se igoa, leai ni tusigamanatu, po o se isi meae e ta'u mai ai faapea o sana tusi lea. Sa ou saofai ma le maofa a o ou toe manatunatu i le filifili o uunaiga faaleagaga na tau mai ai i lenei minute. Sa faamautu mai ia te au e le Agaga na taitaiina a'u i o'u mafaufauga, e pei lava ona sa ou tatalo ai. E lei iloa e lou tina, po o le a lava le tele o tausaga sa ia tusia ai na mau, ae o le a faaaogaina e le Alii e avea ma tali o le tatalo faamaualalo a lona atalii. ■

Douglas Hedger, Nevada, ISA

**A**o tapenapena ai amo le konafesi a le uarota, sa ou susueina le *Tala'i La'u Talalelei* i se itulau sa tusia ai mau i le tusilima a lo'u tina.



# O SE VAVEGA I LE FALE O LE ALII I KYIV

Sa matou sagisagi fiafia ma lou saiga e malaga i se taavale mai Romania i Kyiv, Iukereini, mo le faapaiaga o le mlaumalu ia Aokuso 2010. I le iloa ai o le malumalu lea mo le Au Paia o le Misiona i Romania/Moldova, o lea sa matou malaga ai pe tusa ma le 14 itula ia tau lava ina i ai iina. Ina ua matou taunu, sa matou feiloai ma se vaega o tagata sa malaga mai foi mai Romania. Sa matou fiafia uma lava e i ai i Kyiv mo lea faamoemoega paia.

I se tasi aso o le faapaiaga, sa tofi ai le matou vaega mai Romania e mata-mata i le faapaiaga e ala i se faasala-lauga i totonu o se potu i le fogafale i lalo o le malumalu. Sa amata ona faa-alia le le fiafia o nisi. Sa latou faamoe-moe e auai ai i le faapaiaga faatasi ma le perofeta i le potu selesitila. Na oo ina fai mai nisi semanu e nonofo i le fale ma matamata ai le faasalalauga mai o latou falelotu i Romania.

Sa amata ona ou tatalo i lou loto, "Le Tama Faalelagi e, e mafai faapefea

ona matou fesoasoani i nei tagata mai Romania ia maua se aafiaga e le mafai ona galo i Lou fale?"

Ou te lei mauaina lava se tali ina ua amata le sauniga o le faapaiaga. E lei leva ae matou iloa o le a susu mai i lalo Peresitene Thomas S. Monson 1927–2018), e faataatia le maatulimanu i lona nofoaga. Atonu o le matou tali lea! Sa ou tatalo mo se auala e sau ai le perofeta ma faafeiloai le Au Paia mai Romania.



"Ou te lei ole atu mo lenei mea mo a'u lava," sa ou tatalo ai, "ae mo o'u uso ma tuafafine."

Ina ua maea le sauniga o le maatulimanu, sa savali mai Peresitene Monson i autafa o lo matou potu e toe agai atu ai i le potu selesitila. Sa faafuasei, ona ou lagonaina i lo'u loto e tatau ona ou tu ma valaaulia o ia e sau i lo matou potu.

Sa ou tulai ma faapea atu, "Lo matou perofeta e! Sau e vaai matou. Matou te o mai Romania."

Sa lei foliga mai na ia lagona mai au. Ona, oo lea i sina minute mulimuli ane, na ia toe foi mai. "Romania!" sa ia saunoa ai ma ulufale mai i le potu.

Sa ia faafeiloaia i matou uma ma sa saunoa mai e alofa tele o ia ia te i matou. Sa faatumulia lo'u loto a o ou matamata atu i foliga fiafia o nai

Sa ou tatalo i lo'u loto, "Le Tama Faalelagi e, e mafai faapefea ona matou fesoasoani i nei tagata mai Romania ia maua se aafiaga e le mafai ona galo i Lou fale?"

o matou tagata pele. "Faafetai le Tama pele," sa ou tatalo ai, "mo le vavega i Lou fale."

Ina ua tuua e le perofeta le potu, sa lei toe tautala se tasi. Sa ou lagonaina sa matou i ai i le potu aupito sili ona faamanuiaina i le malumalu. O se aafiaga o le a le galo lava ia te au. ■

Doru Vasile, Bucharest, Romania

## O SE ATAATA O LE TALIAINA

Sa faia se gaoioiga a le matou uarota si se tasi po lea na matou faaaluina ai le tele o itula e tapenapena ai. Ina ua uma le gaoioiga sa faatofa mai ia te au se tagata sailiili talavou ae sa toe foi mai i ni nai minute mulimuli ane ma fesili mai, "Epikopo, o afea e manao-mia ai ou te toe sau?" Sa ou fai atu i ai o le Aso Sa, ma sa vave ona fai mai le tamaititi, "Leai, e leai se isi gaoioiga?" Sa fiafia tele o ia i le taimi sa mafuta ai ma le autalavou a le matou uarota ma sa ia manao ai e toe sau.

Sa matou talanoa foi ma se ulugalii sa asiasi mai ma auai i le gaoioiga ma fesili atu i ai pe o le a so la manatu? Sa fai mai le tane, "Talu lava ona ma taunuu mai iinei, sa ma lagonaina lava le filemu ma le mafanafana," lea na faamautu mai e lona toalua i le lue mai o lona ulu. Sa ou te'i i lenei mea aua ina ua la faatoa taunuu, sa toatele tagata sa talanoa ma sa pisapisao. Ae sa tilotilo mai pea o ia ia te au ma fesili, "O le Agaga Paia lena, e sa'o?" Ma le faateia sa na ona ou fai atu ioe.

Sa tele naua mea sa faia e tapena ai mo lenei gaoioiga, ina ia uma loa lava mea i lena po, na pau lava le mea sa ou manao ai o le alu i le fale e moe. Ona o lo'u lelava tele, sa le mafai ai ona ou mafaufau i la matou talanoaga ma tagata sailiili. Ina ua ou taunu i le fale, sa fai la'u tatalo ma alu i le moega, ae sa le mafai ona ou moe, i lo'u vaaia i lo'u mafaufau le ataata mai o le Alii. O se ataata o le taliaina. I lena taimi, sa amata ai ona ou manatua mea matagofie sa tupu i lena gaoioiga.

Sa ou malamalamo o le filiga ma le alofa o tagata o le uarota na mafai ai ona tuia loto o na tagata sailiili e toatolu. Sa ou malamalamo o le ataata o le taliaina sa mo le mea sa matou faia. Sa le mafai ona ou taofia le tagi, ma sa ou lagonaina le lotofaafetai mo le meaalofa na aumai e le Alii mo i matou. Sa ia tuuina mai ia i matou se ataata o le taliaina. Ou te molimau atu e moni afioga a le Alii a tatou aumaia se agaga e toatasi ia te ia, o le a sili lo tatou fiafia i le malo o le Tama (tagai MF&F 18:15). ■

Franklin Romero, Manabí, Ecuador

## FAASOA MAI LAU TALA

O Leo o le Au Paia o Aso e Gata Ai o loo faasalalauina ai tala moni e uiga i soo se autu o le talalelei, ae o loo matou vaavaai faapitoa lava mo ou aafiaga i le auaunaga i isi ma i le faaalia o le lototoa e ola ai i le talalelei. Auina mai faaeletonika lau tusiga i le [liahona.lds.org](http://liahona.lds.org) (kiliki le "Submit an Article or Feedback").

# O LO TATOU Faaosofia E Ola i le Talalelei

**Saunia e Mindy Anne Selu**

Mekasini a le Ekalesia

**O le a i ai pea “aoaoga e faigata.” Ae o le a i ai pea foi le avanoa e filifili ai le faatuatua i luga atu o soo se masalosalo po o se le mautonu.**

**O**le ala i le avea ma soo e tumu i faamanuiaga—o na faamanuiaga e vaiaia a o isi e le mavaaia.”<sup>1</sup> Ae e i ai taimi e le faigofie ai lena ala, e ui i ona faamanuiaga. O le avea ma soo o Iesu Keriso e manaomia ai le galue ma le ositaulaga, ma o nisi taimi e faigata ona maua le faaosofia e ola i poloaiga ma faia na osigataulaga.

I le avea ai o se talavou matua, atonu e te pisi foi oe e taumafai e fefulifulisa'i ia tiutetauave fou, faia faaiuga e fetuunai ai le olaga, ma tau fuafua po o le a tonu foliga o lou ala i le avea ai ma soo i aso o totoe o lou ola. I luga atu o na mea, atonu e i ai ni mea i aiaiga faavae o le Ekalesia po o le talafaasolopito po o aoaoga faavae o le talalelei e te le o malamalamalama lelei i ai ma faaososoga o loo e tauivi ai, faapea foi faamanuiaga o loo e faatalitali pe i ai ma fesili e uiga i le fuafuaga a le Atua mo oe.

Atonu o tau manatunatu nisi o i tatou pe o le ola ai i le talalelei e tusa ai ma faamanuiaga ua folafola mai ia te i tatou. Atonu tatou te finau atu e le fetaui ma i tatou, pe tele naua galuega, pe ua tele naua foi fesili nai lo tali o loo maua mai. Ae o le mea autu lava o loo faalagolago i ai o le faaosofia. Aisea e te faia ai mea o e faia ma ola i le ala o loo e ola ai? Aisea e te faaauau ai pea ona tausi i poloaiga, tusa lava pe le o i ai se tasi o matauina oe?

Tusa lava po o ai oe ma pe o le a le tulaga o le olaga o loo e i ai, o le filifilia e sue lou faaosofia e ala i le atina'eina o lou faatuatua i le Faaola ma Lana talalelei o ia te oe lava.



### A Matou Ō Ea ia Te Ai?

O le sueina ma le tausisia o le faaosofia e ola i le talalelei e le o se lu'itau e fou i o tatou taimi. E oo lava foi i le taimi sa i ai le Faaola i le lalolagi, sa faigata lava i tagata ona malamalamā ma sa usiusitai lava i mataupu faavae sa Ia aoaoina. E toatele Ona soo sa faalogologo a o Ia faamalamālāma atu se manatu faavae sa foliga e faatiga ai ia te i latou—o Lana matafaioi o le “areto o le ola” (tagai Ioane 6:35–58). Sa latou tali atu ma le masalosalo, fai mai, “O le upu faigata lena; o ai ea se na te mafaia ona faalogologo i ai?” (Ioane 6:60).

Sa fesili atu Keriso, i le silasila atu sa faigata ia i latou ona talitonu pe taliaina lenei aoaoga faavae, “Tou te tausuai ea i lena mea?” (Ioane 6:61). Nai lo le faamuamua o lo latou faatuatua i lo latou masalosalo, o le toatele o Ona soo, “na toe foi ma e lei toe feoa'i i latou ma ia” (Ioane 6:66).

Peitai ina ua fesili atu Keriso i Ona soo na tootoe “pe latou te o ese foi,” na tuu atu e Peteru le tali e tasi sa tatau moni ona tuuina atu: “A matou o ea ia te ai? o ia te oe upu o le ola e faavavau” (Ioane 6:67–68).

### O Le Punavai o Io Tatou Faaosofia

Sa iloa e Peteru le punavai o lona faaosofia. Sa faalagolago i le mafuaaga autu o mea tatou te fai i le talalelei: o a tatou molimau ma le faatuatua ia Iesu Keriso. “Ua matou talitonu, ma ua matou iloa,” na tautino atu ai e Peteru, o oe o

le Keriso, o le Alo o le Atua soifua” (Ioane 6:69; ua faaopoopo le faamamafa). O le mauaina o lena lava talitonuga maumaututu malosi ia Iesu Keriso, o Lona paia, ma Lana galuega, tatou te mafai a foi ona maua le faaosofia e faaaauau ai ona ola i le talalelei—tusa lava pe foliga mai e faigata, tusa lava pe leai se isi o le a matauina, ma tusa lava foi pe tatou te le o mautinoa tatou te mananao ai.

O le a i ai pea “aoaoga e faigata.” Ae o le a i ai pea foi le avanoa e filifili ai le faatuatua i luga atu o soo se masalosalo po o se le mautonu. E pei ona saunoa Elder L. Whitney Clayton o le Au Peresitene o Fitugafulu, O le faaiuga e talitonu o le filifiliga aupito sili ona taua tatou te faia.”<sup>2</sup>

O le a la le mea tatou te faia pe a ta’u mai ia i tatou se tasi o na “upu faigata”?

1. Mulimulil i le faataitaiga a Peteru ma isi soo o e sa tumau faamaoni tusa lava pe na foliga faigofie ona “o ese.” Faalogo i fautuaga a perofeta, aposetolo, ma isi taitai:

“I taimi o le atuatuvalo po o le le mautonu po o taimi e fesoouaiina ai, tausisi pea i le faatuatua lena ua e atina’eina. . . . Pipiimau i mea ua uma ona outou iloa ma tutu malosi seia oo ina oo mai le malamalamama sili atu.”<sup>3</sup>

“Ia faia se la’ā se tasi faigofie agai i luma i le faatuatua—ona sosoo ai lea ma le isi. . . . Ia taulai i upumoni ua [e] talitonu i ai ma tuu na upumoni e faatumulia ai lou mafaufau ma le loto. . . .

“. . . Amata i upumoni faavae o le talalelei.”<sup>4</sup>



2. Tumau lou faalatalata i tutsi-tusiga paia ma mulimuli i a latou aoaoga.

“Ia suesue ma le agaga tatalo ma mafaufau loloto i le Tusi a Mamona i aso taitasi.”<sup>5</sup>

“Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua lava au” (Ioane 7:17).

“A ia fai outou ma e anaana i le upu, a e aua le na ona faalogologo i ai” (Iakopo 1:22).

3. Tumau pea i le tausiga o poloaiga.

“O tali i a tatou fesili faamaoni e oo mai pe a tatou saili ma le naunau-tai ma pe a tatou ola i poloaiga. . . . E mafai ona fesoasoani lo tatou faatuatua e talitonu i mea tatou te le malamalamama i ai i lena taimi.”<sup>6</sup>

“A o faaaauau pea ona e usiusitai, . . . o le a tuuina atu ia te oe le poto ma le malamalamama o loo e sailia.”<sup>7</sup>

I le faaiuga, e maua mai lo tatou faaosofia i le na o le faalagolago i le mea na ta’ua e Peteru. Pe tatou te talitonu o Iesu o le Keriso, Na te tai-taia Lana Ekalesia, ma o loo i ai upu o le ola e faavavau? Pe o sili atu ea lo tatou faatuatua ia te Ia nai lo “upu faigata” atonu tatou te le malamalamama i ai i le taimi nei?

### **O Tau i le Ola ai i le Talalelei**

Pe a tatou filifili e alolofa ma mulimuli i le Atua ma Iesu Keriso ma tausia ia poloaiga tusa lava pe tatou te le malamalamama atoatoa i ai, e le mafuatiaina ia taui. E fesili le tagata natura, “O le a se mea ou te maua mai ai?” Ua tali mai aoaoga o le talalelei: “O le filemu i le lalolagi lenei ma le ola e faavavau i le lalolagi a sau”; o se nofoaga ua saunia mo outou i maota o le Atua; o mea uma o i le Tama Faa-lelagi; ‘o le fiafia e le uma” (tagai MF&F

59:23; Eteru 12:34; MF&F 84:38; Mosaea 2:41); ma, faapei ona tau mai e Dieter F.Uchtdorf o le Korama Aposetolo Toasefululua: “I [totonu o le Ekalesia] o le a e maua ai se mea silisili ona ttau nai lo se taui. . . . O iinei o le a e maua ai upu o le ola e faavavau, le folafolaga o le togiola faamanuiaina, ma le ala o le filemu ma le fiafia.”<sup>8</sup> Ua na o ni nai mea ia.

A tatou tuuto atu i tatou lava e mulimuli ia Keriso ma usiusitai i Ana poloaiga, ua folafola mai ia i tatou nei mea uma ma isi. E le faapea ai o le ala o le a faigofie i taimi uma pe malamalama ai foi i taimi uma, ae o faamanuiaga ua folafola mai ia i tatou mai le tumau malolosi o le a faaaauau pea ona tatala mai i le gasologa o tatou olaga ma le faavavau

Peitai, po o le a le ofoofogia o nei faamanuiaga, e le tatau ona avea ma o tatou faaosofia faavae mo le ola ai i le talalelei. Tusa lava po o a ni au fesili o i ai, tusa lava po o le fea aoaoga faavae e te le o malamalama ai, o lou faatuatua ia Iesu Keriso ma Lana Togiola o le ki lea i lou faaosofia e ola i Lana talalelei, e faapei lava foi na i ai mo Peteru ma isi.

“O o tatou faamoemoega ma mafaufauga e laualuga i le tosinaina o a tatou taga fai,” na saunoa ai Elder Uchtdorf. “O le molimau i le moni aiai o le talalelei toefuataiina a Iesu Keriso, o le malosiaga aupito mamana lea o le faaosofia i o tatou olaga. Ua faafia ona faamamafa mai e Iesu le mana o mafaufauga lelei ma faamoemoega tatau: ‘Ia faalagolago

ia te a'u i manatunatuga uma; aua le masalosalo, aua le fefe’ (MF&F 6:36).

“O le molimau ia Iesu Keriso ma le talalelei toefuataiina o le a fesoasoani i o tatou olaga e aoao ai i le fuafuaga patino a le Atua mo i tatou ona faatino ai lea e tusa ai. E aumaia ai ia i tatou le faamautinoaga o le moni, upumoni, ma le agalelei o le Atua, o aoaoga ma le Togiola a Iesu Keriso, ma le valaauga paia o perofeta o aso e gata ai.”<sup>9</sup>

Mo a'u, o le a ou taumafai pea, tusa lava pe faigata. O le a ou faia pea a'u tatalo ma suesue i a'u tusi-tusiga paia. O le a ou faia se taumafai e faamalosia ai la'u molimau i le Faaola i aso uma. Ma o le a ou taumafai pea e ola e pei ona Ia finagalo ai ma faalagolago i Ana afioga ma Ana perofeta soifua ma aposetolo e aoao mai au i le ala, ma faalagolago i le faaosofia e puna mai e le gata mai lo'u faatuatua ia te Ia ma le alofa mo Ia ae mai Lana taulaga e faavavau ma le alofa mo au. ■

#### FAAMATALAGA

1. Dieter F. Uchtdorf, “O Le Ala o le Soo,” *Liahona*, Me 2009, 78.
2. L. Whitney Clayton, “Filifili e Talitonu,” *Liahona*, Me 2015, 36–39.
3. Jeffrey R. Holland, “Le Alii e, Ua Ou Faatuatua,” *Liahona* Me 2013, 94.
4. Rosemary M. Wixom, “Toe Foi i le Faatuatua,” *Liahona* Me 2015, 93–95.
5. Tagai Thomas S. Monson, “O Le Mana o le Tusi a Mamona,” *Liahona*, Me 2017, 87.
6. Rosemary M. Wixom, “Toe Fo'i i le Faatuatua,” 93.
7. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95.
8. Dieter F. Uchtdorf, “Sau, Auai Faatasi ma i Matou,” *Liahona* Nov. 2013, 23.
9. Dieter F. Uchtdorf, “O Le Mana o se Molimau Patino,” *Liahona*, Nov. 2006, 37–39.



#### O FILIFILIGA E LUA

“E le faigata le ala a le Alii. E faigata le olaga, ae le o le talalelei. . . . E faigata le olaga mo i tatou uma lava, ae e fai-gofie foi le olaga. E na o le lua lava a tatou filifiliga. E mafai ona tatou filifili a le mulimuli i le Alii ma ia faaeeina i Lona mana ma maua le filemu, malamalama, malosi, atamai, lototele, alofa, ma le olioli, pe o le tatou o foi i se isi auala, i soo se auala, po o le a lava le auala ma tatou o ai lava na o i tatou—e aunoa ma Lana fesoasoani e aunoa ma Lona mana, e aunoa ma le taitaiga i le pogisa, i faigata, le ma-tonu, faanoanoa, mafatia ma le atuatuvalle. Ma ou te fesili atu, o le fea ala e faigofie atu?”

Elder Lawrence E. Corbridge of the Seventy, “O Le Ala,” *Liahona*, Nov. 2008, 36.

# O Le Uluai Laasaga i le Salamo

**Sa ou lagonaina ua pogisa lo'u olaga. Ona ou iloa ai lea e manaomia ona ou talanoa i lo'u epikopo.**

**Saunia e Aurilas Peterson**

**O**u te manatua le faatulagaina ma faifeautalai o le aso o lo'u papatisoga. Sa ia fesili mai pe ua ou sauni e osifeagaiga ma lo'u Tama Faalelagi. E aunoa ma se mafaufau i ai ma se loto ua tumu i le olioli, sa ou fai tau, "Io!" Sa ou manao e talia le meaalofa faapitoa sa tuuina mai e lo'u Tama alofa ia te au, ma sa ou iloaina o le a ou le fiafia e aunoa ma le Faaola i lo'u olaga. Ae sa ou matuai le mautinoa lava le mea o i le lumanai mo au.

Mulimuli ane, ua oo mai le aso tele. Sa le mafai ona gallo, ma sa ou matua fiafia lava.

## **O Aso Pogisa**

Ina ua uma lo'u papatisoga ma le faamauga, sa faafuasei ona foliga pogisa aso. Sa ou feagai ma faafitauli faaleaiga, ma sa ou tauivi e usitai i tulafono uma a le Atua. Sa ou le iloa se mea e fai, ma sa ou manao e lafoai mea uma. Sa foliga mai e leai se tasi na malamalama ia te au.

Sa masani ona ou fiafia e faitau le Tusi a Mamona, ae o le taimi lena sa ou faataatia ese ai. I se tasi aso, a o ou i ai i le fale na o au, sa ou lagonaina le

mafanafana o le uunaiga a le Agaga ia te au e faitau le Tusi a Mamona. Sa muamua ona ou tatalo, i le manao e maua se tali o le a mafai ona maua mai ai se filemu i lo'u mafatiaga. Sa ou susueina tonu i le Alema mataupu 5. Fuaiupu e 27 e faitauina: "Ua outou savavali ea, ma tausi outou lava i le lē pōnā i luma o le Atua? E mafai ea ona outou fai ifo, i totonu ia te outou lava, pe afai e valaaulia outou e feoti i le taimi nei, ua lava lo outou lotomaualalalo? Ua faamamaina o outou ofu ma ua faasinasinaina e ala i le toto o Keriso, o lē o le a afio mai e togiola ona tagata mai ia latou agasala?"

Na iu ina, sa ootia lava a'u i nei upu. Sa ou iloaina sa manaomia ona ou salamo, o lea sa ou faia ai se aso e vaai ai lo'u epikopo. Sa le mafaafitia lo'u fefe, ae sa ou faamalosia a'u lava ou te alu e talanoa ia te ia.

## **Malamalama i le Folafolaga a le Atua**

Ina ua ou taunu atu i le ofisa o epikopo, sa ou lagonaina lava lo'u tausalaina ma sa ou manao ai e toe foi mai. Ae sa ou tatalo ia ou maua le lototoa ou te tautala atu ai i mea uma sa manaomia ona ou ta'u atua. Sa

faafeiloai au e le epikopo i lona ofisa, ona ia faia lea o se tatalo ia maua le fesoasoani mai le Atua. Sa ia tautala mai ia te au e pei o sona atalii ma sa faaalia lona alofa mo au e ala i ana upu. Sa ia tuuina mai se fautuaga ma fai mai ia te au e faia ni mea patino ina ia ou maua ai le faamagaloga a le Atua ona toe alu atu lea e vaai o ia.

Sa ou matua fiafia lava mo lenei avanoa Sa ou mulimuli i lana fautuga ma sa iu ina ou malamalamā i le folafolaga a le Atua o le faamagaloga ia Alema: "Afafai na te faaalia ana agasala

i luma o oe ma a'u, ma ua salamo faamaoni lona loto, o ia lena e te faamagaloina, ou te faamagaloina foi o ia" (Mosaea 26:29). Ina ua uma ona ou salamo faamaoni, sa ou iloaina ua faamagalo au e le Atua. Sa iu ina mafai ona ou lagonaina le alofa o le Atua i lo'u loto, ma sa aveeseina atu le pogisa. Sa ou fiafia ma mitamita ia te a'u lava.

### **Ua I Ai Iina le Epikopo e Fesoasoani**

O le epikopo o le sui o le Alii mo le uarota. Ia iloa o loo i ai o ia iina

e fesoasoani ia te oe ia maua le fiafia moni o loo teuina e le Atua mo oe. Faalagolago ia te ia. Afai o i ai ni ou faafitauli pe manaomia ona salamo, alu e sue o ia. O le a Ia fesoasoani ia te oe.

Ou te iloa e le o se mea faigofie le alu e vaai o ia i nisi taimi. Ae sa faamalamalama mai e Peresitene Lorenzo Snow (1814–1901) e uiga i le fuafuaga e faavavau a le Tama Faalelagi: "Ou te talitonu i le lalolagi o agaga i le [muai olaga], ina ua faatu mai ia i tatou e... tatou te uia aafiaga ua tatou maua nei, sa lei logoleia uma ma ioeina.... Ae sa manino faapea sa tatou vaai ma malamalamā lelei iina e faapea, ina ia mafai ona ausia lo tatou faaeaga ma le mamalu, o se aafiaga lenei e tatau ai." Na ia toe faapea mai, "Sa tatou loto e usitai i le finagalo o le Atua, ma o le taunuuga o lea ua tatou i ai iinei" (*Aoaoga a Peresitene o le Ekalesia: Lorenzo Snow [2012]*, 300).

O le salamo o se vaega o le usiusitai i le finagalo o le Atua. O lea la, nai lo le fefe i le epikopo, ia fai o ia ma au uo. Sa filifilia o ia e le Atua, ma e mafai ona ia fesoasoani ia e salamo ma faamaloloina lou agaga e ala i le sau ia Iesu Keriso. E finagalo le Alii e fesoasoani ia i tatou, ae e tatau ona tatou faia le uluai la'a agai atu i le salamo. O iina e mafai ai ona tatou vaia le folafolaga o i le Isaia 1:18 ua faataunuina: "E ui lava ina pei o ofu mumu a outou agasala, e sisina ia e pei o le kiona." Ma o le ala lena, ua i ai le epikopo iina e fesoasoani.

Ou te molimau atu o loo soifua le Atua ma o Iesu Keriso o lo tatou Faafola. E alolofa tele i la'ua ia i tatou! ■  
*E alaala le tusitala i Ouest, Haiti.*



# AOAOINA LE ALAA A LE ALII



Saunia e Elder  
**David A. Bednar**

O Le Korama  
a Apostolo e  
Toasefululua

**O** le faanatinatia e le Alii o Lana galuega e manaomia ai i tatou ia aoao pea lava, ia suia, ma fetuleni atu i luma ma le faatuatua i le Faaola.

## O Se Mamanu i Mea Uma

I se faaaliga na tuuina mai i le Perofeta o Iosefa Samita ia Iuni o le 1831, sa tautino mai ai e le Alii: O le a Ou tuu atu ia te outou se ata i mea uma, ina ia lē faaseseina outou; ona ua i ai Satani i le salafa o le laueelele, ma ua fealuai o ia e faasese i atunuū” (MF&F 52:14).

O le mea mataina, na tuu mai e le Alii ia i tatou “se” ae le o “le” mamanu o mea uma. Ou te le talitonu ua faapea mai le Alii i le gagana “se ata i mea uma” faapea e na o le tasi Lana mamanu po o le ata e faaaoga i tulaga uma. Ae, o le ala a le Alii e aofia ai ni mamanu eseese e mafai ona faaaoga e faataunuū ai faamoemoega eseese faaleagaga.

O la tatou sini taualuga i soo se poto masani o le aoao mai ma le aoao atu e tatau ona fuafua ma faaaoga le mamanu po o mamanu e sili ona fetaui ma o tatou manaoga ma ausia ai taunuuga manaomia o le aoaoina.

## O Le Agaga Paia o le Faiaoga.

O le Agaga Paia o le sui auai lona tolou le Aiga Atua ma o se Talifaaaliga, o se Faiaoga, o se Faamafanafana, o se Faamama, ma Na te faamanatu maia mea uma (tagai Ioane 14:16–17, 26; 3 Nifae 27:20). Sa faamalamalama mai e Elder James E. Talmage (1862–1933) o le Korama a Apostolo e Toasefululua, “O le Tofi o le Agaga Paia i Lana galuega i tagata o loo faamatala mai i tusitusiga paia. O Ia o se faiaoga na auina mai e le Tama; ma ia i latou o e ua i ai le aia i Ana aoaoga o le a Ia faaalia i ai mea uma e tatau ai mo le faalauteleina o le agaga.”<sup>1</sup> O le

O le valaaulia o le Agaga e avea  
ma faiaoga o se faamoemoega  
tutotonu lea i mamanu uma a le  
Alii mo le aoaoina.



# O LE AOAO E ALA I LE FAATUATUA E MANAOMIA AI LE LOTO MA LE MAFAUFAU MALIE.



valaaulia o le Agaga e avea *o le* fai-aoga o se faamoemoega tutotonu lea i mamana uma a le Alii mo le aoaoina mai ma le aoao atu.

O se tagata aoao e faaaogaina le faitalia ma galue e tusa ai ma mata-upu faavae sao e tatalaina lona loto i le Agaga Paia—ma valaaulia Ana aoaoga, molimau mamana, ma le molimau faamautuina. O le aoaoina e ala i le faatuatua e manaomia ona tuu i ai le faaleagaga, o le mafaufau, ma le faaletino ae le tau lava ina talia. O le faamaoni a'ia'i ma le ogatasi o a tatou faatinoga musuia i le faatuatua, e faailoa atu ai i lo tatou Tama Faalelagi ma Lona Alo, o Iesu Keriso, lo tatou naunautai e aoao ma talia faatonuga po o aoaoga mai le Agaga Paia.

Mafaufau i le ala e fesoasoani ai faifeautalai i tagata sailili e aoao ai e ala i le faatuatua. O le faia ma tausia o tautinoga faaleagaga, e pei o le suesue ma tatalo e uiga i le Tusi a Mamona, tausia o poloaiga, ma le auai atu i sauniga a le Ekalesia e manaomia ai e se tagata sailili ona faaaoga le faatuatua e galue ai. E faaaoga foi lenei matapu faavae i tagata uma o le au paia, e aofia ai matua, o faiaoga, ma taitai.

O le aoao atu, apoapoi atu, ma le faamalamalama atu—po o le a le taua—e le mafai lava ona avatu ai i se tagata sailili, se tamaitiiti, se tagata aoao, po o se tagata o le au paia se molimau i le moni o le talalelei toe-fuataiina. Vagana ua amatalia ona galue le faatuatua ma tatala ai le ala i le loto ona mafai lea e le Agaga Paia ona tuuina atu molimau faamautu. O faifeautalai, matua, faiaoga, ma taitai e manino lava le tatau ona latou aoao e aoao atu i le mana o le Agaga. Peitai, e tutusa lava le taua, o lo latou tiute-tauave o le fesoasoani lea i isi e aoaoina mo i latou lava e ala i le faatuatua.

O le aoaoina lea ou te faamatalaina atu e sili mamao atu i le na o le malamalama faaleatamai ma le taofia ma le manatua o faamatalaga. O le ituaiga aoaoina lea o le a ou tautala i ai e afua ai ona fagua i tatou i le Atua (tagai Alema 5:7), e tuu ese le tagata natura (tagai Mosaea 3:19), ia suia o tatou loto (tagai Mosaea 5:2), ma ia faaliliu atu i le Alii ma ia le toe pauu ese lava (tagai Alema 23:6). O le aoaoina e ala i le faatuatua e manaomia ai uma le loto ma se mafaufau malie (tagai MF&F 64:34) ma o le taunuuga lena ua aveina atu e le Agaga Paia le mana o le afioga

a le Atua i le ma i totonu o le loto. O le aoaoina e ala i le faatuatua e le mafai ona sii mai i se faiaoga i se tamaitiiti aoga, mai se faifeautalai i se tagata sailili, e ala i se tautalaga, se ata faataitai, po o se galuega faatino o aafiaga; nai lo lena e tatau i se tamaitiiti aoga ona faaaoga le faatuatua ma galue ai ina ia maua le malamalama mo ia lava.

## O Se Mamanu mo le Aoaoina Mai ma le Aoao Atu

**1. Saunia e aoao.** Afai e te auai i lau vasega o le Aoga Sa ma faalo-gologo i lou faiaoga o tuuina atu se autu, ua lelei lena. Ae afai sa e galue ma sauniuni, afai o e mafaufau i mea sa valaaulia oe e lou faiaoga e faitau, mafaufau i ai, ma tatalo ai a o lei oo i le vasega, e mafai ona i ai se sasaa mai ma le mamana o le Agaga, ma avea ai le Agaga Paia a ou faiaoga. O sauniuniga e valaaulia ai faaaliga.

**2. Fegalegaleai ina ia faaga-eetia ai.** Ou te fia manao e tata'i o outou manatu i le fuaiupu lea. "Tofi se faiaoga i totonu o outou lava, ma ia le tuu atu i tagata uma e täutala i le taimi e tasi; ae tuu atu i tagata e tautala taitoatasai mai ae tuu i isi tagata uma

e faalogologo i ana upu, ina a uma ai ona tautala mai o tagata uma, o le a faapea ona mafai ona faagaeetia ai o tagata uma, ma ina ia mafai ona maua ai e tagata taitoatasi le avanoa tutusa” (MF&F 88:122).

O se tasi lea o mamanu mamana a le Alii mo le aoaoina mai ma le aoao atu. Se'i ou fautuaina atu se isi auala e tilotilo ai i le fuaiupu lea: “Tofi se faiaoga i totonus o outou lava.” O ai le faiaoga? O Le Agaga Paia. Pe le o le uiga ea afai e te manao i le Agaga Paia e avea ma faiaoga, ona “ia lē tuu atu i tagata uma e tāutala i le taimi e tasi; ae tuu atu i tagata e tautala taitoatasi mai ae tuu i isi tagata uma e faalogologo i ana upu, ina a uma ai ona tautala mai o tagata uma, o le a faapea ona mafai ona faagaeetia ai o tagata uma”? Na pau le tagata e mafai ona maua mai ai lena faagaeetiaga po o le malamalama o le Agaga Paia.

O le fegalegaleai ia faagaeetiaina e valaaulia ai faaaliga. O le taimi nei i le Ekalesia, o loo tatou aoaoina ma fa'aaogaina atili mamanu e sili atu ona maaleale faaleagaga, luitauina, ma faamalosia o le aoaoina mai ma le aoao atu. Mata a tatou faia mea tatou te faia pea lava pea ma maua mai ai taunuuga lava e tasi tatou te maua i taimi uma, pe o le a tatou salamo ma aoao ma suia ma faateleina ona aoao atu i le ala a le Alii?

**3. Valaaulia e faatino** Na o le tasi lava le fesili faigofie e ausia ai lenei sini. O le a se mea o le a e faia i mea ua e aoaoina? O le faatinoina o faaaliga e valaaulia ai isi faaaliga.

Ou te tatalo o le a tatou o faatasi ma le faanatinati a le Alii, ina ia aua ai

nei na ona tatou faia o mea sa tatou faia pea lava i le ala sa masani ona tatou faia ai.

Ou te tuuina atu la'u molimau i le soifua moni o le Alii o Iesu Keriso. Ou te molimau atu o loo soifua o Ia. Ua toetu o Ia. O loo tu o Ia i le ao o lenei Ekalesia o loo Ia taitaia ona mataupu. O loo Ia fautuaina i tatou ia ogatasi

ma Lana faanatinati ma mulimuli i mamanu sa Ia faatuina mo lo tatou tuputupu ae ma le aoaoina. ■

*Mai se saunoaga na tuuina atu i le semina mo peresitene fou o misiona i le aso 25 o Iuni, 2014.*

#### FAAMATALAGA

1. Tagai i le James E. Talmage, *Articles of Faith*, 12th ed. (1924), 110).



## O SAUNIUNIGA E VALAAULIA AI FAAALIGA.

# O AUALA E

# 5

## E AOAO AI MAI LE KONAFESI AOAO

### O LE KONAFESI AOAO O SE AVANOA


**OFOOFOGIA** E auaatasi ai ma tagata o le Ekalesia i le salafa o le lalolagi e faalogologo i tai-tai o le Ekalesia ma maua mai ai le taitaiga mai le Alii. O le maimoaina, faalogologo i ai, ma le sue-sueina o savali o le konafesi aoao o le a aumaia ai le Agaga i lou olaga ma fesoasoani ai e fausia lau molimau. O se avanoa mo oe e maua ai ma galue i luga o faaaliga faaletagata lava ia.

O auala nei e lima e mafai ona e aoao ai mai le konafesi aoao.

# 1

### TUSI I LALO AU FESILI A O LEI AMATA LE KONAFESI AOAO.

Faaaoga se taimi e tusi ai i lalo au fesili a o lei amata le konafesi aoao, ona nofouta lea i tali e oo mai ia te oe i le taimi o le konafesi. E mafai ona tali au tatalo ma fesili a o e auai ma faalogologo i le Agaga.



# 2

### SAILI E AOAO E UIGA IA KERISO.

Ua molimau mai perofeta ma aoao mai e uiga i le Faaola (tagai Galuega 10:43). A o e faa-logologo i savali o le konafesi e mafai ona e mafaufa e uiga i mea o loo aoao atu ai oe e le aufailauga e uiga ia lesu Keriso. E mafai foi lava ona e faia se lisi i au tusigamanatu.

FAMATALAGA MAI LE O KERISO MA LE TAUALEA MAUOA, SAUNIA E HEINRICH HOFMANN.

# 5

## IA FAAOSOFIA OE MA MUSUIA E FAATINO.


Tusi ia savali ma upusii e musuia ai oe pe valaulia ai oe e faatino. E mafai ona fesoasoani lenei mea e te faaaoga ai mea e te aoaoina—ma fesoasoani e te manatua ai mea na e mafaufau i ai i se taimi mulimuli ane pe a e manaomia se faamanatu! ■



# 3

## VAAVAAI MO AUTU

A uma ona matamata ni vaega o le konafesi aoao, atonu e te matauina faapea sa e faalogo i se autu po o se matua na sili atu i le tasi ona ta'u. O mamanu e te matauina atonu o se tasi lea ala o loo fesoasoani atu ai le Agaga ia e iloaina se mea o e manao e aoao.



# 4

## MATAU LE TUSI A MAMONA

E mafai ona tele mea e te aoaoina e ala i le nofouta i mau e faasino i ai ia taitai o le Ekalesia, aemaise o le Tusi a Mamona, o le "o le maa'au'au o la tatou tapuaiga" (faatomuaga i le Tusi a Mamona). Vaai e mafai ona e faitauina taimi taitasi e ta'u ai i le konafesi aoao. O le a maofa i mea e te maua!



O le aoao e ala i le faatuatua e manaomia ona tuu i ai le faaleagaga, o le mafaufau, ma le faaletino ae le tau lava ina talia.

Eder David A. Bednar, "Aoaoina i le Ala a le Alii," itulau 50 o le lomiga lenei.

Ua ia te oe le mana e maua ai faaaliga ma e galue ai e aunoa ma le fefe.

Henry B. Eyring, "E Taitai e le Alii Lana Ekalesia" Oke. 2017 konafesi aoao

# AOAO MAI E LE AGAGA PAIA

O talavou nei na saunia ina ia aoao mai e le Agaga Paia ao lei oo i le konafesi aoao. O mea sa latou aoaoina mai se konafesi aoao talu ai, ma mea ua ese lo latou faia ona o lena.



## Tali i Fesili

A o lei oo mai le konafesi aoao e lua a'u fesili: (1) E mafai faapefea ona ou tausia se uiga faaalia lelei ma fesoasoani i a'u uo pe a latou faia ni faaiuga leaga? ma (2) E mafai faapefea ona ou molimau atu i le Ekalesia e aunoa ma lo latou ulagia o au? I le taimi o le konafesi, sa molimau mai le Agaga ia te au e le o tuulafoaia au. O lea la ua ou iloaina o le suesueina o tusitusiga paia ma lō'u loto atoa, o le a ou maua ai tali i a'u fesili e uiga i a'u uo. Ou te iloa e faafogfa mai le Tama Faalelagi i au talosaga ma o le a ou taumafai ia faaleleia atili i aso taitasi.

**Isaak R., age 13, Pichincha, Ecuador**

**E uiga i ai:** Na o ia le tamaitiiti; e fafia e tata piano, faase'e, taalo lakapi, fai judo, aau, pese, ma fai lole; e fia avea ma fomai; o lana lanu e fafia i ai o le lanu meamata.



## Faatonuga Musuia

Sa musuia au e le konafesi aoao. A o faalologolo ai i faatonuga mai o tatou taitai e auauna atu i isi, faalagolago ia Keriso, ma uumau i le ai u'amea, sa ou lagonaina o molimau mai le Agaga Paia e moni lenei talalelei ma e mafai ona tatou maua le ola e faavavau e ala i le tausia o poloaiga ma mulimuli i le afioga a le Atua. Sa ou faatutuina ni sini ia ou auauna atu atili i lō'u nuu ma ia faamalosia la'u molimau e ala i tatalo i aso taitasi ma le suesue i tusitusiga paia. Ou te iloa o au o se afafine o le Tama Faalelagi. O loo soifua o la ma e alofa ia te au e faavavau ma e le aunoa.

**Madelyn B., age 16, Delaware, USA**

**E uiga i ai:** Ulumatua o le fanau e toatolu; e tamoe felavasai i le atunu; e fafia e fiaitautusi ma usu pese; e fafia i le gagana Sipaniolo ma o loo faamoemoe e faioga i le Igilisi o se gagana lona lua




### Sauni e Aoao

Ou te lagonaina le malosi o le Agaga i le konafesi aoao. Talu ona ou saunia fesili ma saunia au lava ia faaleagaga mo le konafesi, ua matuai ese lava se uiga i lo'u olaga, ma ua mafai ona ou aoaoina ni mea se tele mai lauga taitasi. Ou te matua faafetai lava mo le perofeta ma aposetolo, ma ou te iloa na auina mai i latou mai le Tama Faalelagi e taitai i tatou ma taiala i tatou i o tatou olaga!

**Ben H., 17 tausaga, Kentucky, ISA**

*E uiga i ai:* E fafia i taaloga; taalo pasiketipolo ma tenisi i le aoga; e fafia e faaséé, aloalo i le kiona, faimalaga, ma savali alasopo.



### Valaaulia e Tuputupua'e

O le konafesi aoao e faamalosia ai au ma se naunauga e mulimuli i le ala o le talalelei a lesu Keriso. Sa fesoasoani ai te au ia iloa ma malamalama o le Ekalesia moni lenei, lea e aumaia ia i tatou le malamalama ma le fiafia. Sa ou lagonaina le Agaga o valaaulia au ia ou tuputupu ae i aso taitasi ma ia faitau le Tusi a Mamona ia maua ai se molimau malosi o le talalelei. Ou te taitonu sa finagalo lo'u Tama Faalelagi e faalogo i nei savali musuia.

**Vicente A., age 16, Metropolitan Region, Chile**



*E uiga i ai:* Ulumatua o se fanau e toafa; e fiafia e taalo i taaloga vitio, faalogologo musika, ma taalo lakapi; e auai i talafaatino; e manao e faamisiona



### Saili Atu i le Malamalama

O le tausaga na muamua atu i le tausaga na téa nei o se tausaga faigata mo au. Sa tauivi lo'u tama ma le kanesa, ma sa i ai osofaiga a le au faatupu faalavelave i lo'u aai. Sa ou tauivi ma le atatuuvale, ma tomanatu pe mafai faapefeara ona ou lagonaina le toafilemu pe a ou popole mo lo'u saogalemu faaleagaga ma le faaletino. Mai le konafesi aoao sa ou aoaoina ai e mafai ona tatou maua le filemu pe a tatou ola mama, ma faatutumuina o tatou loto i le faatuatua, ma tausisia se vaaina i le faavavau. Sa musuia au e liliu atu ia Keriso i taimi o faigata nai lo le faalagolago i lo'u lava atamai. Ou te iloa e mafai ona ou faatoilaoina tosinaga o le pogisa e ala i le sailia o le susulu o le malamalama o Keriso.

**Olivia H., 17 tausaga, Peleseuma**

*E uiga i ai:* O se tagata aau; fafia e auana atu, e aofia ai le volenitia i se fale e tufa fua ai meaai mo e leai ni aiga, o se fale mo tamaiti matuaci, ma le polokalama a lana aoga mo e e i ai manaoga faapitoa.




"I LE AUTALAVOU O LE EKALESIA,

OU TE  
FOLAFOLA ATU  
AFAI O LE A OUTOU  
FAALOGO

[I LE KONAFESI AOAO], O LE A  
OUTOU LAGONAINA LE FAATELEINA  
O LE AGAGA I TOTONU O OUTOU.  
O LE A TAU ATU E LE ALII IA TE  
OUTOU MEA E FINAGALO O IA IA  
OUTOU FAIA I O OUTOU OLAGA."

Elder Robert D. Hales (1932-2017)  
o le Korama a Apostolo e Toasefululua  
"Konafesi Aoao: Faamalosia o le Faatuatua ma Molimau"  
Oke. 2013 konafesi aoao

# Mea Moni e uiga i le KONAFESI AOAO




O le laau mo le pulelaa o le Maota Autu mo Konafesi na aumai i le lama o **PERESITENE GORDON B. HINCKLEY** (1910–2008) o se laau ua loa



## O FAASILASILAGA ILOGA NA FAIA I LE TAIMI O LE KONAFESI AOAO:

<b>SETE. 1995:</b> “O Le Aiga: O Se Folafolaga i le Lalolagi”	<b>APE. 1998:</b> Fauga o malumalu laiti	<b>APE. 2001:</b> Na amataina ai Le Tupe Faaagaga Mo Aoga	<b>OKE. 2012:</b> Ua tuu i lalo tausaga mo Faifeautalai	<b>APE. 2018:</b> Auaunaga ua suia ai faiaoga o aiga ma faiaoga asiasi
--	---	--	--	---



**“E mafai  
faapefea ona  
ou valaaulia le  
Agaga i totonu  
o lo’u aiga pe  
a tauaimisa  
ma fefinauai  
tagata?”**

#### IA AVEA MA FAATUPU FILEMU

“Pe a le mafai ona  
tatou suia amioga  
a isi, o le a tatou  
faia le tiute o le  
pulea lelei o i tatou  
lava....

“Nai lo le  
tauaimisa ma le  
feeseeaseai i le va o  
tagata o le aiga, o  
lo tatou tiute o le  
atia’e, faalogo, ma  
fefautuaai faatasi.”

Elder Marvin J. Ashton (1915–94)  
o le Korama a Apostolo e Toase-  
fululua, “Leai se Taimi mo Finauga,”  
Me 1978, konafesi aoao.



#### Fai Atu la E Malie

I se taimi na ou i ai i se  
tauaimisaga, sa ou iloa-  
ina o le fai atu e faamalie  
atu ma ta’u atu ua e sese,  
tusa lava pe e te manatu  
pe iloaina e te sa’o, e fesoasoani e  
toe aumaia ai le filemu i le potu. Ona  
savali ese lea, nofo filemu, sui le mata-  
upu, pe sue se mea e ioe i ai. E le umi  
se taimi mo le Agaga e toe foi mai ai.

Dylan M., 15 tausaga, Kaledonia, USA

#### Tau Lava o le Alofa

Ua ou ioa o le faaali atu o le alofa  
mama i lo’u aiga e valaaulia ai le  
Agaga e afio ai i lo matou fale. Sa  
saunoa le perofeta e uiga i le alofa  
o le faaosofia lea e afua ai ona suia  
ma o le pulupasama e aumaia le  
faamalologa i le agaga. O se agaga o  
le alofa e aumaia le saogalemu ma le  
filemu i le fale.

Joseph C., 18 tausaga, Arizona, USA

#### Talanoa i Lou Aiga

Afai o lou aiga e le o ni tagata o le  
Ekalesia, ta’u atu ia i latou lou faanoa-  
noa pe a tauaimisa ma talosagaina i  
latou ina ia faaleleia. A le aoga lena,  
tatalo ma toe taumafai. Afai o i latou o  
ni tagata o le ekalesia, faamanatu i ai  
o i latou o fanau a le Atua ma e tatau  
ona latou taumamao mai le tauaimisa.

Caroline S., 19 tausaga, Goiás, Pasila



### Tatalo mo le Agaga

Soo se taimi e tauaimisai aiga, e faigata ona lagonaina le afio ai o le Agaga, ae e le faapeao le a le mafai ai ona e lagonaina pe e te agavaa. Fai se tatalo i lou loto mo se fuataga faaopoopo o le Agaga o le Alii ma gauai atili atu i uunaiga e tuuina mai. E mafai e le Tama Faalelagi ona fesoasoani ia te oe ia lagonaina le filemu ma iloa le ala sili e fesoasoani ai e toe aumaia lena filemu i lou aiga.

*Katie G., 17 tausaga, luta, USA*

### Taumafai ia Feutagai

Talanoa i lou aiga e foia le faafitauli i se ala e aoga mo tagata uma, pe faasoa atu foi se mau pe usu se viiga. E mafai foi ona e ole atu i le Tama Faalelagi mo se fesoasoani e foia ai le faafitauli. I lea ala, o le a faatoofilemuina ai tagata uma ma mafai ai ona foia le faafitauli e aunoa ma le manaomia o se feei po o vesiga. E moni o le a faatumuina oe e le Agaga i le filemu ma avatu ai i tagaTa uma le naunauga e le toe tauaimisa.

*Luis F., 14 tausaga, Playa del Carmen, Mekisiko*

O tali ua faamoemoe e mo le fesoasoani manatu, ae e le o se faalauiologa aloaia o aoaoga faavae o le Ekalesia.



## Pe o se molimau e sili atu nai lo na o ni lagona?

O se molimau o le mea lea na fetalai atu ai le Faaola ina ua la ta'u atu ia Peteru; "E le se tagata na ia faaali atu ai ia te oe, a o lo'u Tama o i le lagi" (Mataio 16:17). O se mlamalama mai le Atua e faaalia e ala mai i le Agaga Paia.

O le Agaga Paia e fetalai mai i se leo tatou te lagonaina tele nai lo le faalogo ai; ae e oo mai i "lou mafaufau ma i lou loto" (MF&F 8:2; faama-mafa ua faaopoopo)—o o tatou mafaufauga faapea foi o tatou lagona.

Na faamatalaina e le Perofeta o Iosefa Samita, "o le agaga o faaaliga o se "lagona o le atamai mama a'i a'e tafe atu ia te oe, [ma avatu ai] faafua-sei ai ia te oe manatu" (Aoaoga a Peresitene o le Ekalesia: Iosefa Samita [2007], 132).

Pe a tatou liliu atu o tatou mafaufau ma loto—o tatou manatu, lagona, ma naunauga—i le Atua, e mafai e la ona fetalai i o tatou mafaufau ma loto i se siufogaga itiiti, toafilemu o le Agaga Paia. A o la fesootai ma o tatou agaga, e foliga mai e i ai lagona ma mafaufauga patino e tafe mai ia i tatou. O le molimau lena Na te tuuina ai ia i tatou.

### O Le A Sou Manatu?

"E faapefea ona ou maua ni uo e lelei tulaga faatonuina?"

Auina mai lau tali ma, afai e manaomia, o se ata manino lelei a o le'i oo i le aso 15 o Ianuari, 2018, i le liahona.lds.org (kiliki le "Submit an Article").

E ono iloiloina tali mo le uumi po o le manino.

# O Ala e Saunia ai Oe mo Lou Lumanai

Saunia e Leah Barton

Mekasini a le Ekalesia




U te le manatu e moemiti se teineitiiti e 14 tausaga le matua ia i ai i se fale pefupefua o manu, amo se suo elea, ma faamama se fale manogi leaga o soloafanua. Ae o iina sa ou i ai pe a tuua le aoga i aso uma seia oo ina ua lava lo'u matua e maua ai se isi galuega.

O le mea moni e le o so'u tulaga faamoemoeina lea e faigaluega ai i le taimi o o'u aoga maualuga, ae sa ou malamalamā i lena taimi afaí ou te manao i se galuega ou te fiafia moni i ai-se galuega sa lei aofia ai se faamamaina o manu—sa manaomia ona ou alu i le kolisi, ma o le alu i le kolisi, sa ou manaomiaina ai foi le tuge. Sa ou lagonaina o le mea lena mo a'u, o le a'oga o le laasaga tonu lea e agai atu ai (ma le faamoemoe) e faataunuina se matata.

O le mea manaia o le ala sa ou filifilia o se tasi o le mau ala e mafai ona fesoasoani ia te oe e aoao ai e faigaluega ma saunia mo ou lava manaoga. Ua faaigoaina lea ala o le faalagolago ia te oe lava i le faaletino ma le faaleagaga. A o e mafaufau i mea e te filifili ai, taumafai e filifili le ala e te lagona o le a sili ona saunia ai oe.

O nei tala e mai tagata tou te tupulaga faatasi i ni nai tausaga talu ai. O le mulimuli i faataitaiga a nei talavou matutua, e mafai ai ona e maua lou lava ala agai atu i le faalagolago ia te oe lava ma le manuia.



## MAFAUFAU I MANAOGA O LOO SIOMIA AI OE

Saunia e Oudom Piseth, Kemupotia

Ina ia mafai ona ausia a'u sini, ou te ta'uina pea lava pea ia te au o le galue malosi e taua tele, ae o se tasi auala e faamanuiaina ai o le galue ma le poto. Ina ua maea la'u misiona i Egelani, sa ou toe foi i Kemupotia ma vaavaai mo galuega o faasalalau. Sa ou vaavaai i mea e pei o le umi o aoaoga e maua ai galuega taitasi ma le tau o aoaoga.

Sa ou iloa ai o le polokalama faaleaoaoga e avea o se gaosi lavalava e puupuu ae faigata, ma e le toatele ni tagata sa faia. Sa ou vaiai o se avanoa lelei ma tonu ai loa e fai. Ua uma nei la'u polokalama ma o loo ou faigaluega o se gaosi lavalava mo se kamupani lavalava.

O le mauaina o le matata sa'o e mafai ona faigata tele, ae o loo i ai le Faaola e fesoasoani ia e au ma siitia au.

Pe o e alu i le kolisi, saili galuega, pe o aoao se matata, o loo e atina'eina se uiga faaalia e tatau ai mo le fausiaina o le malo o le Atua.

## FAAAOGA AOAOGA E TATALA AI FAITOTOA

• Saunia e Iolanda Teixeira, Cape Verde, Afrika

**F**aftuaina lava au e le aunoa e lo'u tina i se fasifuitau faapea, "O aoaoga o le ki lea o manuia." Sa ou manao i se lumanai sili atu mo au lava aemaise ai lo'u aiga, ma ina ia faia lenei mea, e manaomia lo'u faaauauina o a'u aoga. Ona o le leai o se tupe e alu ai i le kolisi i lena taimi, sa ou faaaoga ai se sikolasipi e alu i se aoga faalematata e suesue ai polokalama faakomepiuta ma le tausiga.

I a'u suesuega atoa sa ou feagai ai ma luitau eseese, ae e lei taofia ai au mai le agai pea i luma ma le tepa taulai atu mo aso e sili atu. Sa tele ina fesoasoani le tatalo ia te au; ou te sailia lava e le aunoa faftuaga mai le Alii. Sa ou tuuto atu e le aunoa i a'u suesuega, ma o le aso o loo tumau pea lo'u tuuto i la'u galuega, ma tuuina atu le mea sili o se enisinia faakomepiuta ma se fesoasoani i le makietaina.



## GALUE NEI AGAI ATU I LE LUMANAI E TE MANAO AI

Saunia e Ann-Sophie and Lawrence Cavin,  
Scotland, UK

**A**nn-Sophie Sa ou manao pea lava e a'oga ai se iunivesite, ae sa tele ina suia i tausaga o lo'u talavou. Ina ua uma la'u aoga maualuga, sa ou galue faavolenitia i se falemai mo le ono masina. Talu mai lena taimi sa ou fiafia i le manatu e avea o se teine tausi soifua, ae sa ou manatu ailogia e mafai ona ou faia.

I le vasega o le ola tutoatasi i la'u uarota, sa faatonuina ai i matou e filifili se galuega matou te mananao ai e ui atonu matou te le agavaa. Sa ou tatalo e uiga i le mea e fai, ma sa oo mai pea i lo'u mafafau faafomai tausi soifua. Sa tonu ia te au e mulimuli i uunaiga a le Alii.

Sa lei faigofie le tulimataiga o lea ala. Ina ia amata, sa ou sailiili i le polokalama faafomai tausi soifua ma mea e tatau ona ou suesueina. Sa ou talanoa i tagata sa ui ai foi i se faagasologa faapea. O le taimi muamua sa ou talosaga ai i le polokalama faafomai tausi soifua, sa tuu au i le lisi faatalitali. Ae ou te lei fiu ai sa ou toe talosaga foi ma sa iu ina talia au. O nisi taimi e tatau ona e onosai ma faalagolago i le Alii aua e i ai Lana lava fuafuaga mo oe.



**Lawrence:** A o ou laitiiti lava, sa ou faatuina se sini ou te faia le mea silisili po o le a lava le mataupu sa ou sue-sueina po o le a foi le galuega ou te faigaluega ai. Sa ou taumafai pea lava e aoao ma faaleleia ina ia ou maua avanoa aupito sili mo le manuia.

Sa ou faigaluega talu ai nei o se pule i se kamupani gaosi lavalava, ae sa ou manao e avea o se leoleo. I Sikotilani e tatau ona e nofo i le atunu mo le tolu tausaga sosoo ao lei talosaga e avea ma se leoleo. Talu ai ona sa ou tuua le atunu mo le lua tausaga e faamisiona, sa tatau ona ou faatalitali mo nisi masina a o lei auai ai.

E ui ina sa avea lea ma se poloka tele, ou tei lei fiu lava. E i ai sa'u galuega lelei mo lo'u aiga, ma sa ou galue malosi foi ia mautinoa e lelei ni o'u lipoti mo ni galuega i le lumanai.

E faapei o nei talavou matutua, o le a e maua e i ai ala eseese e mafai ona saunia ai oe e tausia oe lava ma lou aiga i le lumanai. Faatasi ai ma lena sini i le mafaufau, e mafai ona e fuafua mo le faamanuiaina. Sa aoao mai Elder Dieter F. Uchtdorf o le Korama a Aposetolo e Toasefululu, "Ia tatou faia le mea sili tatou te mafaia ma atina'e se uiga taulelei mo le tulaga silisili i mea uma tatou te faia. Ia tatou seti o tatou mafaufau ma tino i le avanoa mamalu mo le galuega e aumaia e aso fou taitasi" ("Two Principles for Any Economy," Oct. 2009 general conference). A o e taulai atu nei i le aaoaina ma faigaluega, o le a atina'eina ni mausa o le a fesoasoani e te lagona atili ai le talitonuga mautinoa e uiga i le lumanai. ■

*Faamanatu a le Faatonu: Mafaufau e fai i lou epikopo e faafeiloi atu oe i tagata faapitoa mo le ola tutoatasi i le tou siteki. E mafai ona fesoasoani ia te oe ia iloa avanoa mo lau a'oga ma galuega i le lumanai.*

## ILOAINA O LOU ALA

1.

### ILOA O OE LAVA

O le a se mea e te lelei ai? O le a se mea e te fiafia e fai? O le taliina o nei fesili e mafai ona fesoasoani ia te oe e faailoa ai se matata gafatia e fetaui ma ou tomai, mea e te fiafia i ai, ma au taleni o i ai.

2.

### IA ILOA LE LALOLAGI O LOO SIOMIA AI OE

O a galuega o manaomia tele i le mea e te nofo ai? O le a lau matafaioi i le fausiaina o Siona i le mea o loo e nofo ai? O a kamupani la e manaomia tagata faigaluega? O se tulaga poto le filifili o se ala o se matata i se eria o loo ola ma e foliga mai e maua ai avanoa i le lumanai.

3.

### IA ILOA LE MEA E SOSOO E MOOMIA ONA E FAIA MANATUA MEA E TE MANAOOMIA ONA FAIA IA SILI ATU

O a sauniuniga e manaomia e le galuega e te manao ai? O fea o le a e maua ai aoaoga faalegaluega ma a'oga e te manaomia. O le a faapefea ona e totogia? Ina ia ausia se sini faalematata mo se taimi umi, o le a manaomia ona e iloa pe faapefea ona e oo iina.

**FAAATAATAGA:** Mafaufau e fesili i ou matua, faiaoga, ma ue poo a taleni o latou vaaia ia te oe. Atonu e te ofo i mea latou te fai mai ai!

**FAAATAATAGA:** Kolisi, iunivesite, po o aoga faalematata e tele ina iloa po o a tomai e manaomia tele ma pe o a kamupani o loo faatupulaia.

**FAAATAATAGA:** Mafaufau e talanoa i se tasi ua uma ona ia faia le mea ua e manao e fai. Fai atu ia i latou ia fesili. O le tele o tagata e fiafia e tuuina atu fautuaga ma ofo atu ni fautuaga.

# Pasi Atu o le Alofa o le Atua



Saunia e Allie B., 12 tausaga, Kentucky, ISA

Elei leva talu ai ona masii mai lo matou aiga i Kentucky. Sa ou matua le fiafia lava ona sa ou tuua uma a'u uo ma aiga lautele. Sa matua ese lava Kentucky ai le mea sa ou masani ai. O le taimi muamua sa matou o ai i le lotu, sa ou vaia e le toatele ni tagata sa auai. Ina ua ou iloaina le laitiiti tele o le paranesi, sa tonu ia te au nai lo le mafaufau le fiafia i ai, o le a ou faia se mea i ai.

O le aso na sosoo ai na ma o ai ma lo'u tina i le faleoloa. Ae ma te lei tuua le fale, sa ou luluu maia se faaputuga kata e fepasai. Ina ua ma taunu i le faleoloa, sa ou aumaia se sukalati ma ou alu e totogi. Sa siaki e le kesia le sukalati, ona tuuina mai lea ia te au. Sa ou toe tuuina atu ia te ia. Sa ia tilotilo mai ua fememeai ma fai mai, "Lea faatoa uma ona e totogia, sena."

Sa ou fai atu, "Ua ou iloa, ae ua ou tuuina atu ie te oe o se meaalofa." Ona ou tuu atu lea i ai o se kata fepasai faatasi ma le sukalati. Sa ataata o ia ma faafetai mai ia te au. Sa toe tilotilo o ia i le kata fepasai, lea na ou tusia ai, "O tagata uma o se atalii po o se afafine o le Atua." Sa ou savali ese ma le fiafia, ua iloa tusa lava pe le auai o ia i le Ekalesia, ae o la ua ou faia se mea lelei.

I se taimi mulimuli ane i lena aso, sa ou manatua ai sa ou tuua uma isi kata fepasai i autafa o le masini talitupe! O le isi taimi na ma o ai i le faleoloa, sa ou fesili ai pe o i ai pe a i o. Ona ou vaia lea o se mea, ma ou te lei toe laa. Pe lima ia masini talitupe sa i ai kata fepasai o loo fai mai, "O tagata uma o se atalii po ose afafine o le Atua." Sa tufatufa e le kesia! Sa ou matuai lagona le fiafia ona o le mea sa ou faia. ■



# Tatalo i le Ana



**Saunia e Carsen K., 11 tausaga, luta, ISA**

Ole tausaga ua mavae na ou alu ai i se savaliga sopo ma lo'u tama ma so'u uso. Sa matou savavali sopo i le loto o le ana. Sa lei pine ae amata ona matou suesueina se alasopo i autafa. Sa matou mauaina ni ana lapopoa ma ni itu e matamata ai i ni vaiga matagofie. Sa matou fe'a'ei i luga atu o papa matagataga ma maupuepue tifato.

E lei umi lava, ae ua matou matua se lava. Ma te lei iloa po o le fea le ala e toe foi ifo ai i le taele o le ana. Sa matou utia ai i le fememea'i, ua leiloa atu le tumutumu ma le pito i lalo o le ana. Sa amata ona ou matua le fiafia. Sa ou lei iloa po o fea e o i ai, ma sa faapena foi lo'u tama!

Sa amata ona pogisa ma malulu, ma sa matua mamao

foi i matou mai le sao mai i fafo. Sa ou iloa sa silafia e le Tama Faalelagi le mea e o i ai.

Sa ou faapea atu, "Afaí tatou te mananao e o ese mai iinei, e tatau ona tatou tatalo!" O lea na matou tootutuli toatolu ifo ai i lalo e tatalo, ma ole atu i le Tama Faalelagi e taitai ese i matou mai le ana.

A o amata ona matou savavali, sa tau mai e se lagona ia te au a ou vaai loa i se laau sa'o umi, ona ou liliu lea i le itu tauagavale. Ina ua faliu atu i le tauagavale, sa ou vaaia le matou taavale. Sa ou iloa sa fesoasoani le Tama Faalelagi i le aveeseina mai o i matou mai le ana. Na tali mai e le Tama Faalelagi la matou tatalo, ma na iu ai ina matou toe saogalemu mai i fafo—ae o le a goto ifo le la.

Ou te matuai faafetai lava ona o le mana o le tatalo ma le faafofoga mai o le Tama Faalelagi. ■

# Susulu Malamalama i Czech Republic

*Tuufaaatasia e Sharon Goodrich, Mekasini a le Ekalesia*


Sa i ai se taimi na leiloa ai la'u totinilima ou te fiafia lava i ai. Sa matuai ou faanoanoa lava. Sa ma tatalo ma lo'u tina, ae sa lei mauaina. Sa ou taumafai e faatuatua. I se vaiaso mulimuli ane, sa maua e lo'u uso laitiiti lo'u totinilima i le auala! E tali mai le Atua i a tatou tatalo. Ou te alofa ia te Ia ma ou te iloa o loo soifua o Ia!

**Andre W., 9 tausaga**



E i ai a'u uo i le aoga ae e le o ni tagata o Le Ekalesia ae latou te faaaloalogia lava o'u tulaga faatonuina. O le taimi lava ou te fai tau ai ua tatau ona matou tatalo, latou te malilie lava i ai! Sa ou fiafia lava.

**Ivana A., 11 tausaga**



Sa matou o ifo ma a'u uo i lalo. Ina ua matou taunu i le lifi, sa ou maua se lagona le lelei ma sa ou talosagaina a'u uo e aua le faaaogaina. Sa filifili lava i latou e o ai. Sa ou savali ifo i faasitepu. Ina ua ou taunu i lalo, sa le i i ai



a'u uo. O le lifi na latou o ai sa utia! Sa fai si umi faatoa latou o mai i fafo. Sa ou fiafia ona e lei i ai se mea matuia na tupu. Sa ou lagonaina foi le fiafia ona sa ou mulimuli i le Agaga Paia.

**Amalie N., 10 tausaga**

O i matou o tamaiti Peraimeri i Czech Republic. O le ala lea matou te susulu malamalama ai i lo matou atunu.

I le matafaga, sa amata ona pogisa le lagi. Sa agi mai le matagi ma sa afua ai ni galu matautia! Sa papa faititili, emo uila, ma uato'a. Sa taufetuli tagata uma mo se lafitaga. E lei i ai se isi na lavea i le matagi. A o matou agai atu i le fale, sa matou vaiai ni nuanua se tolu. Ua matou iloa sa fesoasoani le Atua ma puipuia i matou.

Jkub B., 10 tausaga



I le aoga e i ai sa'u uo e leai se isi e fia uo i ai. Sa amata ona fai atu e isi tamaiti ni mea leaga ia te ia sa lagona ai e ia e auleaga.

Sa ou ta'ua i lo'u faiaoga ma valaaulia la'u uo ma te taaalo. Sa fiafia ai la'u uo.

Ludmila V., 8 tausaga



Sa tuu atu la'u molimau i le lotu. Sa manaomia ai le lototoa. Talu mai lena taimi, ua ou lagonaina lava le Agaga.

Eliska K., 11 tausaga



Ina ua ma'i la'u fagafao, sa ou tatalo mo ia. Ou te faafetai i le Tama Faalelagi mo le fesoasoani mai ia te i matou.

Aneta P., 10 tausaga



Sa ou ita i lo'u tina ona sa ou lei fia alu e taele ma alu e moe. O le aso na sosoo ai sa ou faanoanoa ona o la'u filifiliga leaga. Sa fai mai lo'u tina e mafai ona ma tatalo ma ole atu i le Tama Faalelagi e faamagalo i ma'ua. Sa ma tootutuli ma tatalo. Sa ou lagona le fiafia. Sa ou aoaoina e mafai ona ou salamo, ma ona o Iesu Keriso, e mafai ona faamagaloina.

Samuel H., 5 tausaga



## AUINA MAI IA I MATOU SE FETU!



Toeiiti lava uma ona matou aoina fetu! Afai e te lei auina maia lava se tasi, topetope ma imeli mai ia i matou se atapu'e o lou fetu faatasi ai ma lau tala, o sou ata, ma le faatagaga a ou matua i le liahona@ldschurch.org.



“Ou te molimau atu ia te Ia, o le Togiola o le lalolagi ma o le Alii  
o i tatou uma. O Ia o le Alo e Toatasi Na Fanaua o le Atua soifua.”

**Saunia e Elder Jeffrey R. Holland**

O Le Korama a Aposetolo e Toasefululu

“O Vavega o le Toefuataiga,” Ensign, Nov. 1994, 34.




# O La Tatou Itulau




A ou alu i le lotu, ou te lagonaina  
le Agaga o le Atua ma le alofa  
mo la ma mo lo'u Faaola o lesu  
Keriso. Ou te alofa i lo'u Togiola.

**Ayana B., 7 tausaga, Faraní**



Ou te fiafia lava e i ai i le  
malumalu ma lo'u aiga.  
O se nofoaga matagofie  
o le a mafai ona ou alu i  
ai pe a atoa lo'u 12. O le  
maota o le Alii.

**Aldo C., 10 tausaga,  
Mekisiko**



**"O Peresitene Monson ma ona fesoasoani"**  
**Omar A., 9 tausaga, o Peru**



Ou te fiafia lava e faasoa le talalelei i le  
aoga ma au uo, aemaise se tamaitiiti e  
faigata ona tautala, tusitusi, ma faitautusi.  
O se tasi auala e faasoa atu ai le talalelei e  
faapei ona aoao ai e lesu Keriso o le feso-  
soani lea ma auauna atu i isi. Soo se taimi  
lava e tuu mai ai e le faiaoga ia i matou se  
galuega e fai i le api o galuega e fai i le fale,  
ou te naunau lava i taimi uma e fesoasoani i  
le tamaitiiti lenei. Ou te fiafia e auauna atu i  
isi aua e fesoasaoai ai ia te au e lagonaina le  
alofa o le Tama Faalelagi.

**Allison M., 10 tausaga, El Salvador**

# Faamoemoe i Holani

**Saunia e Megan Armknecht**

E faavae i se tala moni

O Grace o se teineitiiti e 15 ona tausaga sa nofo i Holani i le taimi o le Taua Lona Lua o le Lalolagi. Sa umi se taimi o le taua. Ua matelaina tagata i Holani i le fiaaai, ma sa latou faamoemoe o le a le o toe mamao ona uma lea o le taua.

O le toe tausaga o le Taua Lona Lua a le Lalolagi o le tausaga sili lea ona leaga i Holani. Sa faoa e le au Nazis mea uma. Sa le mafai ona alu Grace i le aoga. Sa leai se malala e faamafanafana ai le fale. Sa aai e Grace ma lona aiga ia a'a o tulipe ina ia le matelaina i le fiaaai. Sa le lelei lona tofo! O le mea e sili ona leaga, o la lava sa faapagotaina o le taua lona tama.

Ae sa i ai lava se lagona o le faamoemoe. Sa fai mai tagata ua faia'ina le au Nazis i le taua. Ma ia Me o le 1945, sa siilima le au Nazis. Sa iu ina toe saoloto ia Holani! Sa samiina e tagata i magaala. O lea ua mafai ona toe alu Grace i le aoga. Sa leai ni fitafita e fefefe ai.

O le mea aupito sili o mea uma, i se tasi aso a o savavali mai Grace ma ona tuagane mai le aoga, sa latou vaaia se fu'a o Holani o faalelelele i luma o lo latou fale. Sa latou iloaina e tasi lava le uiga o lena mea.

“Ua i le fale Tama!” sa faataio mai ai Heber.

Sa taufetuli atu Grace ma ona tuagane i totonu. Sa fusi mai e Grace lona Tama ma avatu se sogi lapo'a. Sa toe fusi mau o ia e lona tama. O se mea matagofie tele le toe sau o Tama i le fale.



E lei leva lena, ae amata ona tau-nuu mai pusa o meaai, o lavalava, ma vailaau i Holani. Sa auina atu e taitai o le Ekalesia i le Aai o Sate Leki le anoanoai o sapalai e fesoasoani ai i tagata ina ua uma le taua. Sa maua foi se ofu fou o Grace! Ua lima tausaga o ofu lava lona ofu e tasi, o lea sa matuai fiafia ai o ia ina ua maua sona ofu fou.

Mo le taimi muamua i le tele o tausaga, ua faatoa lava ai meaai a Grace. Sa tonu i le au peresitene o le misiona ma le malo o Holani e amata se galuega faatino o le pateta e toto ai nisi meaai. Sa toto e tagata o le Ekalesia le anoano o pateta i fanua lata ane. E oo atu i le tautoulu ua fiaafe pateta e ‘ai’.

“Vaai!” Sa fai atu ai Grace i lona Tama, a o tusi atu i se pateta ua totogo ae. “O le a tatou le toe fiaaai lava!”

Sa luelue atu le ulu o Tama ae le'i ataata. Sa ia fai mai, “Sa ou talanoa ia Peresitene Zappey. Sa ia fai mai o la lava e matelaina le Au Paia i Siamani, pei foi o le mea sa tatou i ai. Latou te le o mauaina se fesoasoani mai le malo. Sa faauouo mai e Tama ia Grace. “Sa fesili mai Peresitene Zappey pe mafai ona tatou foai atu a tatou pateta i le Au Paia i Siamani.”

“Foai a tatou pateta?” Sa faataio atu ai Grace. Ae o le au Nazis e mai Siamani! “E leiloa pe o ni Au Paia o Aso e Gata Ai, Tama, ae o Siamani lava.”

“Ou te iloa e le o se mea faigofie,” sa fai atu ai Tama. “Ae o i latou foi o ni fanau a le Atua. E alofa foi o Ia ia i latou. Ua ou faamagalo ia i latou i le faapagotaina o au. E mafai ona fesoasoani le Alii ia i tatou uma e faamagalo.”



Sa tilotilo a'e Grace i lona Tama. O ia o le tagata aupito lototoa sa ia iloa, ae na te lei iloaina pe i ai sona lototoa e faamagalo atu ai e pei o ia. Ona ia manatua lea o se tasi o ona faiaoga i le aoga i le taimi o le taua. Sa fai atu lona faiaoga e le o Siamani uma o ni Nazis, ma e le leaga uma foi fitafita Nazis. Ma o lea ua matelaina uma teine ma tama i Siamani, e faapei ona sa i ai ia Grace.

Sa manava loloa ia Grace. "Ua ou malamalama," sa ia fai atu ai. "Foai a tatou pateta mo i latou."

Sa toe fusi mau o ia e lona tama ma ataata. "O oe o se teine lototoa. O se mea lenei e faigata ona fai. Ae o i tatou o soo o Iesu Keriso, ma e faapena foi o tatou uso ma tuafafine Siamani."

Sa ataata ia Grace. Sa liusuavai lagona ita sa i lona loto, ma sa ia toe maua le toofilemu ma le mafanafana. Sa mafai ona ia faamagaloina le au Siamani. Ma sa mafai ona fesoasoani Iesu ia te ia e alofa foi ia i latou. ■  
*E alala le tusitala i New Jersey, ISA.*

Sa foai atu e le Au Paia o Aso e Gata Ai i Holani le 140,000 pauna (70 tone) o pateta ma le 180,000 pauna (90 tone) o eleni i le Au Paia o Aso e Gata Ai i Siamani. Mulimuli ane, i le 1963 sa auina atu e le Au Paia Siamani sapalai i tagata o le Ekalesia i Holani ina ua mavae se lolo tele.

# Kalapu Faitau

o le Tusi a  
Mamona

## AUAI MAI I LE FAITAUINA O LE TUSI A MAMONA!

E mafai ona e faitau na o oe, faatasi ma lou aiga, pe faatasi ma se uo. Ona auina mai lea ia i matou o sou ata o loo e faitauina le Tusi a Mamona ma ta'u mai ia i matou se mea ua e aoaoina po o sau tala e te fiafia i ai mai le Tusi a Mamona. Auina mai i le liahona.lds.org (kiliki le "Auina mai se Tusiga").



### O le mau o le masina lenei: Moronae 10:4

“ . . . Afai tou ole atu ma le  
loto faamaoni, ma le manatu moni i ai,  
ma le faatuatua ia Keriso, o le a ia  
faaali mai le moni o ia mea ia te outou,  
i le mana o le Agaga Paia.”



O la'u tala ou te fiafia i ai mai  
le Tusi a Mamona e maua i le 3  
Nifae 17, ma e uiga ia Iesu o loo  
faamanuiaina tamaiti. Ou te fiafia  
i le tala aua o loo ta'u mai ai le  
tele o le alofa o Iesu ma le Tama

Faalelagi ia i tatou. E mafai ona faailoa faatasi au ma  
tamaiti, ma ou te vaai faalemafaufau o la ou te tu ai iina.

**Barbra J., 11 tausaga, Czech Republic**



Ou te fiafia i le Tusi a Mamona ona o se  
tusi moni. O loo tusia e perofeta. Ua fesoasoani ia te au e filifili le mea tonu, ma pe  
a i ai ni o'u faafitauli, e fesoasoani ia te au.  
Ua ou talitonu i ai.

**Jason S., 10 tausaga, Maharashtra, India**

# Sa Lototele Eseta

**O**Eseta o le tupu tamaitai o Peresia. Sa lei iloa e le tupu o Eseta o se lutaia. Sa i ai se ue amioleaga a le tupu sa inoino i tagata lutaia. Sa ia faatogafitia le tupu i le fai atu ua tatau ona fasiotia tagata lutaia uma i le malo. Sa tonu ia Eseta e faatoga atu i le tupu e laveai lona nuu. Peitai sa le mafai ona fasiotia o ia i le alu atu i le nofoalii o le tupu. Sa talosagaina e Eseta lutaia e anapopogi mo ia. Ina ua alu atu Eseta i le nofoalii o lana tane, sa ia talia o ia. Na valaaulia e Eseta le tupu ma lana uo i se taumafataga. O iina, sa ia ta'u atu ai ia te i laua o ia o se lutaia. Sa le mafai e le tupu ona toe sua le tulafono, ae sa ia faatagaina lutaia e puipuia i latou lava. Faatasi ai ma le fesoasoani a le Atua, sa faasaoina ai e Eseta lona nuu!



"Masiofo o Eseta," Rebecca A., 8 tausaga, Venezuela

Faitau e uiga ia Eseta i le Eseta 2–8.



**Sa lototoa Eseta ma sa talitonu i le Atua.  
E mafai ona ou lototele ma tu atu mo le mea sa'o!**

- Tauloto le vaega mulimuli o le Eseta 4:14
  - Matamata le mataupu 45 o tala o le Feagaiga Tuai i le scripturestories.lds.org.
  - Afai e fai atu ou matua ua lava lou matua, anapogi mo se tasi e te alofa i ai.
  - E mafai ona ou lototele e ala i le ...
- 
-

# O Eseta Le Masiofo

Saunia e Kim Webb Reid




O Eseta o se Masiofo.  
Sa faaipoipo o ia i le  
tupu o Peresia.




Sa i ai se uo a le tupu o se tagata leaga. Sa ia faatogafitia le tupu e fai  
se tulafono ua tatau ona fasiotia tagata o sa Iutaia uma! Sa lei iloa e le  
tupu o lana ava, o Eseta o se Iutaia.

Sa tonu ia Eseta e faatoga atu i lana tane, le tupu, e laveai lona nuu. Ae sa popole o ia nei te'i ua toatamai o ia. Sa talosagaina e Eseta Iutaia uma e anapopogi ma tatalomo ia. Sa alu Eseta i le tupu. Sa le'i toatamai o ia!




Na valaaulia e Eseta le tupu ma lana uo i se taumafataga. O iina, sa ia ta'u atu ai i le tupu *o ia* o se Iutaia. Sa toatamai le tupu ona sa faavalea o ia e lana uo. O le a ia ta'u atu ia Iutaia e mafai ona latou puipuia i latou lava. Sa fesoasoani Eseta e laveai lona nuu!



E mafai ona tatou tatalo ma ole atu i le Tama Faalelagi mo se fesoasoani. E mafai ona tatou lototetele ma totoa, e pei o Eseta. ■

*Mai le Eseta 2–8.*

# E Mafai Ona Ou Fesoasoani i Isi ia Lagonaina e Alofagia i Latou





Saunia e Peresitene  
James E. Faust  
(1920–2007)

Fesoasoani Lua i le  
Au Peresitene Sili

## O LA TATOU LAGOLAGO FAIFAI PEA

*O le tele o le taitaiga faaleagaga e  
faalagolago i le ogatusa ma . . . profeta,  
tagatavaai, ma talifaaaliga.*

**O**u te manao e talanoa atu e uiga i tofi paia o na taitai perisitua o e ua “valaaulia ma filifilia” (MF&F 55:1) e taiala le Ekalesia i nei aso. . . .

. . . O’u Uso [i le Korama a Apostolo e Toasefululua,] e aunoa ma se tuusaunoaga, o ni alii lelei, mamalu, ma le faatuatuaina. Ou te iloa o latou loto. O i latou o auauna a le Alii. Na pau lo latou manao o le galulue i o latou valaauga tele ma atina’e le malo o le Atua i le lalolagi. O o tatou Uso o loo galulue i lenei aso ma le taimi ua faamaonia, e tofotofoina, ma e faamoni. . . . E mama a’ia’i o latou loto, e maoae o latou poto masani, e maa-maai o latou mafaufau, ma e loloto tele lo latou poto faaleagaga ma o se faamafanafanaga lava le na ona i ai ma i latou.

. . . [Ina ua valaaquina au, sa fautuina au] faapea o le mea aupito sili ona ttau e tatau ona ou faia o le faaogatasi



i taimi uma ma le Usoga. . . . Na tagatagi pea lena o se mea sa ou manao e fai ma lo’u loto atoa.

. . . Na ou faaiuina ai faapea o le taitaiga faaleagaga e matuai faalagolago tele i le lotogatasi ma le Peresitene o le Ekalesia, o le Au Peresitene Sili, ma le Korama a le Toasefululua—o e uma ua lagolagoina . . . o ni perofeta, tagatavaai, ma talifaaaliga. Ou te le iloa pe mafai faapefea ona tatou faamoemoe ina ia ogatasi ma le Agaga o le Alii pe afai tatou te le o ogatasi ma le Peresitene o le Ekalesia ma isi perofeta, tagatavaai, ma talifaaaliga. . . .

O la’u fautuaga i tagata o le Eklesia ia lagolago le Peresitene o le Ekalesia, le Au Peresitene Sili, o le Korama a le Toasefululua, ma isi Pulega Aoao ma o tatou loto ma agaga atoa. Afai tatou te faia, o le a tatou i ai i se uafu saogalemu. . . .

“E manaomia foi ona fesoasoani ma lagolago o tatou taitai i le lotoifale, aua o i latou foi ua “valaaulia ma filifilia.”

O tagata uma o lenei Ekalesia e mafai ona maua fautuaga mai se epikopo po o se peresitene o le paranesi, se peresitene o le siteki po o se misiona, ma le Peresitene o le Ekalesia ma e latou te galulue. E leai se tasi o nei uso sa talosaga mo lona valaauga. E leai se isi e atoatoa. Ae o i latou o auauna a le Alii, na valaaquina e Ia e ala ia i latou ua i ai le aia tatau i faaaliga. O i latou ua valaaquina, lagolagoina, ma vaetofia ua i ai le aia tatau mo la tatou lagolago. ■

*Mai se lauga o le konafesi aoao o Oketopa 2005.*



FALMATAAGA O FATAUFGAGA AE LE UNIVESTE A POLIKAGA. SA FATAU I TUPE NA AUMAI JACK R WHEATLEY, 2014.  
EDMUND BLAIR LEIGHTON (1852-1922). O LE TAMALOA TAUASO / LE TAELEGA O SELOA. 1879. SUAUAU I LUQA O LE PAU. 40 X 50 1/4 INISI.

**O LE TAMALOA TAUASO  
I LE TAELEGA O SELOA,  
SAUNIA E EDMUND  
BLAIR LEIGHTON**

"Ua tali mai o ia ua faapea mai, O le tasi tagata e igoa ia lesu ua na faiate palapala, ua nini ai otu mata; ua fai mai foi ia te au,  
Alu ia i le taelega i Seloa, ma mulumulu ai: Ona ou alu ai lea, ma ou mulumuluina ona ou vaai ai lea. . .  
"Ana le mai le Atua lena tagata, na te le mafia ona fai se mea e tasi" (Ioane 9:11, 33).

AUTALAVOU MATUTUA

**SUESUEINA O LAU  
"PE AISEA"**

*O le a lau uunaiga mo le  
ola ai i le talalelei?*

44



AUTALAVOU  
AUALA E MAFAI  
E LE AGAGA PAIA  
ONA AOAO OE

50, 56

GALUE NEI MO  
LE LUMANAI E TE  
MANAO AI

62

KONAFESI AOAO  
O AUALA E 5 E  
AOAO AI MAI LE  
KONAFESI AOAO

50, 54,  
58

O LE EKALESIA A  
**IESU KERISO**  
O LE AU PAIA O ASO  
E GATA AI